

NZAMBI ME BUMBAMA YANDI
MOSI NA KUKIKULUMUSA,
MPE KE KUKITALISA YANDI
MOSI NA KUKIKULUMUSA



Matondo na nge, Mpangi Neville. Mfumu kusakumuna nge. Mbote, bankundi ya munu. Ya kieleka mu ke baka yayi mutindu mosi ya bantangu ya nene ya luzingu ya munu, samu na kuvwanda diaka na tabernacle na suka yayi, kumona ntungulu ya yawu ya kitoko, mpe lutumu yina kele na kati ya bana ya Nzambi me vwanda na yinzo ya Yandi bubu yayi.

² Ya yitukisaka munu mingi ntangu mu kumaka awa mazono mpe mu monaka mutindu ya ntungulu. Mu me lotaka ata fioti ve ti ya ke vwanda mutindu yayi. Ntangu mu monaka ba-plan, ti na ntangu ba salaka ba-plan, mu monaka kaka mwa kivinga yankaka ya kuvwanda na lweka mosi, kasi ntangu yayi mu me mona ti ya kele kisika mosi—mosi ya kitoko. Mpe beto ke vutula matondo na yina kele ya Ngolo nionso samu na kisika yayi ya kitoko. Mpe beto kele. . .

³ Mu ke na kunatila beno, na suka yayi, mbote ya kento ya munu mpe ya bana ya munu, bayina zolaka kuvwanda awa na ntangu yayi samu na lukutakanu yayi ya mbiekolo, mpe na sabala yayi ya lusakumunu na Klisto. Kasi bana kele na lukolo, mpe ya kele mpasi na kukatuka. Mpe lubambuku ya bawu na yina me tala yinzo me kwenda fioti, kasi beto nsatu ya beto samu nna beno ke zimbana ata fioti ve. Beno ke zimbana bima yina ata fioti ve. Beno lendaka kuzwa bankundi. Mpe mu—mu ke sepelaka na bankundi, bisika nyonso, kasi ya kele na kima mosi samu na yina me tala bankundi ya ntama. Ata ti beno me kuzwa bankundi ya malu-malu, ya ke vwanda ve mutindu mosi na bankundi ya ntama.

⁴ Ata kisika nionso yina mu ke vwanda, kisika yayi ke vwanda ntangu nionso ya busantu samu na munu. Na yina, pene ya bamvula makumi tatu me luta, na mbeto ya kiziba ya potopoto, mu biekaka kitini yayi ya ntoto na Yesu Klisto na ntangu yawu vwandaka kima yankaka ve kasi mbeto ya potopoto. Yayi nionso vwandaka kiziba. Kikuma yawu yina bala-bala kele na lweka ya or- . . .kuna, bala-bala zolaka luta na lweka, samu na kubaluka na lweka ya kiziba yina vwandaka awa. Mpe awa, ya

vwandaka na ba-lis na ntangu ya ntama, ba-lis ya biziba yina vwandaka basika.

⁵ Mpe lis kele felele ya ngitukulu mingi. Ata ti ya me butuka na poto-poto, ya fwana sala nzila ya yawu na kati ya poto-poto, mpe na manima na kati ya bamasa mpe na kati ya bizela, samu na kubasika na zulu, samu na kulakisa kitoko ya yawu.

⁶ Mpe mu—mu banza, na suka yayi, ti ya kele nionso yina me salama awa. Ti, kubanda na ntangu yina, mwa lis ya fioti basikaka; mpe na ntangu yawu kumaka na zulu ya masa, yawu panzaka mapapu ya yawu, mwa ba-petale ya yawu kubasikaka, mpe ya vwandaka talisa Felele ya Kiwanda. Bika yawu kuzinga mingi! Bika yawu vwanda yinzo ya muvimba yina ba biadisaka na Nzambi!

⁷ Ba biekaka Tabernacle yawu mosi na mvula 1933. Kasi na kubanzaka, na suka yayi, ya ke vwanda kima ya kulutula mbote samu kaka na mwa kisalu ya mbiekolo diaka, mpe mingi—mingi samu na bantu yina, na zola ya bawu mpe luzolo ya bawu samu na Klisto, me sala nionso yayi kusalama. Mpe mu zola kutonda mosi na mosi ya beno samu na makabu ya beno, mpe nyonso, yina beno me pesa samu na mbiekolo ya dibuundu yayi na Klisto.

⁸ Mpe mu ke sepela mingi, mpe mu ke tonda dibuundu, samu na kutuba bandinga yayi ya kuvutula matondo na bampangi ya beto ya mbote awa ya dibuundu, yina me kaba balukutakanu ya bawu samu na yayi. Mpangi Banks Wood, mpangi ya beto ya bakala ya lukumu; Mpangi Roy Roberson, mpangi ya beto ya bakala ya lukumu; mpe mingi yankaka yina, kukondwa munimi mpe na kukikulumusya ya ntima, me lutisa bangonda na bisalu ya ntungulu yina me salama awa, ba me landila bisalu samu nionso kusalama mbote.

⁹ Mpe ntangu mu kotaka, samu na kutala chaire yayi, na mutindu mu vwandaka zola ntangu nyonso, na luzingu ya munu nyonso! Mu kele. . . Mpangi Wood me zaba yina mu vwandaka zola. Yandi tubaka ata fioti ve ti yandi ke tunga yawu, kasi yandi me tunga yawu.

¹⁰ Mpe mu talaka kivinga mpe mutindu ba me tunga yawu, ya kele kaka, oh, ya kele ya nene mingi. Mpe ntangu yayi ya kele ve na bampova na kutuba sensasyo ya munu. Ya kele kaka ve na mutindu ya kusala yawu, beno me mona. Mpe, kasi, Nzambi zaba. Mpe bika ti mosi na mosi kuzwa musendo samu na nsisani ya beno mpe nyonso yina beno me sala samu na kusala kisika yayi yina ya kele, na mutindu ya ntungulu, yinzo ya Mfumu. Mpe ntangu yayi mu—mu zola kutuba bampova yayi. Ntangu yayi, yinzo, mutindu ya kele kitoko, na kati mpe na nganda. . .

¹¹ Semeki ya munu ya bakala, Junior Weber, vwanda kipe dyambu ya bumaso. Mu ke mona ve mutindu ya zolaka vwanda kima ya kulutula mbote na yina ya kele, ya kele kisalu ya kulunga.

¹² Mpangi-bakala yankaka yina kele awa, mu me kutanaka na bakala yayi ata fioti ve, yandi me tula systeme ya muningu. Kasi mu me mona ti na kati ya kivinga ya plat ya mutindu yayi, mu lenda kaka . . . Ya kele ve na makelele ya muningu. Bawu me tula yawu na plafond awa, na bisika ya mutindu na mutindu. Ata kisika yina mu ke telama, ya kele kaka mutindu mosi, beno me mona. Mpe konso kivinga me tungama na binzonzolo na kati ya yawu, mpe beno lenda yidika yawu mutindu nionso beno zola kuwa yawu. Ya kele, mu banza ti ya vwandaka diboko ya Nzambi ya Ngolo nyonso yina salaka bima yayi. Ntangu yayi kana . . .

¹³ Mfumu ya beto me pesa beto yinzo kisika beto lenda sambila Yandi, na yina, pene ya bamvula makumi tatu. Beto bandaka na poto-poto, bampusu ya mabaya, mpe beto vwandaka ya kuvwanda awa pene-pene ya bambabula ya ntama ya makala. Mpe mfumu ya kisalu, Mpangi Wood, mosi ya bawu, mpe Mpangi Roberson, vwandaka tuba na munu ti kisika ya vwandaka na makunzi, mpe kisika ba vwandaka tula bambabula yina ya ntama ti ba-madrier vwandaka luta kuna, yawu bakaka tiya mpe yokamaka, kati-kati ya metre mosi to metre mosi. Samu na yinki yawu nionso yokamaka ve, kaka Nzambi yina vwandaka keba yawu. Mpe na yina ya bakaka tiya, mpe bizitu nyonso ya tabernacle vwandaka na zulu ya yawu, samu na yinki ya me kubwa ve, kaka diboko ya Nzambi. Ntangu yayi muludi kele ya acier mpe ya kuvwanda na zulu ya ntoto, ya kutunga ngolo.

¹⁴ Ntangu yayi mu banza ti ya kele kisalu ya beto na kusala na kati ya mbote, na nzila ya lemvo ya Nzambi, na kuvwanda ya kifuluka mingi na Nzambi ti ya beto . . . Yayi ke vwanda kaka yinzo ya kitoko ve yina beto ke kwisa, kasi ti muntu nyonso yina ke kwiza kukota kumona kikalulu ya kitoko ya Yesu Klisto na kati ya muntu nyonso yina ke kwizaka. Bika yawu vwanda kisika ya busantu na Mfumu ya beto, bantu ya busantu. Na yina, ata ti ntungulu kele kitoko, yina kieleka beto ke sepela na yawu, kitoko ya dibuundu kele kikalulu ya bantu. Mu ke na kivuvu ti ya ke vwanda ntangu nyonso yinzo ya Nzambi, ya kitoko.

¹⁵ Ntangu yayi, na kisalu ya mbiekolo ya ntete ya kutula ditadi ya nsongi, vision mosi ya nene kwisaka. Mpe ya kele ya kusonika na kati ya ditadi ya nsongi, na suka yina mu biekaka yawu.

¹⁶ Mpe ya lendaka vwanda beno vwandaka kukiyufula, na mwa ntangu fioti me luta, samu na yinki mu vwandaka baka ntangu ntete mu basika. Kisalu ya munu ya ntete, na yina mu me kota na dibuundu ya malu-malu, mu vwanda me kwelisa ntwenya ya bakala mpe ya kento yina vwandaka na bureau ya munu. Bika ya vwanda kifwanikisu, ti mu ke vwanda longi ya kukwikama na Klisto, samu na kukubika Kento ya makwela samu na nkinzi ya Kilumbu yina.

¹⁷ Mpe ntangu yayi beto sala mutindu beto salaka na mbandukulu. Ntangu beto bandaka na mbiekolo ya ntete ya

dibuundu, Mu wandaka kaka ntwenya ya bakala mpe, oh, mu banza pene ya bamvula makumi zole na mosi, bamvula makumi zole na zole ntangu beto tulaka ditadi ya nsongi. Ya wandaka ntete mu kwelana. Mpe mu ke zolaka ntangu nionso kumona kisika kuvwanda ya kuyilama mbote, samu na Nzambi . . . samu na kusambila Nzambi, beno me mona, na bantu ya Yandi. Mpe beto lenda sala yawu kaka, ve na yinzo ya kitoko, kasi na luzingu ya busantu kaka kele mutindu beto lenda sala yawu.

¹⁸ Mpe ntangu yayi, ntete beto bieka, mwa kisambu ya mbielokolo, beto tanga mwa Masonuku, mpe beto pesa dibuundu na Nzambi. Mpe kuna mu kele na mwa . . . Mu ke na Nsangu samu na kumwangisa nsangu, na suka yayi, samu na kutunga Nsangu ya munu yina ke na kwiza.

¹⁹ Mpe, na nkokila yayi, mu zola kubaka kapu ya 5 ya Apocalypse, yina ke vukisa, ba—bansungi sambwadi ya dibuundu, na Bidimbu Sambwadi. Ti mu . . . Na yina beto ke . . .

²⁰ Na kilumbu ya ntete na nkokila ke vwanda munati mpunda ya mpembe. Na kilumbu ya zole na nkokila . . . Munati mpunda ya ndombe, mpe kulandila, minati-mpunda yiya. Na manima ya ke vwanda kuzibuka ya Kidimbu ya Sambanu.

²¹ Na yina na Lumingu na suka, na Lumingu ke kwisa na suka, kana Mfumu zola . . . Beto ke mona yawu na ntwala, beto zabisa yawu na ntwala. Ya lendaka vwanda, na suka ya Lumingu ke kwisa, beto ke na lukutakanu ya bisambu samu na bambevo na yinzo yayi.

²² Mpe na manima na Lumingu na nkokila, beto ke sukisa na . . . Bika ti Mfumu kusadisa beto na kuzibula Kidimbu ya Sambwadi, kisika ya kele kaka na nzila ya nkufi. Mpe Yawu me tuba mutindu yayi, “Ya wandaka swi na Mazulu ngunga mosi na ndambu,” na manima ya pima yina.

²³ Ntangu yayi, mu zaba ve yinki Bidimbu yayi zola kutuba. Mu me kuma na nsuka ya rouleau ya munu, samu na bawu, ntangu yankaka mingi kati ya beno kele na suka yayi. Beto kele na mabanza ya dibuundu yina me talisama na nzila ya muntu, kasi yina ke simba Yawu ata fioti ve. Mpe kana beno tala, Yawu fwana kwisa na nzila ya lutwadusu ya kimpeve. Yawu fwana vwanda Nzambi, Yandi mosi, kele Yina kaka lenda sala yawu, Mwana-dimeme.

Mpe na nkokila yayi kele Buku yango ya Mpulusu.

²⁴ Ntangu yayi, na yayi, kikuma mu ke na kusamuna ve balukutakanu ya bisambu samu na bambevo, to nionso yina, ya kele samu ti mu kele . . . Mu ke na kuvwanda na mwa bankundi, mpe mu ke na kupesaka konso minuti ya ntangu ya munu na kulongoka mpe kusambila. Mpe beno zaba vision yina mu kuzwaka kaka na ntwala ya kukatuka mpe kukwenda na wesete, samu na Bawanzio sambwadi yina kwizaka na kupumbukaka. Na yina, beno ke bakula yawu fioti na ntwala.

²⁵ Na yina awa, ntangu yayi, na kati ya kivinga, mu banza ti beto fwana, na yayi, kana ba me biega yawu, to ba ke biega yawu na mwa ntangu fioti, samu na kusambila Nzambi, beto fwana keba yawu mutindu yina. Beto lendaka sumba ve to kuteka ata fioti ve na kati ya yinzo yayi. Beto lendaka sala ata fioti ve mumbongo mosi na kati ya yinzo yayi awa. Ya lendaka ve kusalama awa, yina kele, mutindu kupesa muswa na milongi na kukwisa mpe kuteka babuku mpe nionso. Ata nionso yina ya kele, ya kele na bisika yankaka ya kusala yawu. Na yina, beto—beto lendaka ve kusumba mpe kuteka na yinzo ya Mfumu ya beto. Ya fwana vwanda kisika ya—ya kusambila; ya santu, ya kukipesa na lukanu yina. Beno me mona? Ntangu yayi, Yandi me pesa beto kisika ya mbote. Beto pesa yawu na Yandi, mpe beto kukipesa beto mosi, na yawu, na Yandi.

²⁶ Mpe ntangu yayi yayi ke monana mwa ngolo, kasi, ya kele ve kisika ya kutalana. Ya kele kisika ya kusambila. Beto lendaka ve kuniunguta mpova mosi na kati awa, na ngaanda ya kusambila, mosi na yankaka, kaka kana ti ya kele kieleka mfunu. Beno me mona? Beto fwana kuvukana ata fioti ve na bimvuka. Beto fwana ata fioti ve kukima mbangu na kati ya kivinga, to kubika bana ya beto kukima mbangu na kati ya kivinga. Mpe na kusalaka mutindu yina, samu ti mutindu yina beto me banza kusala, ntama mingi ve, beto me tunga yawu samu na kulandila bima yayi nionso. Ntangu yayi, beto me tula yawu awa. Samu, bantu mingi kele banzenza. Bantu ya tabernacle zaba yayi, ti yinzo ke biekama samu na kisalu ya Ngolo nionso. Na yina, na kubiekaka beto mosi, beto bambuka moyo, ntangu beto ke kota na kivinga yango, beto vwanda swi, mosi na yankaka, mpe kusambila Nzambi.

²⁷ Kana beto zola kwenda kutalana mosi na yankaka, ya kele na bisika beto lenda kwenda kutalana mosi na yankaka mutindu yina. Kasi, ata fioti ve, kutambula na kati ya kivinga, kisika beno lendaka ve kuwa kubanza ya beno mosi awa, mpe muntu mosi ke kota mpe zaba ve yinki kusala, beno me mona, ya kele na makelele mingi mpe nionso. Ya ke kaka kimuntu, mpe mu me monaka yawu na bayinzo-Nzambi tii kuna ya me sala munu mpasi mingi. Samu, beto ke kwisaka ve na kivinga ya Mfumu samu na kukutana mosi na yankaka. Beto ke kwisaka awa samu na kusambila Nzambi, na manima beto ke kwenda na bayinzo ya beto. Kivinga yayi me biekama samu na kusambila. Ntangu . . . Beno lenda telama kuna na ngaanda, kuzonza nyonso yina beno zola, ntangu nyonso yina kele kieleka mpe ya santu. Beno kwenda na yinzo mosi na yankaka. Beno kwenda talana mosi na yankaka. Kasi ntangu beno ke kota na kielo yina, beno vwanda swi.

²⁸ Beno ke kwisaka awa samu na kutuba na Yandi, beno me mona, mpe beno bika Yandi kutuba na beno. Mpasi ya yawu kele,

beto ke zonza mingi, kasi beto ke kuwa mingi ve. Na yina, ntangu beto ke kota awa, beto vingila na Yandi.

²⁹ Ntangu yayi, na tabernacle ya ntama, ya lendaka vwanda ve na muntu mosi yina kele awa na suka yayi yina vwandaka kuna kilumbu ya mbiokolo, ntangu Major Ulrich bulaka muziki. Mpe mu telamaka awa na manima ya bakulunsi tatu, samu na kubieka kisika yango. Mu vwandaka pesa muswa na muntu mosi ve. . . Ba-huissier vwandaka telama kuna na kielo, samu na kutala ti muntu mosi ve ke na kutuba. Ntangu, beno me manisa na kuzonza kuna na ngaanda. Beno me kota. Kana beno lombaka yawu, na pima nionso, beno ke kwisa na autel mpe beno ke sambila na pima nionso. Beno ke vutuka na kiti ya beno, beno ke zibula Biblia. Yina mfinangani ya beno ke sala, yina me tala yandi. Beno vwandaka ve na kima ya kutuba. Kana beno zola kuzonza na yandi, beno ke tuba, “Mu ke mona yandi na ngaanda. Mu kele na kati awa samu na kusambila Mfumu.” Beno ke tanga Ndinga ya Yandi, to beno ke vwanda swi.

³⁰ Mpe, na manima, muziki. Mpangi-kento Gertie, mu zaba ve kana yandi kele awa na suka yayi, to ve, Mpangi-kento Gibbs. Piano ya ntama, mu banza, vwandaka kuna na nsongi yayi, na mutindu mu ke bambuka moyo. Mpe yandi vwandaka bula na malembe nionso, “Kuna na kulunsi kisika Mvulusi ya munu kufwaka,” muziki mosi ya lembami mingi, ya kitoko mingi, mpe—mpe, na yina, tii ya ke kuma ntangu samu na kusalu. Mpe ntwadisi ya bankunga vwandaka telama mpe vwandaka twadisa dibuundu na bankunga zole to tatu. Mpe na manima kana ba vwandaka sepela na mwa solo, ba vwandaka yimba yawu. Kasi, ya vwandaka ve kima mosi ya makelele. Mpe na manima muziki vwandaka landila na kubula. Na yina ntangu mu kuwaka yawu, mu zabaka ti ya vwandaka ntangu ya munu ya kukwisa.

³¹ Ntangu mulongi ke kwisa na ntwala ya kimvuka ya bantu ke na kusambila, mpe ya ke na kupakulama ya Mpeve, beno kele ya kukangama na kuwa kima mosi na Mazulu. Yawu yina kaka kele na mfunu. Ya kele ve na mutindu ya kubasika na yawu. Kasi kana beno kota na mubulu, na yina beno—beno. . . beno kele—beno kele ya kuvwalangana mingi, mpe Mpeve kele ya kunionga; mpe beto zola yawu ve, ve. Beto zola kwisa awa samu na kusambila. Beto ke na bayinzo ya kitoko, yina mu ke tubila, kaka na mwa ntangu fioti, mpe nionso yina; na yinzo, sika wapi beto ke kwisa tala bankundi ya beto mpe beto ke nataka bawu. Yayi ke yinzo ya Mfumu.

³² Ntangu yayi, ya kele na bana ya fyoti, ntangu yayi, mwa ba-bébé ya fyoti. Ntangu yayi, bawu zaba kima yankaka ve. Bawu, mutindu kaka bawu lenda kuzwa yina bawu zola, kele kudila samu na yawu. Mpe bantangu yankaka ya kele samu na kunwa masa, mpe bantangu yankaka ba ke na nsatu ya bukebi. Mpe na yina beto me kukubika, na lemvo ya Nzambi, kivinga mosi samu na yawu. Ba me bokila yawu, na liste “kivinga ya bidilu,” kasi

ya kele kaka na ntwala ya munu. Ya kele, na nzonzolo yankaka, kisika bamama lenda keba ba-bébé ya bawu.

³³ Ntangu yayi, ya ke yangisa munu ata fioti ve, mu banza, awa na chaire. Mu banza ti mu ke kipe yawu ve, samu na kupakulama. Kasi ya ke na bantu yankaka me vwanda pene-pene, mpe ya ke niongisa bawu, beno me mona, mpe ba ke kwisaka awa samu na kuwa lukutakanu. Na yina bamama kele . . . Mwa bébé ya beno ke banda na kudila; beno lenda ve kusala mutindu yankaka. Mbote, kieleka, ya kele . . . Beno fwana, beno fwana nata yandi. Mama ya kieleka ke zola kunata bébé ya yandi na yinzo-Nzambi, mpe yina ke diambu yina beno fwana sala.

³⁴ Mpe beto kele na kivinga mosi kuna kisika beno lenda mona bansongi nionso ya yinzo, kivinga nionso; mpe na haut-parleur mosi kuna, yina beno lendaka yidika mutindu beno me zola; na mwa ba-toilette kuna na nsuka, mpe mwa lavabo, mpe nionso yina samu na kusadisa mama. Na bakiti mpe nyonso, beno lenda kuvwanda; kisika ya kusoba bébé ya beno, kana beno zola kusala yawu, mpe nionso yina me fwana kuna. Ba me kukubika nionso.

³⁵ Mpe na yina, bantangu mingi, bana ya bamvula ya kati-kati mpe bantangu yankaka bambuta, ke banda . . . Beno zaba, bantwenia ke sobisa bambongo, to ke sekisa, to kima mosi, na yinzo-Nzambi. Ntangu yayi, beno kele bambuta mingi samu na kuzaba ya kulutila yina. Beno me mona? Beno fwana zaba ya kulutila yina. Beno me mona? Beno fwana kwisa awa ve . . . Kana beno zola kuvwanda bakala ya kieleka kilumbu, mpe beno kudiatisa dibuta samu na Kimfumu ya Nzambi, na yina beno banda yawu na mbandukulu, beno me mona, mpe—mpe beno zinga mbote mpe beno sala mambu ya mbote, mpe ntangu yayi, kieleka.

³⁶ Ntangu yayi, ba-huissier ke telama na bansongi ya kivinga, mpe nyonso yina. Mpe kana ya kele na mubulu, ba me—ba me tuma bawu, mutindu kisalu ya bawu, mpe ba-administrateur ke vwanda awa na ntwala, ti kana muntu mosi ke tambula mbote ve, ba me kuzwa lutumu na kutuba na muntu yango na kuvwanda swi.

³⁷ Na yina, kana bawu kele ve na buzitu yina, ya ke vwanda mbote ti muntu yankaka kubaka kiti, samu ti ya kele na muntu yina zola kuwa. Ya kele na muntu yina me kwiza samu na lukanu yina, samu na kuwa. Mpe yawu yina beto kele awa, ya kele samu na kuwa Ndinga ya Mfumu. Mpe na yawu bantu nionso zola kuwa Yawu, mpe bawu zola yawu kuvwanda kaka na pima nionso mutindu bawu lendaka vwanda. Na pima nionso; ya zola kutuba, kukondwa makelele mpe mubulu.

³⁸ Ya kieleka, muntu mosi ke sambila Mfumu, yawu yina ba ke vingila. Ya ke mutindu yina ya lendaka vwanda. Ya kele samu na yina beno kele awa, kele kusambila Mfumu. Kaka kana beno zola kusambila Nzambi, to kuboka, beno kwenda kaka na ntwala,

beno me mona, samu ti ya kele samu yina beno kele awa, beno me mona, kasi, ya kele kusambila Mfumu na mutindu ya beno ya kusambila. Kasi ya kele ve na muntu yina ke sambila Mfumu na yina beno ke zonza mpe ke sobisa bambongo, mpe beno ke sadisa muntu yankaka na kukwenda ntama na kusambila Mfumu, beno me mona, na yina beto zaba ti ya ke mbote ve. Mpe beto zola sala ti yawu kuvwanda ntumunu na kati ya dibuundu ya beto, ti na kati ya dibuundu ya beto, ti, samu na ntungulu yayi, dibuundu yayi ke biekama samu na Kimfumu ya Nzambi mpe samu na kulonga ya Ndinga. Beno sambila! Beno kembila! Ya kele samu na yina beno fwana kwiza awa, samu na kusambila, kuna.

³⁹ Mpe na yina kima yankaka, ntangu kisalu me kuma na nsuka, na bantangu mingi na kati ya mabuundu. . . Mu—mu banza ve ti ya kele mutindu yina awa, samu. . . Mu ke vwandaka ntangu nyonso me kwenda, beno me mona, samu ti mu ke vwandaka me kwenda.

⁴⁰ Ntangu nionso, ata mpe na balukutakanu yankaka, kupakulama ke kwisa, mpe ba vision ke monika. Mpe mu ke lembaka mingi, mpe mu ke kwenda na bureau. Mpe ya lendaka vwanda Billy, to mwa bantu yankaka kele kuna, ke nata munu na yinzo, mpe ke bika mu pema mwa ntangu fioti, tii kuna mu ke basika na yawu, samu ti ya ke tulaka misisa ya munu na kidi-kidi.

⁴¹ Mpe na yina mu me monaka mabuundu, na yina, kisika bana vwandaka na muswa ya kukima mbangu na kati ya yinzo-Nzambi, mpe—mpe bakuluntu vwandaka ya kutelama kuna mpe vwandaka bokilana mosi na yankaka, na kati ya kivinga. Yina kele mutindu ya mbote ya kubebisa kisalu yina me kubama samu na nkokila, to konso ntangu yina ya kele. Beno me mona?

⁴² Kaka na ntangu lukutakanu me kumana, beno basika na kivinga. Na ntangu yina, beno me manisa na kusambila. Na yina beno basika mpe beno zonza na mosi na yankaka, mpe nyonso yina beno zola kusala. Kana beno ke na kima yina beno zola tuba na muntu, samu na ku—kutala bawu, mbote, kana beno ke kwenda na bawu, to na yinzo ya bawu, to nionso yina ya kele, kasi beno sala yawu ve na kati ya yinzo yayi. Beto bieka yayi na Nzambi. Beno me mona? Yayi kele kisika ya Yandi ya kukutana, kisika beto ke kutana na Yandi. Beno me mona? Mpe Musiku ke basikaka na yinzo-Nzambi, ya kieleka. Mpe mu—mu ke kwikila ti yina ke sepelisa Tata ya beto ya Mazulu.

⁴³ Mpe na yina ntangu beno ke kwiza, mpe beno ke tala ti makabu me banda na kubwa na kati ya beno. . . Ntangu yayi, bambala mingi ya. . . mu ke tula kivuvu ti ya ke vwanda ata fioti ve awa; kasi, na ntangu bantu kele na dibuundu ya malu-malu, kima ya ntete beno zaba, dibuundu me kuma ya kufuluka na amidon. Beno ke zola ve kuvwanda mutindu yina. Na manima ya nionso, yayi kele kisika ya kusambila. Yayi kele yinzo ya Mfumu.

Mpe kana makabu ya kimpeve kubanda na kukwisa na kati ya beno . . .

44 Mu me kuwa, ti tuka mu me kwenda, ti bantu me katuka na bizunga ya mutindu na mutindu ya yinsi samu na kukwisa kuzinga awa, samu na kusala yayi yinzo ya bawu. Mu ke vutula matondo, mu ke vutula matondo na Nzambi, ti, mu ke kwikila ti . . .

45 Na suka yina ntangu mu biekaka mpe mu tulaka ditadi yina ya nsongi kuna, mutindu mu vwandaka ntwenya ya bakala, mu sambilaka samu na yawu kuzinga samu na kumona Nkwizulu ya Yesu Klisto. Mpe ntangu mu salaka yawu, na ntangu mu vwandaka na mfuka ya mafunda ya ba-dollars, mpe kuna . . . Ba lendaka baka dikabu na dibuundu na kitezo yayi mpe kuzwa ba-cents makumi tatu to makumi yiya, mpe bamfuka ya beto vwandaka pene ya ba-dollar nkama mosi na makumi tanu, bankama zole na ngonda mosi. Wapi mutindu mu zolaka sala yawu? Mpe mu zabaka ti mu vwandaka sala, mpe mu zolaka kufuta yawu. Mu . . . Bamvula kumi na sambwadi ya ki-pasteur kukondwa kubaka centime mosi, kasi na kupesaka nyonso yina mu vwandaka na yawu, munu mosi, na ngaanda ya luzingu ya munu; mpe nyonso yina vwandaka kota na kati ya mwa sanduku kuna na manima, vwandaka samu na Kimfumu ya Nzambi.

46 Mpe bantu pesaka profesi mpe zabisaka na ntwala ti pene ya mvula mosi ya ke kuma garage. Satana mekaka na kukatula yawu na beto na ntangu mosi, na muyibi na nzila ya nkanu. Bakala mosi tubaka ti yandi lwalaka na dikulu ntangu yandi vwandaka sala awa, mpe yandi salaka kima mosi ve, na manima . . . mpe yandi fundaka beto mpe zolaka botula beto tabernacle. Mpe na kati ya basabala mu bikanaka ngwi na kisika ya yawu. Kasi ata ti mubulu nionso mpe bansamunu nionso, mpe yina bawu vwandaka tuba, ya me telama bubu yayi mutindu mosi ya bayinzo ya kitoko mingi mpe mabuundu ya kulutila mbote yina kele na Etats-Unis. Ya kieleka.

47 Kubanda awa Ndinga ya Nzambi ya moyo me kwenda, na yinza ya muvimba, beno me mona, na yinza ya muvimba; mpe ya me sukisa ve na kusala selekele ya Yawu na globe ya muvimba, na bayinsi nionso na nsi ya Mazulu, mutindu beto zaba, bisika nionso mpe na yinza ya muvimba. Beto ke vutula matondo samu na yayi. Beto ke vutula matondo samu na yayi.

48 Mpe ntangu yayi ti beto ke na kisika ya kuzinga, muludi na nsi ya yintu ya beto, dibuundu ya bunkete, ya mbote na kuvwanda, beto kukibieka beto mosi ya malu-malu na kisalu, mpe kukipesa beto mosi na Klisto.

49 Mpe Mpangi Neville, mpangi ya beto ya bakala ya lukumu, pasteur ya kieleka, kisadi ya Nzambi ya moyo. Nionso yina bakala yayi me zaba samu na Nsangu, yandi ke kangama na Yawu, na nionso yina yandi kele na yawu. Ya kieleka. Yandi kele

muntu ya lutondo. Yandi kele fioti na boma, to, na boma ve; mu zola tuba mutindu yina ve. Kasi yandi ke na lutondo mingi, kulutila mingi, yandi ke kaka mwa fioti, ke tubaka ngolo mingi ve, beno zaba, mutindu samu—samu na kutuba kima yina kele ngolo mpe yina ke lwadisa, to, “Beno vwanda,” to, “Beno vwanda swi!” Mu—mu me landilaka yawu, mpe me kuwaka ba-bande ya yandi.

⁵⁰ Kasi yawu ke salamaka mingi ti mu lendaka sala mutindu yina. Na yina mu—mu. . . Mpe mu—mu zola ti beno bambuka moyo na bampova ya munu, beno me mona. Mpe yayi nionso ke na kubakamaka na bande, beno me mona. Nionso ke na kubakamaka na bande. Mpe, pardo, bika konso diakre kutelama na kisika ya yandi ya kusalu, mpe beno bambuka moyo ti beno ke na nsi ya lutumu ya Nzambi, samu na kusimbisa kusalu yina ya santu. Beno me mona? Konso administrateur, mutindu mosi. Pasteur fwana kulonga. . .

⁵¹ Ya kele ve kisika ya pasteur na kutuba yawu. Ya kele ba-administrateur. . . to, mu zola kutuba ba-diacre, samu ba kele bapulusu ya dibuundu. Ya kele, kana bankwelani ya bantwenia ke kwiza na kati mpe ke banda na kubula piololo, mpe, beno zaba, mutindu bawu ke salaka ntangu nyonso, to kima ya mutindu yina, na balukutakanu, to kubasika kuna. Mpe mama ke tinda mwana ya yandi ya kento awa, mpe yandi ke basika na kimpumbulu mosi, mpe ke tambula na yandi kuna na ditoma, mpe mama ya yandi ke banza ti yandi kele na yinzo-nzambi, mutindu yina. Diacre fwana kutala yawu. “To nge ke kota awa mpe nge ke vwanda, to mu ke baka nge na ditoma ya munu mpe mu ke nata nge na yinzo na mama ya nge.” Beno me mona? Beno, beno fwana sala yawu.

⁵² Beno bambuka moyo, zola ke sungikaka, beno me mona, ntangu nyonso. Zola ya kieleka ke sungikaka, na yina beno fwana lenda kundima kusungika. Mpe, bamama, zaba ntangu yayi ti ya kele na kisika kuna samu na ba-bébé ya beno. Beno bana ya fyoti zaba ti beno fwana ve kukima mbangu na kati ya kivinga. Beno me mona? Mpe beno bakuluntu zaba ti beno fwana ve kutuba mpe kusolula na kati ya kivinga. Beno me mona? Beno sala yawu ve. Ya kele yimbi. Ya ke sepelisa ve Nzambi.

⁵³ Yesu tubaka, “Ba sonikaka, yinzo ya Munu ke vwanda yinzo ya kusambila, ya bisambu. Na nganda. . . Ba ke bokilaka yawu yinzo ya bisambu, na bayinsi nionso!” Mpe ba vwandaka kusumba mpe kuteka, mpe Yandi salaka fimbu ya bansinga mpe basisaka bantu na kati ya kivinga. Mpe ya kieleka beto zola ve ti yawu salama na kivinga yayi awa. Na yina, beto pesa baluzingu ya beto, dibuundu ya beto, bisalu ya beto, kusalu ya beto, mpe nionso yina kele ya beto, samu na Kimfumu ya Nzambi.

⁵⁴ Ntangu yayi, ntangu yayi mu zola kutanga mwa Masonuku ntete beto kuzwa kisambu ya mbiekolo. Mpe—mpe, na yina,

ya kele kaka mbiekolo ya mbala ya zole, samu ti mbiekolo ya kieleka salamaka bamvula makumi tatu me luta. Ntangu yayi na . . . Na yina—na yina mutindu beto—beto me tanga Masonuku yayi mpe beto ke zonzila yawu na mwa ntangu fioti, mu ke na kivuvu ti Nzambi ke pesa beto balusakumunu ya Yandi.

⁵⁵ Mpe ntangu yayi ya vwandaka na kima yankaka yina mu zolaka tuba. Yinga. Kisika beto vwandaka na ba-magnétophone, mpe nionso yina, beto kele na kivinga ya mumesanu, kisika samu na bayina zola kubaka bande. Ba me vukisa bansinga na mutindu nionso, mpe nionso yina kuna, yina ke katuka mbala mosi kuna na micro ya ngudi, na kati kuna.

Ya kele na bivinga, ba-robe, nionso samu na kisalu ya mbotika.

⁵⁶ Mpe na yina kima mosi, bantu mingi ke kuwaka mpasi samu na munu, bantu mingi yina zaba kieleka Masonuku ve, samu na kuvwandaka na kulunsi na zinzo-Nzambi. Mu ke bambuka moyo na ntangu kima mosi salamaka awa samu na yawu. Mu vwandaka na bakulunsi tatu, mpe mpangi-bakala mosi vwandaka na kidi-kidi samu na yawu samu yandi kuwaka denominataion yankaka tubaka ti kulunsi vwandaka talisa malongi ya Catholique.

⁵⁷ Mu zola mwa longoki, to muntu mosi, to mwa Muklisto yina me butuka mbala zole, samu na kutuba ti ba-Catholique kele na dibanza ya kulunsi. Kulunsi ya Klisto ke talisaka ve malongi ya Catholique. Yina ke talisa Nzambi, Kimfumu. Ntangu yayi, basantu ke talisaka malongi ya Catholique. Beto ke kwikila ti ya kele na “Muvukisi mosi kati-kati ya Nzambi na muntu, mpe ya kele Klisto.” Kasi bantu ya Catholique ke kwikilaka na mivukisi ya mutindu nionso, mafunda ya bakento mpe babakala, mpe nionso yina; muntu nionso ya mbote ya Catholique, na kutala, yina ke kufwa, yandi ke kuma mulombi. Ntangu yayi, na kupesaka kikesa na Klisto ke talisa Yesu Klisto.

⁵⁸ Beno me zaba Baklisto ya ntete, landila masolo ya ntama ya dibuundu ya ntete, ba vwandaka lwata bakulunsi na mukongo ya bawu, bisika nionso ba vwandaka kwenda, samu na kutalisa mpe kukitalisa bawu mosi mutindu Baklisto? Ntangu yayi, bantu ya Katolika ke tubaka ti ya vwandaka bawu. Ya kieleka, bawu ke tubaka ti bawu vwandaka bayina ya ntete, kasi dibuundu ya Catholique vwandaka organisation ve na ntangu yina. Beno me mona? Kasi Baklisto vwandaka lwata kulunsi kuna. . . Beno me kuwaka bantu kutuba, “Mulwati-kulunsi.” Beno ke tala yawu na Catholique?

⁵⁹ Ya kele Dibuundu ya kieleka ya katolika, dibuundu nionso ya Mpeve-Santu ya yinza ya muvimba, ya kele kieleka. Beto kele bakatolika. Beto kele katolika ya ntete, katolika yina ke kwikilaka Biblia. Beno me mona? Bawu kele dibuundu, Catholique, organisation. Beto kele na kimpwanza na yawu.

Beto kele yina ke landila Malongi ya bantumwa. Beto kele yina ke landila mbotika ya Mpeve-Santu mpe bima nyonso yina Dibuundu ya ntete vwandaka simbisa, mpe dibuundu ya Katolika kele na ata mosi ve ya bawu. Beno me mona?

⁶⁰ Na yina, ba tulaka kulunsi awa, yina ba nataka, yina ba salaka na yinti ya olive yina Yesu sambilaka. Ya kele kulunsi yina me sala bamvula mingi, mpe ba pesaka munu yawu na Mpangi Arganbright. Mpe mu zola kubyeka yawu na dibuundu yayi.

⁶¹ Mpe mutindu ya kele ya kulunga, ti, yina me tula yawu kuna. Mu zaba ve nani ya vwandaka, yina me tula yawu na zulu awa na lweka ya munu—ya munu ya kikento. Yandi lemvokilaka muyibi yina vwandaka na diboko ya Yandi ya kibakala; yina kele munu.

⁶² Mpe kima yankaka ya ke talisa, mutindu yintu ya Yandi vwandaka ya kukulumusa, mutindu beno lenda mona mpasi ya Yandi. Muntu nionso yina kele . . . Yandi ke tala na zulu ya autel. Mpe Yandi ke na kuvingila beno awa, nsumuki, mpe Yandi ke tala na zulu ya beno. Na manima ba ke vwanda na mwa nsemo ya kuvwanda awa, ti ntangu lubokilu ya autel ke salama, nsemo ke sema na zulu ya yawu, ti ntangu bantu kele awa samu . . .

⁶³ Beno ke tuba, “Samu na yinki nge ke na nsatu ya yawu? Nge lendaka ve kuvwanda na kifwanusu.”

⁶⁴ Mbote, na yina, Nzambi yina mosi tubaka, “Nge ke yidika kifwanusu mosi ve,” Nzambi mosi yina tubaka, “Nge ke sala ba-chérubin zole mpe mapapu ya bawu ke kubwa kintwadi na zulu ya autel, mpe tula bawu na kiti ya kyadi kisika bantu ke sambilaka.”

Beno me mona, ya kele—ya kele, kukondwa lubakusu. Beno me mona?

⁶⁵ Na yina, yina kele dibanza ya kimpeve mpe mbala mosi me vwanda na kisika ya yawu ya kulunga. Mpe mu ke vutula matondo mingi na kuvwanda mosi na lweka ya diboko ya kibakala. Mu ke na kivuvu ti Yandi me lemvokila munu, samu munu, na yina me tala kuyiba kima mosi mutindu yayi, mutindu mu zaba, mu me salaka yawu ata fioti ve na luzingu ya munu; kasi mu me sadilaka ntangu ya Yandi mbote ve ti mutindu yina mu me yibaka. Mpe mu me sala bima mingi yina mu lendaka sala ve. Mpe mu ke vutula matondo na Nzambi, na suka yayi, ti Yandi me lemvokila masumu ya munu.

⁶⁶ Mpe ntangu yayi mu zola kutanga na Buku ya Ntete ya Ba-Chroniques 17, mpe mu ke tuba kaka pene ya minuti tanu na zulu ya kisalu ya mbiekolo, kusambila, na manima beto ke kota na Nsangu. Ntangu yayi, na Chroniques ya Ntete, kapu 17.

Ntangu yayi ya salamaka, mutindu David vwandaka na yinzo, yina David tubaka na profete Nathan, Tala, mu ke vwandaka na yinzo ya cèdre, kasi nzaza ya ngwisani ya MFUMU kele na yisi ya tenta.

Na yina Nathan tubaka na David, Sala nyonso yina kele na kati ya ntima ya nge; samu ti Nzambi kele na nge.

Mpe na mpimpa yina landaka, Ndinga ya MFUMU kwisaka na Nathan, na kutubaka,

Kwenda mpe tuba na kisadi ya munu David. . . Kwenda mpe tuba na David kisadi ya munu, (mu zolaka tuba), Mutindu me tuba MFUMU, Nge ke tungila munu ve yinzo samu na kuzinga:

Samu mu ke zingaka ve na yinzo kubanda kilumbu yina mu basisaka Israel tii bubu yayi; kasi mu me zingaka na tenta mosi na tenta yankaka, na tabernacle mosi na yankaka.

Na yina mu me tambula na Israel nionso, mu me tubaka mpova mosi na bazuzi ya Israel, yina mu pesaka lutumu na kudisa bantu ya munu, na kutubaka, Samu na yinki beno me tungila munu ve yinzo . . . ?

Ntangu yayi nge ke tuba mutindu yayi na . . . David, Mutindu me tuba MFUMU ya basoda, mu bakaka nge kuna na manima paturage, mpe na kulandaka mameme, ti nge ke vwanda mfumu na zulu ya bantu ya munu ya Israel:

Mpe mu me vwanda na nge bisika nionso nge vwandaka tambula, mpe mu me katula . . . bambeni ya nge na ntuala ya nge, mpe me kumisa nkumbu ya nge mutindu nkumbu ya . . . bantu ya nene yina kele na ntoto.

⁶⁷ Mu ke zola kutuba, na kisika yayi, ti—ti David monaka kima mosi yina beto monaka. David tubaka, “Ya kele mbote ve ti beno bantu me tungila munu yinzo ya cèdre, mpe sanduku ya ngwisani ya Nzambi ya munu kele dyaka na nsi ya batenta.” Yina vwandaka bampusu yina ba tungaka kintwadi, ya mameme mpe baniama. Yandi tubaka, “Ya kele ve mbote samu na munu na kuvwanda na yinzo ya mbote, mpe nzaza ya ngwisani ya Nzambi ya munu ke vwanda na kati ya tenta.” Na yina, Nzambi tulaka na zulu ya ntima ya yandi samu na kutunga tabernacle.

⁶⁸ Kasi, David, na kuvwandaka muntu ya—ya zola mpe ya kupesama na Nzambi, dyaka yandi mwanngisaka menga ya kulutila mingi. Na yina yandi tubaka . . . David, na kuzonzaka yayi na ntuala ya profete ya nsungi yina, yina vwandaka Nathan. Mpe Nathan, na kuzabaka ti Nzambi zolaka David, yandi tubaka, “David, sala nyonso yina kele na kati ya ntima ya nge, samu ti Nzambi kele na nge.” Wapi mutindu ya nsamunu! “Sala nyonso yina kele na kati ya ntima ya nge, samu ti Nzambi kele na nge.” Mpe na mpimpa yina mosi . . . Na kulakisaka zola ya David na zola ya Nzambi.

69 Mpe kuna kumona, na mpimpa yina mosi, na kuzabaka ti yandi vwandaka na foti, ti yandi vwandaka ve na muswa ya kusala yawu, Nzambi vwandaka na lemvo mingi na kwiza mpe kuzonza na Nathan. Mpe mu ke zolaka ntangu nionso bandinga yayi, “Kwenda tuba na Nathan ya Munu. . . Kwenda tuba na David kisadi ya Munu, ti, ‘Mu me baka nge na manima ya paturage.’” Kaka, yandi vwandaka kima mosi ve.

70 Mpe mu—mu ke zola kutula yawu awa, na mwa ntangu fioti. “Mu bakaka nge na kima mosi ve, mpe mu—mu—mu me pesa nge nkumbu mosi. Nge me kuzwa nkumbu mutindu bantu ya nene yina kele na ntoto.” Mpe mu ke zola kusadila yawu na—na kingenga, kasi samu na kubasisa kima mosi. Mu vwandaka banza ti. . .

71 Mwa bamvula fioti me luta, mu vwandaka ya kutelama na mbanza awa, mpe ata muntu mosi ve vwandaka kukipe munu. Muntu mosi ve vwandaka zola munu. Mpe mu vwandaka zola bantu, kasi muntu mosi ve zolaka munu, samu na yina vwandaka dibuta ya munu. Mu ke kondwa ve luzitu na mama ya munu ya ntalu mpe tata ya munu.

72 Wapi mutindu mu zolaka ti mama kuzinga diaka samu na kutambula na kati ya yayi, na suka yayi. Bantu mingi ya ntangu ya ntama yina me tulaka mbongo ya bawu samu na kutunga yawu awa, mu banza Nzambi, na suka yayi, ke bika bawu kutala na balustrade.

73 Kasi dibuta ya Branham vwandaka ve na lukumu ya mbote na kizunga awa, samu na kikalulu ya kunwa malafu. Muntu ve vwandaka kukipe munu. Mpe mu ke bambuka moyo ti mu tubaka na kento ya munu ntama mingi ve, mu ke bambuka moyo ti mu—mu lendaka ve kuzwa muntu mosi kusolula na munu. Muntu ve vwanda kipe munu. Mpe ntangu yayi beno fwana bumbama, samu na kupema fioti.

74 Mpe ntangu yayi Mfumum me pesa beto kisika yayi ya nene, mpe—mpe bima yayi ya nene yina Yandi salaka. Mpe Yandi pesaka munu. . . Na nganda ya nkumbu ya yimbi, Yandi pesaka munu nkumbu mutindu ya bantu ya nene. Mpe Yandi ke katula bambeni ya munu nionso bisika nionso mu me kwendaka. Kima mosi ve me telemaka na ntuala ya Yawu, bisika nionso Yawu me kwendaka. Kasi, mpe mu ke vutula matondo mingi samu na yawu.

75 Mpe wapi mutindu mu lendaka zaba; munu mwana-bakala ya fioti na bilele ya kubeba awa, kuluta babala-bala zole to tatu na kisika yayi awa, ya vwandaka na lukolo Ingramville, na yina mu vwandaka muntu yina ba vwandaka kuseka na lukolo, samu mu vwandaka muntu ya mpasi, mpe vwandaka tambula na potopoto ya ntama? Wapi mutindu mu zolaka zaba ti na kati ya kiziba yina vwandaka na nkuna ya lis yina zolaka basika mutindu yayi? Mpe wapi mutindu mu me zaba, ti, muntu ve vwandaka zonza

na munu, mpe diaka Yandi zolaka pesa munu nkumbu yina ba ke zitisa na kati ya bantu ya Yandi?

⁷⁶ Mpe, ntangu yayi, David vwandaka ve na muswa ya kutunga tempelo. Yandi zolaka sala yawu ve. Kasi Yandi tubaka, “Mu ke vumbuka na nkuna ya nge, mpe yandi ke tunga tempelo, mpe tempelo yina ke vwanda tempelo ya kukonda nsuka. Mpe na zulu ya mwana ya nge, mwana ya David, ke vwanda kimfumu ya kukonda nsuka; yandi ke yala.” Salomon, mwana ya David na kimuntu, na ngolo ya yandi ya kimuntu, tungaka yinzo samu na Mfumu, tempelo.

⁷⁷ Kasi ntangu Nkuna ya kieleka ya David kwisaka, Mwana ya David, Yandi tubaka na bawu ti ya ke vwanda na ntangu yina ya ke vwanda ve na ditadi mosi yina ke bikana na zulu yankaka, na tempelo yina. Kasi Yandi mekaka na kutalisa bawu na tempelo yankaka.

⁷⁸ Jean, mumonikisi, kuna na Buku ya Apocalypse, yandi monaka Tabernacle yayi. Apocalypse 21, yandi monaka, “Tempelo ya malu-malu ke na kwisa, ke kulumukaka na Mazulu, me kubama mutindu kento ya makwela me kubama samu na bakala ya yandi. Mpe Ndinga mosi basikaka na Tempelo, tubaka, ‘Tala, Tabernacle ya Nzambi kele na bantu, mpe Nzambi ke vwanda na bawu, mpe ba ke kusuna masa ya meso ya bawu nionso na meso ya bawu. Mpe ya ke vwanda dyaka ve na nzala, ata kyadi ve, ata mpassi to lufwa ve; samu ti bima ya ntama me luta.’”

⁷⁹ Na yina Mwana ya kieleka ya David, mutindu beto ke mona na baleso yayi ke kwisa na sabala yayi, na yina ke kwisa na Tempelo ya Yandi, Tempelo ya Nzambi, Tabernacle ya kieleka yina Yandi kwendaka samu na kutunga ntangu yayi. Na yina, Yandi tubaka, na Jean 14, “Na Yinzo ya Tata ya Munu ya ke na bisika mingi ya kuvwanda, mpe Mu ke kwenda . . .” Yinki Yandi zolaka tuba na yawu? Yawu me kubama na ntuala. “Mpe Mu ke kwenda samu na kuyidika Kisika samu na beno, mpe ke vutuka, samu na kubaka beno na Munu.” Mpe, ya kieleka, beto zaba ti ya ke vwanda na Nsungu ya nene yina ke kwisa. Mpe Nkuna ya kieleka ya David ke baka Kiti ya kimfumu, yina kele Yesu Klisto, mpe kuna ke yala na zulu ya Dibuundu, mutindu Kento ya Yandi ya makwela, na Yinzo na Yandi, mpe na zulu ya makanda kumi na zole ya Israël, na kati ya Seko nyonso.

⁸⁰ Mpe mwa bisika yayi; mutindu David, lendaka tunga ve Tabernacle ya kieleka ya Nzambi, samu ti yandi vwandaka ve ya kukubama na kusala yawu. Ya vwandaka ve na kima yina yandi zolaka sala. Yandi vwandaka muntu yina ke kufwa, mpe yina mwangisaka menga. Mutindu mosi ya kele bubu yayi, samu na beto, beto kele ve ya kukubama samu na kutunga Tabernacle ya kieleka ya Nzambi. Ya kele kaka na Mosi yina lenda sala yawu, mpe Yawu kele na kati ya ntungulu ya Yawu ntangu yayi.

⁸¹ Kasi mwa tabernacle yayi, mutindu tempelo yina Salomon tungaka samu na Yandi, mpe mutindu bayankaka, ya kele kaka bisika ya bantangu fioti ya kusambila tii ntangu ke kwisa ntangu ba ke tula Tabernacle ya kieleka na zulu ya ntoto. “Mpe ludedomo ke yala bisika nionso. Mpe ya ke vwanda dyaka ve na mawa.” Ya ke vwanda ve na matanga ba ke longi na kati ya Tabernacle yina. Ya ke vwanda diaka ve na makwela, samu Makwela ke vwanda Makwela ya nene samu na Seko. Wapi ntangu ya ke vwanda!

⁸² Kasi beto baka lukanu na kati ya ntima ya beto, bubu yayi, ti samu na kubambuka moyo mpe na kuvingilaka Tabernacle yina ke na kukwiza, ti beto ke vwandaka kieleka na kikalulu ya Mpeve ya Yandi, ti beto ke sambila na kisika yayi mutindu beto vwandaka na Kisika yina yankaka, na kuvingilaka Kisika yina ke kwisa.

⁸³ Ntangu yayi beto telama, mpe na yina mu ke tanga Masonuku ya Santu.

Mpe mu monaka mazulu ya malu-malu mpe ntoto ya malu-malu: samu ti zulu ya ntete mpe ntoto ya ntete vwandaka me luta; mpe ya vwandaka dyaka ve na mubu.

. . . Munu Jean monaka mbanza ya santu, Jérusalem ya malu-malu, yina ke kulumuka na Nzambi na mazulu, yina ba me yidika mutindu kento ya makwela samu na bakala ya yandi.

Mpe mu kuwaka . . . ndinga na zulu ke tuba, Tala, tabernacle ya Nzambi kele na bantu, mpe yandi ke zinga na bawu, mpe ba ke vwanda bantu ya yandi, mpe Nzambi yandi mosi ke vwanda na bawu, mpe ke vwanda Nzambi ya bawu.

Beto kulumusa bayintu ya beto ntangu yayi.

⁸⁴ Tata ya beto ya Mazulu, beto me telema na luzitu. Beto me telema na luzitu mpe na lukumu ya Santu. Mpe beto ke lomba Nge, Mfumu, na kundima dikabu ya beto, ti Nge me pesa beto lemvo, mbongo, samu na kuyidika kisika ya kusambila samu na Nge. Ya kele ve na kima, to ata kisika yina beto lendaka kuyidika na zulu ya ntoto, yina ke vwanda ya kulunga samu ti Mpeve ya Nzambi kuzinga na kati. Kasi beto ke pesa yayi na Nge mutindu kidimbu ya zola ya beto mpe bansatu ya Nge, Mfumu. Mpe beto ke tonda Nge samu na bima nionso yina Nge me sala samu na beto.

⁸⁵ Mpe, ntangu yayi, yinzo mpe ntoto me biekama kubanda ntama, samu na kisalu, mpe beto ke tonda Nge samu na balubambuku ya yina vwandaka. Mpe ntangu yayi, Mfumu Nzambi, mutindu vision me luta, bamvula me luta, na kusamunaka yayi, yina mu monaka kivinga ya ntama yina bantu vwandaka ntete na kati, mpe ba me yidika yawu mpe me kumisa

yawu ya malu-malu, mpe ba vutulaka munu kuna na simu yankaka ya nzadi.

⁸⁶ Ntangu yayi, Mfumu Nzambi, Mvangi ya zulu na ntoto, beto me telema mutindu bantu ya Nge. Beto me telama mutindu bantu ya Kimfumu ya Nge. Mpe munu mosi, mpe pasteur, mpe dibuundu, bantu, beto ke bieka yinzo yayi samu na kisalu ya Nzambi ya Ngolo nionso, na Nkumbu ya Yesu Klisto, Mwana ya Yandi, samu na kisalu ya Nzambi, mpe samu na lukumu mpe luzitu ya Nzambi. Mpe bika ti Nsangu ya mbote kutiamuka na kisika yayi ti Yawu ke sala ti yinza kukwisa na bansongi yiya ya yinza, samu na kulona Nkembo ya Nzambi ke basika na yawu. Mutindu Nge salaka na ntangu me luta, ti ya ke vwanda ya kulutila nene na bilumbu ke kwisa.

⁸⁷ Tata, beto ke kukipesa beto mosi na kisalu, na nzila ya Ndinga, na nyonso yina kele na kati ya beto. Mfumu, dibuundu mpe bantu, bawu ke kukipesa bawu mosi, na suka yayi, samu na kuwa Ndinga. Mpe beto, mutindu balongi, ke kukipesa beto mosi, “Na kulonga ya Ndinga; samu na kutatamana na ntangu ya mbote, to ve; na kusungikaka, na kusembaka na mvibudulu nionso.” Mutindu ya kele ya kusonika kuna na ditadi ya nsongi, kubanda bamvula makumi tatu me luta. Nge tubaka, “Ntangu ke kwisa wapi bantu ke zola diaka ve na kuwa Malongi ya kieleka, kasi ba ke kukutika nkonga ya milongi, landila bansatu ya bawu mosi, ba ke balula dikutu ya bawu na Kieleka; samu na kubaluka na masolo ya luvunu.” Mfumu, mutindu beto me meka na kutalisa Ndinga na bantu, bika ti beto vwanda ya kutwadisama na kimpeve mpe baka kikesa na kufwokula ngolo. Mfumu, mutindu ndambu ya Mpeve ke bula na kisika yango, bika Mpeve-Santu. . .

⁸⁸ Mutindu ya vwandaka na kilumbu ya mbiekolo ya tempelo, ntangu Salomon sambilaka; Mpeve-Santu, na mutindu ya Dikunzi ya Tiya mpe Dituti, kwisaka na kielo, ya vwandaka baluka na nziunga ya Chérubin, kwendaka na Kisika ya Santu mpe kuna kuzwaka kisika ya Yawu ya kupema. O Nzambi! Salomon tubaka, “Kana bantu ya Nge ke na kati ya mpasi konso kisika, beno tala na Kisika yayi ya Santu mpe beno sambila, na yina Nge ke kuwa na Zulu.”

⁸⁹ Mfumu, bika ti Mpeve-Santu, na suka yayi, kukota na konso ntima, moyo nionso yina me bieka yina kele awa. Mpe Biblia ke tuba, ti, “Nkembo ya Nzambi vwandaka nene mingi tii kuna balongi lendaka ata kulonga ve, samu na Nkembo ya Nzambi.” O Mfumu Nzambi, bika yawu vutukila diaka mutindu beto me kukipesa beto mosi na Nge, na dibuundu, na mbiekolo samu na kisalu. Mpe ya kele ya kusonika, “Beni lombi, mpe beni ke kuzwa.”

⁹⁰ Mpe beto me kukipesa beto mosi, na dikabu ya beto ya dibuundu, na suka yayi, na Nge, samu na kisalu, samu na

Bansemo ya ntangu ya nsuka, samu na Bansemo ya ntangu ya nkokila; ti beto lenda tula kivuvu mpe lukwikilu na kuvingilaka bantu yina ke na kuvingila Nkwizulu ya Bakala ya makwela, samu na kulwatisa Kento ya makwela na Nsangu ya mbote ya Klisto, samu na Mfumu Yesu samu na kuzwa. Yayi beto ke kukipesa, munu mosi, Mpangi Neville, mpe dibuundu, samu na kisalu ya Nzambi, na Nkumbu ya Yesu Klisto. Amen.

Beno lenda vwanda.

⁹¹ David tubaka, “Mu vwandaka na kiese ntangu ba tubaka na munu, ‘Beto kwenda na yinzo ya Mfumu.’” Mpe ti ya vwanda na beto, ti, ntangu ba ke zonza yawu, beto ke vwanda na kiese na kuvukana na yinzo ya Mfumu. Amen.

⁹² Ntangu yayi, na manima ya lukutakanu ya mbiekolo, mu me kuzwa ngunga mosi ntangu yayi.

⁹³ Mpe, ntangu yayi, beno bambuka moyo ntangu yayi na yina ba me biekaka beto; na luzitu, busantu, pima nionso na ntwala ya Mfumu, kusambila na ntwala ya Mfumu. Mpe beno vwanda kaka na buzitu mutindu beno lenda vwanda, na yinzo ya Mfumu. Mpe, ntangu yayi, mpe ntangu kisalu me kumana, mbala mosi na manima kisalu me kumana, beno basika na kivinga. Beno me mona? Mpe yina ke pesaka ntangu na mukengi na kukota awa mpe kusukula yawu samu na ntangu ke kwisa, mpe samu na kukubika yawu. Na yina ya ke vwanda ve na muvusu na yinzo ya Mfumu. Mpe . . . ? . . . Mu banza ti beno . . . kisika ke vwanda na bukente pene ya minuti kumi na tanu na manima ya bisambu. Beno vwanda kieleka bankundi. Beno pesana mbote na muntu nyonso, mpe beno bokila bantu nyonso na kuvutuka.

⁹⁴ Mpe—mpe beto ke vingila na kuzwa, na sabala yayi ke kwisa ntangu yayi, mosi ya balukutakanu ya kulutula mfunu na bayina me vwandaka ntete na tabernacle. Beto ke na kuvingila yawu. Ntangu yayi, mu—mu . . . ya me kwisa na munu kaka kima mosi . . . tii ntangu, na nsukinina na nsukinina, mazono na nkokila, na mwa bangunga ya fioti na suka, mu bandaka na kumona kima mosi. Na yina, mu ke na kivuvu ti yayi ke vwanda ntangu mosi ya nene, yina mu ke kwikila ti ya ke vwanda, kana Mfumu kusadisa beto. Ntangu yayi, awa, ntangu mu tubaka, “ntangu ya nene,” ntangu yayi, mu ke tubila kima mosi samu na yawu, na suka yayi. Beno zaba, yina muntu ke bokilaka “nene,” ntangu yankaka ya kele nene ve. Kasi yina Nzambi ke bokilaka “nene,” muntu ke bokilaka bulawu; mpe yina Nzambi ke bokila “bulawu,” muntu ke bokila nene. Na yina beto tula yawu na mabanza, beto teza Ndinga nionso.

⁹⁵ Ntangu yayi, balukutakanu kele yinda. Ba ke basisa bawu, samu ya kele kisalu ya mpasi, ya malongi mingi, ya kukipesa. Mpe mu ke kaka . . .

⁹⁶ Kisika mu kele, bantu ke mekaka kaka, mpe ke zolaka kudisa munu bima nyonso, kasi mu . . . Ba ke tubaka, “Mbote, nge me

zimbisa kilo mingi, Mpangi Branham, nionso.” Kasi mu me vwandaka ntangu nionso na lukutakanu. Mu fwana katuka awa na Lumingu ke kwisa na nkokila, samu na kubaka yankaka, na nswalu nionso, na Mexico. Na yina, ya kele kaka kima mosi ya mpasi. Na yina, kasi mu ke na kumekaka kaka na kubika kudya mingi, mpe—mpe kusala munu mosi kuvwanda ya kukubama.

⁹⁷ Mpe mu ke na kiese, na suka yayi, samu na kumona Mpangi Junior Jackson, mpe—mpe Mpangi Ruddell, mpe—mpe balongi ya mutindu na mutindu, mpe nionso yina, pene-pene. Nzambi sakumuna beno nionso.

⁹⁸ Ntangu yayi mu—mu zola ku—kutuba na beno na suka yayi na zulu ya dilongi yina mu ke na mwa banoti me sonika awa. Mpe mu zola kutanga ntete na Buku ya Esaie, kapu 53. Ntangu yayi, na yina beno ke na kuzibula yawu, mu ke zola kupesa luzabusu mosi, to zole.

⁹⁹ Ti, na nkokila yayi, mu zola tubila Buku *yayi*, kusadila Yawu samu na kuvukisa nsungi ya nsuka ya dibuundu na kuzibuka ya Kidimbu. Ntangu yayi, ya kele na mpwasika ya nene na kati kuna.

¹⁰⁰ Mpe, ntete, ntangu mu sukisaka bansungi ya dibuundu, Mu longaka mpe kuna na zulu ya basabala makumi sambwadi ya Daniel, mbala mosi mu me landa yawu, samu ya vwandaka ya kukangama. Mpe mu tubaka, “Ntangu yayi, kana mu baka Bidimbu Sambwadi, Mu fwana bika basabala makumi sambwadi ya Daniel yayi, samu na kuvukisa yawu na Bidimbu.” Kima mosi bikanaka na kuzibuka, mpe ya vwandaka kapu ya 5, ya Buku ya Sambwadi yina ba tulaka Kidimbu. Mpe beto ke baka yawu na nkokila yayi.

¹⁰¹ Beto zola kubanda na ntangu ya mbote na nkokila. Wapi mutindu samu na munu . . . Nge me tubila yawu dezia, nge me banda na ngunga ya mbote? [Mpangi Neville me tuba, “Yinga.”—Mu.] Wapi mutindu, muntu nyonso lenda vwanda awa pene ya ngunga ya sambwadi? [Dibuundu me tuba, “Amen.”] Mbote mingi. Beto banda lukutakanu ya mumesanu na ngunga ya sambanu na ndambu, nkunga ya lukutakanu, mpe mu ke vwanda awa na ngunga ya sambwadi. Mpe kuna na kati ya sabala beto ke banda na ngunga ya mbote. Mpe—mpe beto, ntangu yayi, beto me kwisa . . .

¹⁰² Ya kele ve na muntu yina ke zolaka kuyimba mutindu Baklisto. Beto zola kuyimba. Beto zola bima yina.

¹⁰³ Kasi ntangu yayi beto kele—beto kele na kima yankaka ntangu yayi. Beto kele—beto kele na kati ya Ndinga, beno me mona, na yina beto—beto vwanda kaka na Yawu ntangu yayi. Beto ke kwenda. Beto kele—beto kele na malongi. Mpe beno lenda bakula kidi-kidi ya nene yina kele na zulu ya munu, beno me mona, samu ti, kana mu longa kima ya yimbi, mu ke pesa mvutu samu na yawu. Beno me mona? Mpe na yina mu lenda

baka ve yina muntu mosi ke tuba. Mu fwana . . . Yawu fwana vwanda yina me twadisama na kimpeve. Mpe mu ke kwikila ti Bawanzio Sambwadi, Yina me simba Banzasi Sambwadi yayi, ke pesa yawu. Beno me mona?

104 Mpe ntangu yayi na Esaie, kapu 53 ya Esaie, nzila ya 1, to zole. Mu zola yufula kiuvu yayi.

105 Ntangu yayi, yayi ke tubila ve Bidimbu Sambwadi, ata fioti. Yayi kele kaka Nsangu. Na yina, mu zabaka ti mu zolaka vwanda na mbiekolo, mpe mu lendaka kota ve na Yawu samu mu ke kuzwa ntangu ve. Kasi mu banzaka, kaka samu na kisalu ya fioti ya mbiekolo, kisalu ya fioti ya lubambuku samu na dibuundu yayi, to mwa kisalu ya mbiekolo, mu zola kutuba, na yina bawu—bawu. . . zolaka vwanda ve na ntangu samu na kukota na yina mu zola kutuba, beno me mona, na kuzibuka ya Buku yayi, na yina mu ke sala yawu na nkokila yayi. Mpe ntangu yayi yayi kele kaka mwa kisalu ya fioti, ti, ya—ya ke vukana mbote na Yawu, ata mutindu yina.

106 Na yina, ntangu yayi, beno kuwa Ndinga nyonso. Beno simba Yawu. Mpe—mpe kana beno ke na kubaka Yawu na ba-bande, to kima yankaka, na yina beno bikana kaka na Malongi yina. Beno tuba kima mosi ve kasi yina bande me tuba. Beno tuba kaka kieleka yina bande me tuba. Beno me mona? Ntangu yayi, samu, mingi ya bima yina, beto ke bakula mingi na zulu ya yawu ntangu yayi, samu ba me bakula Yawu mbote ve. Beno me mona? Mpe beno vwanda kieleka, beno tuba kaka yina bande me tuba. Beno tuba kima yankaka ve. Beno me mona? Samu, mu ke tuba Yawu ve na munu mosi. Ya kele Yandi yina ke tuba Yawu, beno me mona. Mpe bambala mingi, muvusu, bantu ke telama mpe ke tuba, “Mbote, *Kingandi* tubaka ti Yawu zolaka tuba *yayi-mpe-yayi*.” Beno bika kaka—kaka Yawu mutindu Yawu kele.

107 Beno me mona, ya kele mutindu yina beto zola Biblia. Kaka mutindu Biblia ke tuba Yawu, ya kele mutindu beto zola Yawu, kaka—kaka mutindu Yina. Beno tula ve ntendulu ya beno mosi na Yawu. Ba me tendula Yawu dezia, beno me mona. Ntangu yayi:

Nani me kwikila kimbangi ya beto? mpe na nani diboko ya MFUMU me monisama?

108 Bika mu tanga yawu diaka ntangu yayi, na bukebi nionso.

Nani me kwikila kimbangi ya beto? (Kyuvu!) mpe na nani diboko ya MFUMU me monisama?

109 Na mutindu yankaka, “Kana beno me kwikila kimbangi ya beto, na yina diboko ya Mfumu me monisama pwelele.” Beno me mona?

Nani me kwikila kimbangi ya beto? mpe na nani diboko ya MFUMU me monisama?

110 Ntangu yayi mu zola kutanga diaka na Buku ya Nsangu ya mbote ya Santu Matthieu, kapu ya 11 ya Santu Matthieu. Mpe, ntangu yayi, beno ke nata papié ya beno mpe nyonso, samu ti ntangu nyonso beto ke . . . Kana beno ke na magnetophone ve, beno—beno nata . . . papié ya beno samu ti beto bakula yawu. Kapu 11 ya Santu Matthieu, nzila ya 25 mpe nzila ya 26, 11:26 mpe 27. Mbote mingi, Yesu ke na kuzonza, na kisambu. Mu zola kubanda mwa fyoti na manima ya yawu. Beto baka nzila ya 25 mpe nzila ya 26. Mu banza ti yawu yina mu zabisaka na ntwala, mpamba ve, mu sonikaka yawu awa na Biblia ya munu.

Na ntangu yina Yesu vutulaka mvutu mpe tubaka, mu ke tonda nge, O Tata, Mfumu ya zulu na ntoto, samu nge bumbaka bima yayi na bantu ya ndwenga mpe ya mayele, mpe nge me monisa yawu na bana ya fioti.

Yinga, Tata: mu ke tonda nge samu nge me zola yawu mutindu yina.

111 Beno simba Masonuku yina zole. “Nani me kwikila kimbangi ya beto? mpe na nani diboko ya Mfumu me monisama?” “Ata mpe Yesu tondaka Nzambi na yina Yandi bumbaka mansweki na bantu ya ndwenga mpe ya mayele, mpe zolaka kumonisa yawu na bana ya fioti yina zola kulonguka, samu yawu monanaka mbote mingi na Nzambi na kusala mutindu yina.”

112 Ntangu yayi, kubanda na masonuku yayi, to, samu na kubokila yawu, to kubanda na Masonuku yayi, mu ke baka dilongi yayi: *Nzambi Me Bumbama Yandi Mosi Na Kukikulumusa, Mpe Ke Kukitalisa Yandi Mosi Na Kukikulumusa*. Ntangu yayi, samu na ba-bande mu ke landila na kuvutukila mutindu yina, samu na ba-bande, beno me mona, samu ti bawu ke—bawu ke na kubakaka Yawu na bande. Beno me mona? *Nzambi Me Bumbama Yandi Mosi Na Kukikulumusa, Mpe Ke Kukitalisa Yandi Mosi Na Kukikulumusa*.

113 Ya kele ngitukulu na kubanza mutindu ti Nzambi ke salaka kima mutindu yina. Nzambi ke bumbama Yandi mosi na kima mosi ya fioti yina ke nata ndwenga na kukondwa yawu na million ya ba-kilometre; mpe na manima yandi ke baluka, na kati ya yina, kima ya fioti na kukikulumusa na mutindu ya Yandi ya kusala, mpe ke monisama Yandi mosi mbala mosi dyaka. Mu banzaka ti yawu me sala dilongi, samu beto longuka yawu na ntwala beto kota na Malongi ya nene ya Bidimbu Sambwadi. Mingi ke kondwa Yandi na mutindu Yandi ke kukimonikisa Yandi mosi.

114 Ntangu yayi, bantu kele na mabanza ya bawu mosi ya yina Nzambi fwana vwanda mpe yina Nzambi ke sala. Mpe mutindu mu me salaka luzabusu ya ntama na bantangu mingi, ti, muntu ke wwandaka kaka muntu. Muntu ntangu nionso ke pesaka lukumu na Nzambi samu na yina Yandi salaka, mpe ntangu nionso ke tala na yina Yandi ke sala, mpe ke zimbana yina Yandi

ke na kusalaka. Beno me mona? Beno me mona? Ya kele mutindu bawu ke kondwaka yawu. Ba ke tala na manima mpe ke mona yinki kima ya nene Yandi salaka, kasi ba ke kondwa na kumona kima ya fioti yina Yandi vwandaka sadila, samu na kusala yawu. Beno me mona? Na manima ba ke tala na ntuala mpe ba ke mona kima ya nene ke kwisa, yina ke salama, mpe, bambala yivwa na zulu ya kumi, ya ke na kusalamaka kaka pene-pene ya bawu. Mpe ya ke mpasi ve ti bawu zaba yawu ve. Beno me mona?

¹¹⁵ Kilumbu mosi, muntu mosi awa na Utica . . . Mpe kana bantu ya yandi kele awa, mu ke tuba yayi ve samu—samu na kutubila bakala yango na mutindu ya nganzi. Yandi vwandaka vétéran ya Guerre de Secession. Mpe mu ke kwikila ti yandi vwandaka . . . Mu zaba ve wapi lweka yandi vwandaka, kasi mu banza ti yandi vwandaka Kimpumbulu. Kasi, yandi—yandi vwandaka mumpani, mpe yandi tubaka ti Nzambi vwandaka ve. Yandi vwandaka zinga na Utica. Nkumbu ya yandi vwandaka Jim Dorsey. Mingi na kati ya beno lendaka zaba yandi.

¹¹⁶ Yandi me pesa munu mingi ya ba-melon ya masa, ntangu mu vwandaka mwana ya fioti. Yandi vwanaka kunaka ba-melon kuna pene-pene ya nzadi, na—na kati kuna. Mpe yandi vwandaka nkundi ya papa ya munu. Kasi yandi tubaka, kilumbu mosi, mosi ya bima ya kulutula nene yina ba me tubaka na yandi, na mutindu yankaka. Ntangu yayi, mu vwandaka kaka mwana ya bakala ya fioti na bilumbu yina. Kasi, na mutindu ya luswaswanu ya kundima ya yandi, yina nataka yandi ntama mpe kulumusaka yintu ya yandi mpe yandi dilaka. Mpe mu bakulaka ti, na nzila ya yayi, bakala yango balulaka ntima na Klisto pene ya bamvula makumi nana na tanu.

¹¹⁷ Yandi yufulaka mwana-kento mosi ya fioti, kilumbu mosi, yina katukaka na lukolo ya Lumingu, samu na yinki yandi vwandaka lutisa ntangu ya yandi na kusala diambu ya mutindu yina? Yandi tubaka, samu yandi vwandaka kwikila ti Nzambi kele. Mpe Tata Dorsey tubaka mutindu yina, yandi tubaka, “Mwana, nge ke na kifu, na kukwikilaka mambu ya mutindu yina.”

¹¹⁸ Mpe tubaka ti mwana-kento yina ya fioti niekaka mpe bakaka mwa felele na . . . na ntoto, yandi bendaka yawu na bapetale ya yawu, mpe tubaka, “Tata Dorsey, nge lendaka tuba na munu wapi mutindu yayi ke zingaka?”

¹¹⁹ Yawu yina. Na ntangu yandi bandaka na kutala na manima, yandi lendaka tuba na mwana, “Mbote, yawu ke basikaka na ntoto.” Mpe kuna bakiuvu zolaka nata bakiuvu yankaka, “Wapi kisika ntoto katukaka? Wapi mutindu nkuna yina kumaka kuna? Wapi mutindu yawu salamaka?” Kwenda, mpe kwenda, mpe kwenda, mpe vutukaka tii yandi monaka. Beno me mona?

¹²⁰ Ya kele ve na bima ya nene yina beto ke banzaka, kasi ya kele bima ya fioti na kati ya yina Nzambi kele ya kieleka mingi, na

bima ya fioti. Na yina, ya ke sepelisa Nzambi na kukitalisa Yandi mosi, mpe na manima ke bumbama Yandi mosi; na manima ke bumbama Yandi mosi, mpe kukimonisa Yandi mosi pwelele, na kima ya fioti, mwa bima ya fioti. Ba me tula yawu—yawu na zulu ya yintu ya muntu.

Samu ti, kana beno ke tuba, “Samu na yinki Nzambi ke sala yawu?”

¹²¹ Ya kele samu ti ba salaka muntu, na mbandukulu, ve samu na kumeka na kusosa-sosa yandi mosi. Muntu me salamaka samu na kutula ntima na Nzambi. Kikuma yawu yina ba ke fwanikisa beto na bana-mameme, to mameme. Dimeme lenda ve kukitwadisa yandi mosi; yandi fwana vwanda na ntwadisi. Mpe Mpeve-Santu fwana twadisa beto. Na yina, muntu me salamaka mutindu yina.

¹²² Mpe Nzambi salaka bisalu ya Yandi nionso na mutindu ya kukikulumusa, ti muntu ya kukikulumusa lendaka bakula yawu. Mpe Nzambi ke kukikulumusaka Yandi mosi, samu muntu ya kukikulumusa kubakula Yandi. Na mutindu yankaka, Yandi tubaka, na Esaie 35, mu ke kwikila. Yandi tubaka, “Ata ti zoba, lendaka zimbana ve.” Ya ke ya kukikulumusa mingi!

¹²³ Mpe beto zaba ti Nzambi kele nene mingi, ti beto ke vingila ti ya ke vwanda kima mosi ya nene, mpe beto ke kondwa kima ya kukikulumusa. Beto ke na kubula disakuba samu na kukikulumusa. Ya kele mutindu beto ke kondwaka Nzambi, ya kele na kubulaka disakuba samu na kukikulumusa. Nzambi kele ya kukikulumusa mingi ti bantu ya mayele ya bilumbu yayi, mpe bilumbu nionso, ke kondwaka Yandi na ba-million ya ba-kilometre. Samu, na mayele ya bawu, bawu zaba ti ya kele ve na kima mutindu Yandi, ya nene mingi; kasi, na kati ya luzayikisu ya Yandi, Yandi ke salaka yawu na kukikulumusa mingi ti bawu ke luta na zulu ya yawu mpe ke kondwa yawu.

¹²⁴ Ntangu yayi, beno longuka Yawu. Beno longuka Yawu nionso. Mpe beno bantu yina ke kwisaka awa, ntangu beno ke kwendaka na bivinga ya ba-motel ya beno, beno baka bima yina mpe beno longuka yawu. Beto ke na ntangu ya kufiongonina Yawu ve mutindu ba lendaka fiongonina Yawu, kasi mu ke zola ti beno sala yawu ntangu beno ke kuma na motel, to hotel, to bisika nionso beno ke vwanda, to na yinzo ya beno. Beto vukana kintwadi mpe beto longuka Yawu.

¹²⁵ Ba ke kondwaka Yandi na mutindu ti Yandi ke kukimonikisaka Yandi mosi; samu Yandi kele nene mingi, kasi, Yandi ke bumbamaka na kukikulumusa, samu Yandi kuzabana na muntu ya fioti. Beno me mona? Beno meka ve na kuzwa ya nene, samu ti Yandi ke luta na zulu ya yawu. Kasi beno kuwa na kukikulumusa ya Nzambi, mpe na yina beno ke mona Nzambi kaka awa na mutindu ya kukikulumusa.

¹²⁶ Ndwenga ya yinza, ya kulengula mingi, ya kulonguka, ntangu nionso ke kondwaka Yandi. Ntangu yayi, mu kele awa ve. . . Mpe mu zaba ti ya kele na milongisi ya lukolo, zole to tatu, yina mu zaba, yina kele ya kuvwanda awa. Mpe mu kele ve awa samu na kutelemina lukolo mpe malongi, mpe kumeka kusimbisa kukondwa kulonguka. Mu kele ve awa samu na yawu. Kasi, yina ya kele, bantu me tula kivuvu mingi na zulu ya yawu tii ntangu bawu kele, ata mpe na baseminere mpe nionso yina, ba ke na kukondwaka kima ya kielekea yina Nzambi tulaka na ntwala ya bawu.

¹²⁷ Kikuma yawu yina mu ke teleminaka ve bampangi yina kele na ba denomination, kasi mu ke teleminaka systeme ya ba denomination, samu ti yawu ke mekaka na kukembisa yawu mosi, mpe—mpe—mpe ke longaka milongi ya yawu na kisika *yayi mpe yina*, tii kuna, kana bawu kele ve na ndongosolo mpe malongi ya kulunga, ba ke basisa bawu na nganda. Mpe—mpe bawu kununga kizame ya kimbevo ya yintu, mpe nionso yina. Mu me banzaka ve ti yawu vwandaka luzolo ya Nzambi na kuteza mulongi na kizame ya kimbevo ya yintu, kasi kuteza yandi na nzila ya Ndinga. Beno me mona? Ya—ya—ya ke vwanda mutindu ya Nzambi ya kuteza muntu ya Yandi yina Yandi fidisaka, samu na kunata Ndinga.

¹²⁸ “Longa Ndinga!” Ntangu yayi, bubu yayi beto ke longaka na philosophie, beto ke longaka credo mpe malongi ya denomination, mpe bima mingi, mpe na kubikaka Ndinga, samu ti bawu ke tubaka ti ba lendaka ve kubakula Yawu. Yawu lenda bakula. Yandi silaka na kusala yawu. Ntangu yayi beto ke lomba Yandi na kusala yawu.

¹²⁹ Ntangu yayi beto ke baka mwa bantu awa baminuti fyoti.

¹³⁰ Beto tala na bilumbu ya Noé. Na kilumbu ya Noé, Nzambi monaka ti ba vwandaka tula kivuvu mingi na ndwenga ya yinza mpe vwandaka zitisa yawu, Yandi fidisaka nsangu ya kukikulumusa na nzila ya muntu ya kukikulumusa, samu na kutalisa bawu bunene ya Yandi.

¹³¹ Ntangu yayi, beto zaba ti na kilumbu ya—ya—ya Noé, ba me tuba ti civilisation vwandaka ngolo mingi, na ntangu yina, ti beto me kuma ata fioti ve na kisika yina, na civilisation ya beto ya bilumbu yayi. Mpe mu ke kwikila ti na nsuka ya ke kuma, samu Mfumu ya beto me tuba, “Mutindu ya vwandaka na bilumbu ya Noé, mutindu mosi ya ke vwanda na Nkwizulu ya Mwana ya muntu.” Yandi pesaka mwa bifwanikisu.

¹³² Mpe bawu tungaka pyramide mpe sphinx kuna na Egypte, mpe bawu tungaka bima ya kulutila nene yina beto kele ve na ngolo, bubu yayi, samu na kutunga kima ya mutindu yina. Bawu vwandaka na mutindu ya kubumba bamvumbi, ti ba lendaka kubumba nzutu ya mvumbi, samu na kusala ti ya vwandaka ya mubisu ti ya ke vwanda tii na kilumbu yayi. Beto lenda ve. Beto

lenda ve kubumba mvumbi bubu yayi. Beto kele ve na kima ya kusala yawu. Bawu vwandaka na bantinta yina—yina vwandaka ngolo mingi, bamvula mafunda yiya to tanu ya ntama, ya ke bikana kaka ntinta ya mutindu mosi yina ya vwandaka. Beno me mona? Beto kela ve na kima mutindu yina bubu yayi.

¹³³ Mpe bima mingi ya nene ya civilisation yina ke tubila bunene ya yawu na zulu ya civilisation ya beto ya bilumbu yayi. Mpe na yina beno lenda banza mutindu malongi mpe science, ya bidimbu ya nene yina beto me bika, ti ya vwandaka na civilisation ya mutindu yina. Wapi mutindu—wapi civilisation ya nene yina fwana vwanda, mbote, balubambuku yayi, wapi mutindu science mpe—mpe civilisation ya bilumbu yayi mpe malongi vwandaka—vwandaka kima ya mfunu mingi samu na bantu. “Ya fwana vwanda. Ya zolaka vwanda kaka mutindu yina.” Ya vwandaka na mpasi, mu banza, muntu yina me longukaka ve na kati ya bawu, to fioti mingi.

¹³⁴ Mpe na yina, Nzambi, na kusosa na nzila ya *économie* yina ya nene na kilumbu yina, na ba-systeme ya bawu, lendaka ve, mu banza, kuzwa mutindu ya mbote ya muntu, tii Yandi monaka muntu yina me longukaka ve, mu banza, kisadi-bilanga na nkumbu ya Noé, muvungi. Mpe Yandi pesaka yandi nsangu ya Yandi ya kulonga na bantu, yina vwandaka ya kukikulumusa, na luzabu ya bawu—ya bawu ya kilumbu yina, ti bantu bulaka dibaku na zulu ya kukikulumusa ya nsangu. Mpe, kasi, nsangu vwandaka, na kizizi ya science, “Ya nganzi! Wapi mutindu mvula lendaka vwanda na mazulu, ntangu mvula vwandaka ve kuna?” Beno me mona? Mpe nsangu ya kukikulumusa ya—ya kutunga nzana, kutunga kima mosi samu na kukota kuna, na yina masa vwandaka ve samu na kunata yawu. Na yina, yandi kumaka fanatiki. Mpe yandi kumaka . . . yina beto lendaka bokila, kana beno lenda lemvokila nzonzolo ya bubu yayi, “ndeke ya ngitukulu.”

¹³⁵ Mpe na kutala bantu nionso ya Nzambi kele “bantu ya ngitukulu,” beno me mona. Bawu kele. Mu ke na kiese na kuvwanda mosi ya bawu. Na yina, beno zaba, ba—ba kele ya kuswaswana na kubendama ya civilisation ya bilumbu yayi, na yina ba me kuma ya ngitukulu, yina ke yitukisa. Yandi tubaka ti bantu ya Yandi vwandaka “Bantu ya mutindu yankaka, ya ngitukulu, yina ke yitukisa; kasi kinganga-nzambi ya kimpeve, yinsi ya kimfumu, na kupesaka minkayulu ya kimpeve na Nzambi, bambuma ya bikoba ya bawu, ke pesa nkembo na Nkumbu ya Yandi.” Wapi mutindu—wapi mutindu ya bantu! Yandi kele na bawu.

¹³⁶ Mpe beno tala, ntangu yayi, wapi kima ya nene yina zolaka vwanda na kilumbu yina, kumona fanatiki mosi kukwisa na dibuundu; fanatiki mosi, mpe kulonga nsangu ya mbote yina vwandaka monana na ngaanda, na mutindu ya bawu ya kukwikila. Mpe bantu ya science, “Oh, ya—ya vwandaka kaka

bulawu.” Mutindu ba lendaka lakisa na luzabu ya yinza ti ya vwandaka ve na mvula!

137 Kasi muvungi yayi ya kukikulumusa kwikilaka, “Kana Nzambi tubaka ti yawu ke noka, yawu ke noka.” Benó me mona?

138 Mpe na yina beno fwanikisa yawu na bubu yayi, na muntu yina me beluka. Bawu ke tuba, “Yina ke kaka emotion. Mu lenda talisa na beno na mayele ya kimuntu ti cancer, to kima yankaka, to—to—to kima yango kele kaka kuna.” Kasi, samu na mukwikidi ya kukikulumusa, yawu me kwenda. Beno me mona? Samu ti, yandi ke na kutalaka ve na kima yango, yandi ke na kutalaka na nsilulu, kaka mutindu Noé salaka.

139 Na yina beno ke mona ve, “Mutindu ya vwandaka na bilumbu ya Noé, mutindu mosi ya ke vwanda na Nkwizulu ya Mwana ya muntu?”

140 Na mutindu ya science, muntu mosi ve. . . Dokotolo lendaka tuba, “Benó tala awa, kivimbu ya nge kele diaka kuna. Cancer ya nge kele kaka. Diboko ya nge kele kikata mutindu ya vwandaka. Nge kele kilawu.”

141 Mpe, beno bambuka moyo, yina ke kaka mpeve yina vwandaka na bilumbu ya Noé, yina tubaka, “Mvula kele ve kuna. Beto lenda kutala ngonda na bisadilu, mpe mvula kele ve.” Kasi kana Nzambi tubaka yawu mvula ke vwanda kuna!

142 “Samu lukwikilu kele kima yina beto ke tula kivuvu, nzikisa ya bima yina ke monikaka ve.” Mpe lukwikilu ke bakaka kisika ya yawu ya nsuka ya kupema na zulu ya Ndinga ya Nzambi. Kele kisika yina yawu ke kuzwa kisika ya yawu ya kupema. Benó me bakula? Kisika ya yawu ya kupema kele na zulu ya Ndinga ya Nzambi.

143 Ya kele kisika yina Noé pémisaka yawu, “Nzambi tubaka yawu.” Yina sukisaka dyambu. Ntangu yayi kana beno tala diaka, na yina, awa, Noé, na kukwikila mambu ya mutindu yina, yandi vwandaka fanatiki.

144 Mpe bantu ya bubu yayi yina ke kwikilaka na mbotika ya Mpeve-Santu. Ntangu yayi, dibuundu ke tubaka, “Bantu yayi kele bafanatiki. Ba kele kima ve kasi nkonga ya bantu ya luzatu, ya émotion, yina me natama na kidi-kidi.” Kasi bawu zaba ti Ndinga ya Nzambi ke longa yawu. Yawu kele nsilulu.

145 Mpe, samu na Noé, ata bambala bawu tubaka, “Kiboba ya bakala yina vwandaka diaka ve na mabanza ya yandi; yandi vwandaka na kifu landila mayele ya kimuntu; mpe—mpe—mpe, na mabanza ya yandi, yandi vwandaka na kifu.” Kasi, samu na Noé, yawu vwandaka Ndinga ya Mfumu, mpe Noé bikanaka na yawu. Mpe muntu ya ndwenga mpe ya mayele bulaka disakuba na kukikulumusa ya yawu, mpe zimbisaka luzingu ya yawu. Wapi mutindu ya kusemba ntangu yayi, ya kele, samu na nsungi yina!

146 Bantu mingi ke tubaka, “Kana mu lendaka zinga kuna!” Ve, beno zolaka vwanda na dibanza ya mutindu mosi. Samu ti, bubu yayi, kima ya mutindu mosi ke na kusalamaka dyaka bubu yayi, kaka na mutindu yankaka, ba ke na kubulaka disakuba na Yawu bubu yayi kaka mutindu bawu ba salaka kuna.

147 Kukondwa ntembe, na bilumbu yina, bawu kuzwaka milongi mingi, kasi Noé vwindaka ya kutwadisama na Nzambi. Mpe Noé lendaka kutala mpe kumona yina zolaka salama, mpe zabaka ti nsungi ya kindumba mpe ya yimbi, mutindu yina, ti Nzambi ke bika ve yawu kuzinga. Na yina yinki beto lenda sala, bubu yayi, kasi kumona kima mutindu mosi! Sodome mpe Gomorrhe ya bubu yayi, beno me mona, bantu ya yimbi, ya kindumba, ya kulengula na malongi ti ba ke na kubula disakuba na kukikulumusa ya kumonisama ya Nzambi ya Moyo samu na Mvwandulu ya Yandi mpe Ndinga ya Yandi, na kulakisaka Ndinga ya Yandi.

148 Ya kele ve na muntu na yinza, Rosella, yina, to, muntu—muntu yina lenda tuba ti—ti beto ke mona ve Ndinga ya kieleka ya Nzambi yina me monisama. Nsilulu ya kieleka ya bilumbu ya nsuka, Bansemu ya nkokila yina zolaka kusema, beto kele bantu ya bweso na kumona yawu. Mpe, kisika, yinza ya kulengula, yawu me bumbama na bawu. Yesu tubaka na Nzambi, Tata, Yandi tubaka, “Ya me sepelisa Nge na kubumbama na ntwala ya bawu. Yinga, Tata, Nge me bumba yawu.” Yandi me bika bawu, na ndwenga ya bawu . . .

149 Beno me mona, yawu vwindaka ndwenga yina salaka ti ballon kubaluka na kati ya poto-poto ya disumu, na mbandukulu; samu Eve vwindaka sosa ndwenga ntangu yandi kutanaka na Satana, mpe Satana pesaka yandi yawu, beno me mona. Mpe ndwenga kele ya kuswaswana na Ndinga. Ba me lomba beto ve na kuvwanda na ndwenga. Ba me lomba beto na kuvwanda na lukwikilu na yina ba tubaka ntete. Na yina, beno me mona? Kasi, bubu yayi, bantu ya mayela mingi ke lengula Yawu na mutindu mosi, mpe tulaka Yawu kuna, ke tula ntendulu ya bawu mosi na Yawu, na ntangu nionso. Ba ke sala kima mutindu mosi bubu yayi; ya kele na kitezo ya mutindu mosi. Ntangu yayi, bantu, kasi . . .

150 To, bantu kuna kondwaka yawu, kaka mutindu bawu ke kondwa yawu mpe ke sala yawu bubu yayi. Kima mutindu mosi. Bawu ke sala kima mutindu mosi. Na yina, bawu . . . Samu na yina bawu kondwaka yawu, samu ti bawu vwindaka na mayele mingi na kukwikila yawu. Beno me mona? Ntangu yayi, nsangu vwindaka ya kukikulumusa, ti bantu ya mayele vwindaka na mayele mingi na kukwikila na mutindu ya kukikulumusa ya nsangu. Oh, la la! Nzambi salaka yawu ya kukikulumusa, na Kieleka, ti bantu ya ndwenga mpe bantu ya mayele monaka yawu ve, samu ya vwindaka ya kukikulumusa. Mbote, yawu yina

ke salaka ti bunene ya Nzambi kuvwanda nene mingi; samu, na kuvwandaka ya kulutila nene, Yandi lendaka kukikulumusa.

¹⁵¹ Bantu bubu yayi, yawu yina ke na kotalisa ti bawu kele ve ya Nzambi, ba kele nene mpe ke na kumeka na kukuma ya kulutila nene, mpe ke lakisa ti bawu kele ya kulutila nene, mpe na kutubaka, “Évêque ya Nene, Docteur Santu Pape,” nionso yina, na kuvwandaka bawu mosi kima yina bawu kele ve. Mpe Nzambi, na kuvwandaka nene mingi, ke na nataka Yandi na kukikulumusa. Kukikulumusa kele bunene.

¹⁵² Beto lenda kutunga avion à réaction, beto lendaka fidisa fusée na . . . na . . . to kutula missile na orbite. Mpe beto lenda sala bima yayi nionso, kasi, beto lenda tunga ve kitini ya nianga. Uh-huh. Amen. Wapi mutindu samu na yawu? Kasi na kisika ya kuvutuka mpe kutala yina ke salaka nianga yina, mpe kundima Nzambi yina vangaka nianga, beto ke meka na kutunga missile yina ke kuma kuna na nswalu nionso kulutila muntu yankaka lendaka kutunga yawu. Beno me mona?

¹⁵³ Beto kele na ndwenga mingi mpe na ya mayele, na kati ya mabuundu ya beto, ti beto lenda tunga yinzo ya mafuku ya ba-dollar, to mafuku ya ba-dollar kumi na tanu, kasi, dyaka, mpe kumeka na kutunga mosi ya mbote mingi kulutila yina ya ba-Méthodiste, to ba-Baptiste ke tunga mosi kulutila ba-Presbytérien, mpe tala ba-Pentecotiste me sala mutindu mosi. Kasi kima ya yawu kele, kele yayi; beto kele, dyaka, beto kele na mayele mingi mpe ya kuvwanda na mitindu ya beto ya kusala ti beto ke kondwa na kukikulumusa samu na kubakula Nzambi yina kele na kati ya kisalu yina kuna na nsongi. Beno me mona? Ya kieleka. Mbote, ya zola kutuba, beto ke bulaka disakuba na kukikulumusa. Bawu ke salaka yawu ntangu nionso.

¹⁵⁴ Ntangu yayi, bawu, bawu vwandaka—bawu vwandaka na mayele mingi samu na kukwikila nsangu ya mutindu yina. ya vwandaka ve ya kulengula mingi samu na kusosa-sosa ya bawu ya science yina bawu kuzwaka. Ya vwandaka ve—ya vwandaka kungenga ve, nsangu vwandaka ya mfunu mingi ve, samu na manaka ya bawu ya malongi yina ba vwandaka na yawu na kilumbu yina. Beno me mona? Ba longukaka na kuzaba ti ya vwandaka na Nzambi, mpe ba longukaka samu na kuzaba ti Yandi vwandaka nene, mpe bawu vwandaka meka na kukuma nene na Yandi. Ntangu, mutindu ya kumata kele ntangu nyonso mutindu ya kukulumuka.

¹⁵⁵ Ntangu yayi, nani me zaba kana Dikunzi ya Nord kele Nord, to Dikunzi ya Sude kele Nord; to Dikunzi ya Nord kele Sude, Dikunzi ya Sude ya Nord? Yina kele na zulu mpe yina kele na nsi? Beto kele na zulu ya ntangu. Beto ke tuba, “Dikunzi ya Nord kele na zulu.” Wapi mutindu beno me zaba? Dikunzi ya Sude lendaka vwanda na Nord. Beno me mona, beno zaba ve. Na yina beto bambuka moyo, mpe Ndinga yayi . . .

156 Yandi tubaka, “Na yina wapi mutindu nge ke tuba, Mpangi Branham, ti, ‘Kumata kele kukulumuka?’”

157 Na lufulu ya Ndinga ya Yesu Klisto! Yandi tubaka, “Yandi yina ke kukikulumusa ba ke tombola yandi, kasi yandi yina ke kukitombola ba ke kulumusa yandi, ba ke kulumusa yandi.” Na yina, ntangu yayi, kumata kele kukulumuka, mpe kukulumuka kele kumata.

158 Mutindu santu yina tubaka na Chicago, ti... Bakala mosi, longi mosi ya organisation mosi, mataka na ntwala ya ba Pentecotiste. Yandi vwandaka na malongi ya yandi nionso kintwadi. Yandi mataka kuna na estrade mpe sadilaka bampova yina bantu ya Pentecote zabaka ve, mpe yandi mataka kuna, mpe yandi monaka ti ya vwandaka kwenda kuna ve na ba-Pentecotiste. Mpe yandi mataka, na ntulu ya kuvimba, mpe yandi vwandaka “Docteur ya Santu *Kingandi*,” beno zaba, yandi katukaka na lukolo *yayi-yayi* ya nene kuna na Chicago. Mpe yandi talaka na nziunga, mpe bantu ya Pentecote vwandaka talana mosi na yankaka. Bawu zabaka ve yina yandi vwandaka tuba; yandi vwandaka ya kulonguka mingi, ya mayele mingi, ya kulutila mayele. Bawu vwandaka zaba ve.

159 Ya vwandaka kima mutindu sénateur mosi, to bakala yina zolaka kukuma ntama mingi ntwadisi ya yinsi mpe ba me nunga yandi. Tuck Coots tubaka na munu. Ntangu mu vwandaka longa na matanga ya Mama Ford, mpe mu vwandaka zonzila mvumbukulu, kipiku ya mvumbukulu, “Ya kieleka kaka mutindu mwini ke basikaka, mutindu mosi mu ke vumbuka. Ya kieleka kaka mutindu matiti ke kufwaka na Automne, mpe dititi ke kubwaka na yinti, ya ke vutuka diaka. Ntangu ntoto ke vwanda ya kusungama yawu mosi pene-pene ya orbite, yawu fwana basika diaka.”

160 Yandi tubaka, “Mu me sepela na Nsangu yina, Billy.” Mpangi Neville na munu vwandaka ya kuvwanda kintwadi na kati ya ditoma. Mpe mu tubaka, “Tuck...” Yandi tubaka, “Mu ke sepelaka na Bansangu ya nge.”

Mu tubaka, “Tuck, mu longukaka ve,” mu tubaka.

Yandi tubaka, “Yina kele kitini ya mbote samu na yawu.” Beno me mona?

161 Mpe, ntangu yayi, yandi tubaka ti yandi kwendaka mona... Mbote, mu banza ti bakala yina me lemvočila munu, mu zola tuba ve... Adlai Stevenson, beno zaba. Mpe yandi tubaka ti yandi kuwaka yandi bamuniti kumi na tanu. Mpe Tata Stevenson kele nzonzi ya mayele mingi, yina lendaka vwanda, beno zaba, tii Tuck tubaka... Mu banza ti yandi me salaka lukolo ya nene. Yandi tubaka ti yandi vwandaka kuna mpe yandi lalaka. Mpe yandi tubaka ti yandi lalaka, samu na kuwa yandi, na baminuti kumi na tanu. Kasi tubaka, “Na lukolo ya nene, mu vwandaka bakula ve kasi kaka mwa bandinga fioti yina yandi tubaka; ya

vwandaka ya kulengula mingi.” Yandi tubaka, “Nge me monaka munu ntete ve ya kulala na kati ya mosi ya balukutakanu ya nge, nge me monaka munu, Mpangi Branham?”

¹⁶² Na yina, beno me mona, ya kele kukikulumusa ya Yawu, ya kele kisika yina Nzambi kele.

¹⁶³ Ntangu yayi, ba vwandaka—ba vwandaka na mayela mingi, na kilumbu yina, samu na kubakula mutindu ya kukikulumusa ya Nzambi ya kusala bima. Ya vwandaka ve ya kulengula samu na bawu. Ya zolaka vwanda ya kulengula, Ya zolaka vwanda ya kutendula kitoko mingi, to ba zolaka kukondwa yawu. Ntangu yayi, kasi, Yehowa ya nene vwandaka ya kubumbama na kati ya Ndinga ya Yandi. Mpe Yandi kukitalisaka Yandi mosi na bantu yina kwikilaka na Ndinga ya Yandi, na kuvulusaka bawu, mpe na kulungisaka nsangu ya kukikulumusa. Nsangu ya kukikulumusa ya Noé, Nzambi nataka yawu kusalama. Ntangu yayi beno tala yawu.

¹⁶⁴ Ntangu yayi, na yina, diaka na kilumbu ya Moise, beno tala ntangu yankaka ya luvukulu.

¹⁶⁵ Ntangu Nzambi me kubama samu na kusala kima mosi samu na kuvulusa bantu ya Yandi, Nzambi ke fidisaka Nsangu mosi na bantu. Mpe, Ya kele ya kukikulumusa, mutindu beto ke bakula na kuzibuka ya Bidimbu yayi. Yina vwandaka kikuma ya munu ya kutubila yayi ntete. Ti, beto ke mona ti kuzibuka ya Bidimbu yayi kele ya kukikulumusa mingi, muntu ya mayele ke kondwa Yawu, na ba-million ya ba-kilometre. Beno me mona? Mu ke na kivuvu ti Nzambi ke pakula munu samu na Yawu. Beno me mona? Beno me mona? Ya ke luta kaka na zulu. Mpe ya kele samu na yina mu banzaka Nsangu yayi, na suka yayi, ya ke vwanda ya kulunga, samu na kutula lufulu, na zulu ya kukikulumusa ya Nzambi, beno me mona, mutindu Nzambi ke bumbamaka Yandi mosi na kukikulumusa.

¹⁶⁶ Beno banza kaka, bawu lenda kuzenga ba-atome mpe kusala bima nionso yankaka; kasi na ntangu yawu ke kwisa na kusimba luzingu, bawu lendaka ve kutuba kisika yawu me katuka. Kitini ya fioti ya nianga, mpe Nzambi me bumbama na kati ya yawu. Bawu lendaka fidisa missile na ngonda, mpe—mpe kufidisa radar kuna na zulu, to nionso yankaka, mpe kasi ba lenda tendula ve luzingu yina kele na kati ya kitini ya nianga. Ya kieleka. Beno me mona? Ya kele samu ti ba lendaka ve kutendula yawu. Ya kele ya kukikulumusa, ba ke kipe yawu ve.

¹⁶⁷ Ntangu yayi beno tala Moise, na kilumbu yina Nzambi zolaka vulusa bana ya Israel, landila Ndinga ya Yandi. Yandi, yinki Yandi salaka? Yandi soolaka dibuta ya kukikulumusa. Beto zaba kima mosi ve samu na bawu. Beno me mona, kaka “mwana ya Levi,” kele nyonso yina beto zaba. Beno me mona? Mpe na yina beto. . . mpe kento ya yandi. Yandi vwandaka mutindu muntu nionso, kaka muntu yina vwandaka balula poto-poto, mutindu

yinza ke banzaka, kuna na kusalaka biliki samu na mbeni. Yandi vwandaka kaka mpika mutindu mpika nionso na Israel, kasi Nzambi soolaka dibuta yina samu na kubuta mvulusi; kaka dibuta ya ba-Juif mutindu dibuta nionso. Yandi kwendaka kubaka ata fioti ve muntu ya lukumu mpe ya kuzabana, to kima mosi, to nganga-Nzambi mosi. Yandi bakaka dibuta ya fioti, mutindu mabuta nionso. Beno me mona? Kukikulumusa! Beno tala yina Yandi salaka, na ntangu yina, Yandi butaka mwana, muntu ya kukikulumusa. Yandi ata mbala mosi ve. . .

168 Yandi lendaka—Yandi lendaka tuma mwini, kana Yandi zolaka, samu na kuvulusa bawu. Yandi zolaka kutuma mupepe samu na kuvulusa bawu. Yandi zolaka kutuma Wanzio samu na kuvulusa bawu. Oh, alleluia! Nzambi lenda sala nionso yina Yandi zola kusala.

“Mbote, wapi mutindu beno ke zaba na ntangu yina, Mpangi Branham?”

169 Nzambi ke bika manaka ya Yandi ve. Yawu yina beto me zaba yawu, bubu yayi, Yawu fwana vwanda kukikulumusa. Beno me mona? Ntangu yayi, Yandi ke salaka ntangu nyonso na kukikulumusa. Kasi Nzambi, na mbandukulu, yina lendaka sala ti mwini kulonga Nsangu ya mbote, to mipepe kulonga Nsangu ya mbote, to Wanzio kulonga Nsangu ya mbote, kasi Yandi tumaka bantu samu na lukanu yina, mpe Yandi ke sobaka yawu ata fioti ve. Ata fioti ve ti Yandi tumaka indi-. . . Ata fioti ve ti Yandi tumaka ba-denomination, Yandi tumaka ata fioti ve ti bankonga ya bantu, Yandi tumaka bantu na kulonga Nsangu ya mbote, monarchie ve, to bamasini, to Kivangu mosi ya Wanzio, yawu vwanaka bantu.

170 Mpe ntangu Yandi nataka luvukulu na bantu kuna, Yandi tumaka muntu ya kukikulumusa, yina me butuka na dibuta ya kukikulumusa na kati ya nkonga ya bampika. Oh, la la! Wapi mutindu Nzambi Yandi kele, na kukimonisaka Yandi mosi na kukikulumusa!

171 Ntangu yayi beno tala. Mpe Yandi longusaka yandi na ndwenga ya yinza, samu ti yandi kubwa, mpe kulakisa ti ya kele ve na nzila ya ndwenga ti beto ke kuzwa luvukulu. Ya ke na nzila ya lukwikilu ti beto me vuluka. Yandi bikaka yandi kukota mpe kuzwa malongi ya mutindu yina tii yandi lendaka kulonga ndwenga ya Egypte; yandi vwandaka na mayele mingi. Nzambi vwanaka na dibuta yina ya kukikulumusa yina lendaka, ntangu yankaka, mu banza lendaka ve kusonika nkumbu ya bawu ve. Mpe Moise kwendaka na lukolo ya kulutila zulu, na malongi ya nene, tii yandi lendaka longu ndwenga na milongisi. Yandi lendaka longu muntu ya kulutila mayele. Yinga. Mpe Nzambi bikaka yandi kukuma mutindu yina samu ti Yandi lendaka kukitalisa Yandi mosi na kukikulumusa, samu na kotalisa ti ndwenga ke na kima ya kusala na yawu ve. Mpe Moise na

kiadi kubwaka na mayele ya yandi. Yandi bikaka yandi kukuma mutindu yina samu na lukanu ya Yandi, samu ti yandi ke kubwa. Mpe yandi kubwaka, mpe yandi kubwaka.

¹⁷² Na yina, samu na kulakisa, “Ve na nzila ya ngolo, to lulendo ve,” kasi ve na nzila ya ndwenga ya Egypte, ve na nzila ya ndwenga ya balukolo ya beto, ve na nzila ya ngolo ya baseminere ya beto, kasi na nzila ya lutangu ya organisation ya beto, ve na nzila ya ngolo ya malongi ya beto ya lukolo, “kasi na nzila ya Mpeve ya Munu, me tuba Nzambi.” Ndwenga ya Yandi me zimbana mpe me kuma na nsuka ya yawu, ntangu yandi kutanaka na Nzambi na mulaka ya tiya kuna. Yandi katulaka basapatu ya yandi mpe kukikulumusaka yandi mosi, mpe yandi zimbanaka ndwenga ya yandi nionso.

¹⁷³ Nzambi, na kunataka luvukulu, zolaka kulongisa yandi na ndwenga, samu ti yandi kubwa, samu na kulakisa ti beno lenda ve kuyekama na diboko ya lubakusu ya beno mosi, to lubakusu ya muntu yankaka. Kubika yandi kubwa, samu na kulakisa diboko ya Yandi. Beno lenda mona yawu? Lukanu ya Nzambi na kusalaka mutindu yina, vwandaka kukilakisa Yandi mosi na kukikulumusaka. Mpe Yandi bikaka ti Moise kukuma ya kulutula zulu, ti yandi ke—yandi ke vwanda pharaon yina ke kwisa. Yandi vwandaka général ya ngolo. Landila masolo, yandi nungaka, Moise yandi mosi, bayinsi yina ya nziunga. Mpe na manima ntangu yandi balukaka na kisalu ya Mfumumu, na mayele ya yandi nionso, Nzambi bikaka ti yandi kubwa, ti Yandi lendaka tula yandi kuna na ntoto ya kuyuma mpe kubasisa nionso yina na kati ya yandi; mpe na yina kumonana na yandi, na kati ya kukikulumusaka, mpe kufidisa yandi kuna na nkawa na diboko ya yandi, samu na kuvulusa bantu.

¹⁷⁴ Na yina, yandi zolaka sala yawu ve na nzila ya malongi ya basoda, na nzila ya malongi ya lukolo, na nzila ya lukolo ya luzabu ya yinza. Mpe na nzila ya ngolo ya basoda yandi lendaka ve kusala yawu. Mpe Yandi pesaka yandi yinti ya ntama ya kutengama kuna na ntoto ya kuyuma, mpe Yandi salaka yawu na yandi. Nzambi na kati ya kikululu, na kukikulumusaka! Nzambi vwandaka na kati ya nkawa mpe na kati ya Moise. Mpe ntangu nionso yina Moise vwandaka na yawu, na yina Nzambi vwandaka na yawu, samu Nzambi vwandaka na kati ya Moise. Ya kieleka.

¹⁷⁵ Beno tala, “Na nzila ya ngolo ve, to ve na nzila—na nzila ya lulendo, kasi na nzila ya Mpeve ya Munu.” Kasi na lukwikilu ya kukikulumusaka!

¹⁷⁶ Moise vwandaka na lubakusu ti yandi zolaka vwanda mvulusi, na malongo ya mama ya yandi. Mpe yandi longokaka na ngolo ya basoda, samu na kusala mutindu yina, kasi yawu kubwaka. Beno me mona? Yandi vwandaka na luzabu, yandi vwandaka na malongi, kasi yina vwandaka sala ve. Na yina

yandi zolaka kuzimbana yawu nionso, mpe kukwisa na kima ya kukikulumusa ya kubaka Nzambi na Ndinga ya Yandi, mpe na yina yandi vulusaka bantu. Yinga, tata.

¹⁷⁷ Nzambi ke vulusaka na nzila ya (yinki?) lukwikilu na Ndinga ya Yandi. Ya ke vwandaka ntangu nionso mutindu yina. Beto lendaka baka yawu kana beto vwandaka na ntangu. Beto me bikana na bamuniti makumi zole. Beto me . . .

¹⁷⁸ Beto lenda kutala Caïn mpe Abel, mutindu ti—ti Caïn mekaka na kusepelisa Nzambi na nzila ya bima ya kitoko.

¹⁷⁹ Mutindu yankaka, bantu ke banzaka, “Na nzila—na nzila ya mabuundu ya nene, ya bantu yina ke lwataka kitoko, na nzila ya nganga-Nzambi na—na . . . milongi yina me lwata bamvwela, mpe ba-chorale yina me lwata ba-robe ya yinda, mpe bansaka nionso yina, yawu yina ke sepelisaka Nzambi.” Beno lenda mona kisika yawu me katuka? Caïn mekaka kima ya mutindu mosi. Mpe yandi tungilaka yandi autel, na ntembe ve ti yandi salaka yawu kitoko.

¹⁸⁰ Mpe muntu yango vwandaka ya kusungama. Yandi vwandaka sambila. Yandi vwandaka banza, “Kana mu kele ya kusungama, ya ke sala luswaswanu ve.” Ya ke sala luswaswanu. Beno lenda vwanda ya kusungama na kifu.

¹⁸¹ Beno tala, yandi—yandi tungaka autel yayi mpe yandi salaka, mutindu, kutula bafelele mpe tulaka yawu na zulu, mpe tulaka bambuma ya kitoko, mpe banzaka, “Ya kieleka, Nzambi ya nene, ya santu, ya kuvedila, ya kitoko ke ndima munkayulu yina.” Kasi, beno me mona, yandi salaka yawu na ndwenga ya yandi mosi. Yandi salaka yawu na nzila ya mabanza ya yandi mosi.

¹⁸² Mpe ya kele mutindu yina bubu yayi. Yandi—yandi . . . Bawu ke salaka yawu na nzila ya ndwenga ya bawu mosi, na nzila ya lukolo ya bawu, na nzila ya malongi ya bawu mpe ndongosolo ya bawu yina ba me longokaka.

¹⁸³ “Kasi Abel, na nzila ya luzayikisu, na lukwikilu, pesaka na Nzambi munkayulu ya kulutila kitoko.” Kima mosi ve ya kuvedila samu na yawu, na kutala, na nzonzolo ya kimuntu. Mwa niama, mpe yandi simbaka yandi na nkingu mpe kangaka yandi nsinga na nkingu, mutindu *yayi*, mpe yandi bendaka yandi tii na autel yayi. Kima mosi ve vwandaka kitoko mingi samu na yawu. Yandi tulaka yandi na zulu ya autel, mpe yandi vwandaka kuzenga mwa laka ya yandi na mwa ditadi mosi ya nsongi, ti menga ya yandi vwandaka tiamuka na zulu ya yandi, mpe yandi vwandaka boka, vwandaka kufwa. Ya vwandaka diambu ya boma na meso, beno me mona, samu na kutala yawu. Ya vwandaka ya kukikulumusa, kaka.

¹⁸⁴ Na kati ya kukikulumusa, yandi zabaka ti yandi butukaka na menga ya mama ya yandi mpe menga ya tata ya yandi, yina me butuka na menga ya mama ya yandi, na nzila ya menga ya

tata ya yandi; mpe ya vwandaka menga yina salaka ti kubwa, na yina ya vwandaka menga yina zolaka vutula yawu. “Na yina yandi pesaka na Nzambi munkayulu ya kulutila kitoko, samu na yina yawu monisamaka pwelele na yandi.”

¹⁸⁵ Mpe bampangi yankaka, bubu yayi, yina ke banzaka ti bawu kudiaka ba-pomme mpe ba-poire! Mpe mu monaka kima ya kulutila mpasi kilumbu yina, na zulunale. Ba tubaka, “Ntangu yayi ba me siamisa ti ya vwandaka ve pomme yina—yina Eve kudiaka.” Ti, mu—mu banza bawu tubaka, “Ya vwandaka mbuma ya abricot.” Na yina, oh, beno tala kisika mpeve yina me katuka!

¹⁸⁶ Mpe bawu tubaka, ti, “Moise zabukaka ata fioti ve Mubu ya Mbwaki. Ti, yawu vwandaka kinkuku ya madiadia kuna, na mubu ya madiadia. Mpe yandi nataka bana ya Israel na mubu ya madiadia. Kuna na nsuka ya mubu, kele na nkonga mosi ya nene ya madiadia na zulu kuna. Mpe Moise zabukaka mubu, kasi ya vwandaka mubu ya madiadia yina yandi zabukaka; beno zaba, matiti, ya yinda, mutindu mikedi mpe bima mutindu yayi, yina yandi zabukaka kuna.” Wapi mutindu ya kele kiadi!

¹⁸⁷ Ntangu, “Masa,” Biblia me tuba, “kabukaka na lweka ya diboko ya kibakala na diboko ya kikento, mpe Nzambi salaka ti mupepe ya ngolo ya esete kukabuka.” Beno me mona? Beno me mona?

¹⁸⁸ Bawu, bawu zola kumeka na kufwanikisa yawu na mutindu ya bawu mosi. Mpe ya ke mutindu yina bawu ke kubwaka ntangu nionso, mpe bawu ke landila na kubwa. Beno zaba, bima yayi nionso!

¹⁸⁹ Mpe Cain vwandaka kifwanikisu ya kieleka ya muntu ya mabanza ya nsuni bubu yayi, yina kele muntu ya nsambulu na ngaanda. Yandi zola kusala kima mosi na mutindu ya ngaanda, kasi yandi kele. . . Yandi ke kwendaka na yinzo-Nzambi, mpe—mpe yandi ke salaka bima mingi samu na kivinga.

Ya kele kaka na Dibuundu mosi, mpe beno ke kota na Yawu ve.

¹⁹⁰ Yayi kele ba-club. Beno me mona? Beno ke kota na club ya ba-Methodiste, club ya ba-Baptiste, club ya ba-Presbytérien, club ya ba-Pentecotiste.

Kasi beno ke butuka na kati ya Dibuundu. Yinga, tata. Beno me mona?

¹⁹¹ Nyonso yayi kele ya ba-club. Bawu kele ve mabuundu. Bawu kele ba-club. Mpe ya kele ve na kima mutindu “dibuundu” ya ba-Méthodiste, to “dibuundu” ya ba-Pentecote. Ve, ya kele ve na kima ya mutindu yina. Ve, nionso yina kele yimbi. Beno me mona? Bawu kele. . . Ya kele kieleka. Bawu, bawu kele ba-club yina bantu ke vukanaka.

192 Kasi beno me butuka na kati ya Dibuundu ya Nzambi ya moyo, mpe yina kele Nzutu ya mansweki ya Yesu Klisto yina ba me sala.

193 Ntangu yayi, kasi, yawu sepelisaka Nzambi na kumonisa kinsweki ya Yandi na Abel, na lukwikilu ya kukikulumusa na menga yina tiamukaka. Oh, mu ke zola kuzwa ntangu samu na kukota na yawu mwa ntangu fioti dyaka. Beno me mona?

194 Kasi, mpe Cain, na ndwenga ya yandi nionso, muntu ya mayele mingi! “Oh,” beno ke tuba, “ntangu yayi, Mpangi Branham, nge me tuba ti yandi. . . Nge ke na kumeka na kukumisa yandi muntu ya mayele mingi?” Yandi vwandaka. Yandi vwandaka muntu ya mayele mingi. . . Beno landa mutindu ya yandi—beno landa dikanda ya yandi. Beno tala bana ya yandi. Mosi na mosi ya bawu vwandaka bantu ya science, mpe badokotolo, mpe bantu ya mayele, bawu nyonso.

195 Kasi, beno landa dikanda ya Seth, bawu vwandaka bantu ya kukikulumusa, ba-paysan, mpe ba-fermier, mpe nionso yina, landila tii na kubeba.

196 Kasi bana ya Cain vwandaka nkonga ya mayele mingi, kimvuka ya mayele. Ata mpe ba vwandaka zaba, na yina ba ke tubaka, ba lendaka kuniengisa cuivre, mpe ba vwandaka sala bisengo; mpe vwandaka mitungi. Mpe bawu vwandaka bantu ya mayele mingi.

197 Na yina—na yina, bantu yayi yankaka vwandaka zinga na kati ya batenta, mpe vwandaka twadisa mameme ya bawu, mpe vwandaka kupema na zulu ya bansilulu ya Nzambi. Beno me mona? Beno me mona? Beno me mona yinki ya vwandaka? Ntangu yayi beno landa kaka dibuta yina kuna, mpe beno tala kana ya kele ve ya kieleka. Beno me mona? Bawu vwandaka pema na zulu ya nsilulu ya Nzambi.

198 Ya kele mutindu yina Noé vwandaka ya kusola, na mutindu yina ya bantu. Ya kele mutindu yina ba katulaka Paul na kati ya kimvuka ya mameme ya yandi. Beno me mona? Ya kele mutindu yina, John Wesley, Martin Luther, mpe nyonso yankaka yina. Ya kele mutindu beno kwizaka samu na kuvwanda yina beno kele bubu yayi, beno me mona, kima mutindu mosi, ya kukikulumusa, samu na kukwikila nsilulu ya kukikulumusa ya Nzambi.

199 Ntangu yayi, beno tala, ya me sepelisa Nzambi na kukukitalisa. Ntangu yayi, Nzambi ntangu nionso ke siamisa kana ya kele Kieleka to ve. Beno me mona? Ntangu yayi, bantu mingi ke mekaka na kusala bawu mosi na kati ya kima yina Nzambi ke vwanda na difuku ya ba-kilometre na yawu. Ya kieleka. Kasi ntangu beno ke mona Nzambi kuvutuka na manima, kutuba ti Yawu kele. . . me ndima Yawu, na kutubaka, “*Ya kele kieleka, Ya kele kieleka, Ya kele kieleka,*” na yina beno zaba ti Ya kele kieleka.

200 Ntangu yayi, ntangu makabu vwandaka na zulu ya autel, Nzambi mangaka dibanza ya yandi ya mayele samu na Nzambi. Kasi ntangu Yandi monaka Abel, na nzila ya lukwikilu ya kukikulumusa samu na kukwikila ti ya vwandaka ve ba-pomme to bambuma ya bilanga, kasi ya vwandaka menga; na lukwikilu yandi kwikilaka yawu, na nzila ya luzayikisu ya Nzambi. Nzambi siamisaka Adam na kundimaka munkayulu ya yandi. Beno me mona?

201 Ya kele kisika yina beto ke banzaka na kusambila samu na bambevo, nionso yankaka. Yesu tubaka, “Kana beno kuzinga na kati ya Munu, mpe Ndinga ya Munu na kati ya beno, beno lomba kaka yina beno zola mpe beno ke kuzwa yawu.”

202 Ntangu yayi na yina beto ke na kulandila kaka, na kusalaka nswalu ntangu yayi, beto kele dyaka na baminuti makumi zole diaka.

203 Beno tala, na kilumbu ya Elie, Nzambi solaka na kubumbama Yandi mosi na kati ya muntu ya kukikulumusa. Ntangu yayi beno banza kaka na yawu. Nzambi solaka. Yina vwandaka nsodolo ya Yandi. Beno bambuka moyo, bawu vwandaka na rabbin, na banganga-Nzambi. Bawu vwandaka na bantu ya nene na bilumbu ya bawu. Ata mpe Ntinu Achab, yandi mosi, vwandaka Juif. Yandi vwandaka na bantu ya nene na yinsi, na kilumbu yina. Kasi Nzambi bumbamaka Yandi mosi na muntu ya kukikulumusa; muntu ya mayele ve; ve, muntu ya lukumu mingi ve ya yinza, soda mosi ya kulutila mayele to kima yankaka; ve, nkumbu ya nene ve. Beto zaba ve nani vwandaka tata mpe mama ya yandi. Beto zaba ve kima mosi samu na yina me tadila mbutukulu ya yandi. Yandi vwandaka kaka kisadi-bilanga mosi kuna, yina kulaka samu na lukanu ya kuvwanda profete. Nzambi nataka yandi na kuzinga yandi mosi na ntoto ya kuyuma. Kima mosi kaka beto zaba, yandi basikaka kisika mosi ve, yandi kotaka kaka mpe fundisaka systeme ya muvimba ya dibuundu. Oh, la la!

204 Mpe beno zaba yina bawu banzaka samu na yandi? “Wapi lukolo yandi me katuka?” Beno me mona? “Wapi denomination yandi kele? Yandi kele na ba-Pharisien, ba-Sadducéen,” to yinki dyaka bawu kuzwaka? Yandi vwandaka ve mosi ya bawu, kasi yandi fundisaka nionso yina. Beno me mona? Nzambi soolaka yandi na kusala mutindu yina.

205 Kasi, muntu ya kukikulumusa, yina longokaka ve. Beto ke na kisika ve ti yandi kwendaka na lukolo. Beto ke na kima ve samu na yandi. Kaka muntu ya kukikulumusa, kasi Nzambi sepelaka na kubumbama na kati ya muntu yina ya kukikulumusa. Nzambi, kuna na manima, na muntu yayi ya kukikulumusa, yina me bumbama na kati ya muntu. Beno lenda bakula yawu?

206 Nzambi me bumbama na “fanatikiki yina me longukaka ve,” na yinza. Samu, beno zaba, bawu—bawu fundisaka yandi na nionso, ti yandi vwandaka “nganga-nkisi,” Elie. Baprofete nionso ba ke fundisaka bawu, mutindu yina, beno me mona.

207 Na yina, ba fundisaka Yesu na kuvwandaka mosi, beno me mona, “Béelzebul; na kuvwandaka kilawu.” Yandi tubaka, “Na yina, nge kele kilawu. Yinga, beto zaba ti nge kele na mpeve ya yimbi. Nge me—nge me zimbisa mabanza ya nge.” Beno me mona?

208 Ya kele kisika yina Yandi tubaka na bawu, “Ntangu Ya ke kwiza na bilumbu ya nsuka, ti bawu ke vwe- . . . ya ke vwanda ya luvwenzo, kusala mutindu yina.” Yandi lemvokilaka bawu, kasi ba ke lemvokila bawu ve na bilumbu yayi ya nsuka. Ba zolaka futa bawu samu na yawu, na kukabwana ya Kukonda nsuka, “Ba ke lemvokila beno ata fioti ve, na yinza yayi to na yinza yina ke kwisa.”

209 Kasi ba vwanda tala Élie muntu ya kulawuka. Beno lenda banza ya kutelama na . . . Bakento nionso vwandaka zengisa bansuki ya bawu mutindu bakento ya bilumbu yayi, mu banza, mpe vwandaka pakula mutindu Jezabel, mama ya ntete ya yinsi. Mpe—mpe milongi nyonso vwandaka me kwenda na yinza mpe nyonso. Mpe na manima yinki salamaka? Na yina awa kwisaka kiboba Elie, yina ke fundisa nionso, kubanda na Jezabel tii na nsi.

210 “Kasi,” bawu tubaka, “beto fwana ve kuwa nge! Beto kele na ba-pasteur.”

211 Kieleka, ba zolaka sala yawu ve, kasi yandi vwandaka pasteur ya bawu na mutindu nyonso. Yandi vwandaka pasteur ya Jezabel. Yandi vwandaka zola yawu ve. Yandi zolaka vwanda na mutindu yankaka. Kasi, kasi, Nzambi yina ba me fidisa, yandi vwandaka. Beno me mona? Yandi vwandaka pasteur yina Nzambi tindaka samu na yandi. Yandi yinaka yandi, kasi yandi vwandaka kaka pasteur. Beno tala.

212 Mpe Elie kukikulumusaka yandi mosi mpe bikalaka na yina Nzambi tubaka, na mutindu yina, ti yawu sepelisaka Nzambi na kubaka Mpeve ya mutindu mosi yina ya Elie mpe silaka na kukulumusa Yawu bambala tatu kubanda kuna. Beno me mona? Amen. Mpe Yandi salaka yawu. Amen. Kieleka, Yandi salaka yawu. Kieleka. Yandi silaka Yawu, ti Yawu ke kwisa. Mpe Yawu kwisaka na zulu ya Elisée, kilandi ya yandi; na manima kwisaka na zulu ya Jean-Baptiste; mpe, landila Malachie 4, Ya zolaka vwanda dyaka awa na kilumbu ya nsuka. Beno me mona?

213 Nzambi zolaka Mpeve yina vwandaka na zulu ya muntu yina ya mfinda ya kukikulumusaka, yina me longukaka ve yina katukaka kuna na mfinda kisika mosi kuna. Mpe, na yina, Yawu vwandaka ya kutumama mingi na Ndinga ya Yandi, ti Yandi lendaka tuba, “Elie, sala *yayi*,” mpe Elie vwandaka sala yawu.

Mpe Nzambi bumbaka Yandi mosi na kati kuna, na kati ya kukikulumusa yina!

²¹⁴ Bawu nionso tubaka na yandi, “Kiboba yina ya ntama, beno vwanda ve na kima ya kusala na yandi,” mpe nionso yina.

²¹⁵ Kasi kilumbu mosi, ntangu yandi—yandi kumaka kiboba, mpe yintu ya yandi na dibandi, mpe mandefo ya yandi—ya yandi ya mpembe, vwandaka diembela, mpe mwa bansuki ya yandi yina vwandaka kubwa na zulu ya mapeka ya yandi; mwa maboko ya yandi ya kukonda, mpe nsuni ya kulemba mingi na zulu ya yawu mutindu yayi; yandi kulukumukaka kuna na nzila ya Samarie, mpe meso ya yandi vwandaka tala na zulu, na nkawa ya kutengama na diboko ya yandi ya kibakala. Yandi vwandaka ve kitoko mingi na kutala, kasi yandi vwandaka na “MUTINDU ME TUBA MFUMU” samu na kilumbu yina. Yandi tekitaka ve na Yawu. Yandi titibaka ve. Yandi tubaka ve, “Ntangu yayi, *kuluntu* Achab.” Yandi kwisaka mpe tubaka, “Ata kinoko ke kubwa ve na zulu tii mu ke bokila yawu.” Alleluia! Beno me mona? Nzambi zitisaka kukikulumusa ya yandi.

²¹⁶ Ntangu yayi, beno me mona, na yina ya vwandaka na mutindu ya kukikulumusa, mpe bantu nionso—bantu nionso vwandaka telemina yandi, muntu nionso vwandaka zolaka lufwa ya yandi. Kimvuka nionso ya balongi, nionso yankaka, vwandaka zola lufwa ya yandi, ya kieleka, na kumekaka na kukwenda ntama na yandi mpe nionso yankaka. Kasi, na kukikulumusa yina, ata ti bawu vwandaka wisana ve na bacampagne ya yandi mpe nionso yina yandi kuzwaka. Bantu nionso banzaka ti yandi vwandaka kilawu. Nzambi vwandaka bumbama Yandi mosi.

²¹⁷ Kasi ntangu ya kumaka ntangu samu na nkuna yina samu na kuyela, yina ba kunaka, Nzambi talisamaka Yandi mosi na nzila ya kufidisa Tiya na Mazulu mpe yokaka munkayulu. Nzambi bumbamaka na kati ya kukikulumusa, mpe kukimonisaka Yandi mosi diaka. Beno me mona? Ya kieleka. Yawu sepelisaka Nzambi na kusala yawu. Yandi ke salaka yawu ntangu nionso na mutindu yina. Yinga, tata. Ntangu yayi, beto ke mona ti Yandi—Yandi silaka bima yayi.

²¹⁸ Mipasi kele, bubu yayi, na mingi ya beto, beto ke zolaka mingi, beno zaba, malongi mingi ya seminere-, mpe malongi mingi ya denomination-, malongi ya lukolo, yina Nzambi lendaka ve kusadila beto. Nzambi lenda pesa muswa na muntu na kubanda kusala kima mosi, mpe kupesa yandi ministere; kima ya ntete beno zaba, yandi ke banda na kutumama na yina bayankaka ke tuba, mpe, kima ya ntete beno zaba, yandi ke vwanda ya kufuluka na kati ya kinkuku ya nene ya bima yayi. Mpe na yina Nzambi ke katula kaka maboko ya Yandi na zulu ya yandi, mpe ke bika yandi yandi mosi. Beno me mona? Beno me mona?

219 Na yina Yandi ke meka na kuzwa muntu yankaka, muntu yina ke sala yawu. Beno me mona? Yandi fwana kuzwa kima yina ke—ke baka Ndinga ya Yandi, ke baka luzayikisu ya Kinzambi mpe ke ningana ve na Yawu, ke bikana kaka kuna na Ndinga yina. Ya ke mutindu yina Yandi—Yandi ke salaka yawu. Yandi ke salaka yawu ntangu nionso mutindu yina.

220 Na yina ntangu muntu ke kuma mingi ya kulonguka mpe ya mayele mingi, ti, yandi ke meka na kutula ntendulu ya yandi mosi. Mbote, mutindu bawu ke tubaka, “Mbotika ya Mpeve-Santu,” bawu ke tuba, “oh, yina vwandaka samu na kilumbu yankaka.” To, kana ve, mbote, “Ya vwandaka ve samu na kilumbu yankaka, kasi, mu ke tuba na beno, Ya ke kwisa ve mutindu Yawu kwisaka na Kilumbu ya Pentecote. Beto ke kuzwa Mpeve-Santu ntangu beto ke kwikila.” Mpe—mpe mambu mingi ya mutindu na mutindu, beno me mona. Mpe ntangu ba ke zonzila mbotika na Nkumbu ya Yesu Klisto, bawu . . . kisika Biblia ke longaka yawu mutindu yayi; mbote, beno ke tuba, “Mbote, kasi, seminare me tuba! Mpe *Kingandi* me tuba!” Yina ke kakula. Beno me mona? Nzambi lenda ve kusadila muntu mutindu yina. Beno me mona?

221 Yandi lendaka pesa muswa ti ba niokula muntu na yinsi ya muvimba mutindu yina, mpe ba ke basisa muntu yango na ngaanda mpe ke seka yandi, mpe ke sawula yandi, mpe nionso yankaka mutindu yina. Kasi ntangu kumekama ya kieleka ke kwisa, Nzambi ke telama mpe ke siamisa Yandi mosi kaka na kukikulumusa yina.

222 Yandi ke telama kaka, mutindu felele. Nkuna, ke monana mutindu ti ya me kuma na nsuka, ya ke kufwa mpe ke kubwa na ntoto. Beno timuna mwa nkuna, mpe yawu me kupola, mpe yawu ke monana mutindu mvindu. Kasi kuna ke basika luzingu samu na kubasisa diaka felele yankaka.

223 Nzambi na kati ya kukikulumusa. Yandi ke salaka mutindu mosi. Mutindu ya kumata kele mutindu ya kukulumuka, ntangu nionso. Beno kukikulumusa beno mosi. Beno tuba ata fioti ve, “Mbote, mu ke na *yayi* mpe *yina*.” Beno ke na kima mosi ve. Beno bambuka kaka—kaka moyo, kana beno kele na lemvo ya Nzambi, beno vutula kaka matondo samu na yawu, mpe beno vwanda ya kukikulumusa samu na yawu. Beno me mona, beno landila kaka na kukikulumusa beno mosi.

224 Ntangu yayi mu ke sala nswalu, samu monte ke kele . . . Mu ke zola ve kukeba bantu ntangu ya yinda, samu mu ke zolaka ve kulembisa beno, beno me mona. Beto kele dyaka ntangu mingi ya kulutisa na sabala yayi.

225 Ntangu yayi, mpe ntangu yayi beto me mona ti bantu ke na mayele mingi mpe ya kulonguka mingi.

226 Ntangu yayi mu zola kulakisa beno yankaka. Yankaka ke kwenda ntama mingi na lweka yina yankaka, bawu ke kuma

bafanatiki, ke meka na kuvwanda misambidi. Ntangu yayi, beto zaba ti beto ke na kimvuka yina. Beno me mona? Bawu ke kwenda na lweka yina yankaka.

227 Ya kele kisika mu kele ya kuswaswana na nkonga ya bampangi yina me kwenda ntama awa ntama mingi ve na nzila ya Nsemo. Bawu, bawu lendaka ve kumona phenomene kusalama tii kuna ba salaka kimvuka mosi, na yina bawu vukanaka kuna na Canada mpe—mpe salaka nkonga ya bantu yina ba zolaka basisa mpe kusala bantumwa mpe baprofete na kati ya bawu, mpe nyonso. Mpe ya simbaka kaka ve. Beno me mona? Mpe ya ke vwanda ntangu nyonso mutindu yina. Beno me mona? Ba ke kuma . . . Ba ke kuwaka yawu samu ti bawu kele . . . ti bawu kele ve . . . Ba ke fundisaka bima yankaka, mpe—mpe bima, tii ba ke kwenda na lweka yankaka. Beno me mona?

228 Ya kele na lweka mosi yina kele ya mayele mingi, madidi mpe ke kipaka diambu ve, bawu ke mangaka nyonso kuna. Mpe bayankaka ke kwenda na lweka yankaka, na lweka yankaka na nkonga ya kufuluka na kuningana ya nzutu, mpe ke manga Ndinga.

229 Kasi Dibuundu ya kieleka ke vwanda kaka na kati-kati ya nzila. Ntangu yayi, kana beno tala, ya kele—ya kele—ya kele luzabu ya Biblia samu na yina Nzambi tubaka, mpe ya kele—ya kele ya kimpeve mingi samu na kuvwanda tiya na kati ya ntima ya yawu, mpe ya kele kaka nzila. Esaie tubaka ti ya ke vwanda mutindu yina. Yandi tubaka, “Ya ke vwanda na bala-bala ya nene . . .”

230 Mpe bankundi ya ntalu, ya santu, ya kusakumuka ya dibuundu ya ba-Nazaréen, mwa kuningana mosi ya ngolo yina Nzambi me banda, kasi yinki bawu me kuzwa? Ntangu Nzambi bandaka na kutuba na bandinga na kati ya dibuundu, bawu vwandaka misambidi ya ngolo mpe ya ngaanda mingi, ti bawu bokilaka yawu “diabulu.” Mpe beno me mona yina salamaka na bawu? Beno me mona? Beno me mona? Bawu, bawu, “Ya santu mingi kulutila beno.” Mpe—mpe na yina beto ke mona ti bima yina nionso ke kwenda na nkuna mpe ke kufwa kuna. Beno me mona? Mpe lweka yankaka.

231 Ntangu yayi, lweka mosi ke kuma fanatiki. Lweka yankaka ke kuma madidi mpe na amidon mingi.

Ntangu yayi, Esaie tubaka, “Ya ke vwanda na bala-bala mosi ya nene . . .”

232 Mpe ba-Nazaréen, mpe mingi ya bantu ya ntama ya busantu, vwandaka tuba, “Bala-bala ya nene ya lusakumunu! Nkembo na Nzambi! Beto ke na kutambula na bala-bala ya ntama!” Kasi, beno bambuka moyo, yina vwandaka ve kieleka yina yandi tubaka.

233 Yandi tubaka, “Ya ke vwanda na bala-bala mosi ya nene, mpe,” *mpe* kele kivukisi, “mpe nzila mosi.” Mpe ba ke bokila yawu ve bala-bala ya nene ya busantu, kasi, “Nzila ya busantu.”

234 Ntangu yayi, bala-bala ya nene ya busantu, bantu ke meka na kusala bawu mosi ya santu. Mpe ntangu beno ke sala yawu, ya kele kaka mutindu mu tubaka na ntwala, ya kele mutindu . . . Ya ke vwanda mutindu buse ke meka na kutula mansala ya yembe na yandi mosi, samu na kukuma yembe na yawu, kasi nkadulu ya yandi kele kaka ya buse. Beno me mona? Yandi, ya kele . . . Ya ke vwanda mutindu ngoyi-ngoyi ke na kumeka na kutula mansala ya pigeon na kati ya yandi, to ya paon, mpe ke tuba, “Beno me mona, mu kele ndeke ya kitoko.” Beno me mona, ya kele kima yina ba me sala.

235 Kasi paon ke vwanda ve na boma kana yandi ke vwanda na mansala ya paon to ve. Yembe ke vwandaka ve na boma kana yandi ke vwanda na mansala ya yembe to ve. Mutindu nkadulu ya yandi kele yembe, yandi ke vwanda na mansala ya yembe.

236 Mpe, beno me mona, bantu ya santu ke banda na kutuba, “Bakento fwana vwanda na bansuki ya yinda mpe ya basimisi ya maboko ya yinda, mpe—mpe bima nionso yina, mpe basimisi ya yinda, mpe kulwata ve lupete ya makwela to bijou ya konso mutindu yina.” Beno me mona, ya ke kuma busantu ya ba-pharisien. Beno me mona? Beno me mona? Yina—yina kele—yina kele busantu yina ba me sala. Kasi Dibuundu ya kieleka ya Nzambi ya moyo kele . . . Mpe beno tala yinki me salama na denomination yina. Ntangu yayi bawu nionso me zengisa bansuki, mutindu ba Pentecotiste, mpe—mpe nionso yina. Mpe—mpe bawu nionso, kaka, me kulwata balupete mpe nionso yankaka. Beno tala ba-Pentecotiste, ya bamvula me luta, mutindu ba vwandaka vutukila yawu, beno me mona, mpe, “Beto, dibuundu! Beto, dibuundu!”

237 Dibuundu kele Nzutu ya Klisto. Ya kele muntu mosi, na kati ya bantu yankaka, yina me butuka na Kimfumu ya Nzambi. Yina ke basika na kati. Ya ke zinga na yawu mosi.

238 Ba ke lombaka ve dimeme na kubasisa mika ya dimeme, to, kusala mika ya dimeme, mu zola kutuba. Dimeme lenda ve kusala mika ya dimeme. Yandi ke tuba, “Ntangu yayi, mfumu ya munu zola ti mu kuzwa mwa mika ya dimeme na mvula yayi. Mu fwana sala kisalu.” Ve, kima mosi kaka yandi fwana sala kele kaka kubikana dimeme. Ya kieleka. Mika ke kwisa yawu mosi . . . Yawu ke—yawu ke . . . Yandi ke basisa yawu samu . . .

239 Mpe ba me lomba beto ve na kusala bambuma. Beto fwana basisa mbuma, beno me mona, kubasisa bambuma. Beno me mona? Beto fwana kubuta mbuma. Mpe ntangu nionso beno kele mbuma ya yinti ya Nzambi, na Ndinga ya Nzambi, Ndinga ya Nzambi ke siamisa Yawu mosi. Ya ke buta mbuma ntangu nyonso yina Ndinga kele na kati kuna. Yesu tubaka, “Kana beno kuzinga

na kati ya Munu, mpe Ndinga ya Munu na kati ya beno, beno lomba yina beno zola mpe beno ke kuzwa yawu.” Beno me mona? Beno ke salaka yawu ve. Beno ke sala beno mosi ve na zulu ya yawu. Kieleka ya ke vwanda kaka kuna, mpe ke landila na kukwenda na ntwala mpe ke landila.

²⁴⁰ Ntangu yayi beto kwenda, beto sala nswalu ntangu yayi, na mwa baminuti fioti me bikana, mpe na yina beto ke sukisa.

²⁴¹ Ntangu yayi, ntangu yayi, bayankaka ke kwenda ntama mingi samu na kuvwanda bafanatiki. Ntangu yayi, bawu ke kwenda na lweka yina yankaka. Mpe bawu ke banza, kaka samu ti bawu ke dumuka na zulu, to me kuzwa mwa sensation mosi to emotion, ke tubaka na bandinga, to—to—to ke pesa profesi yina me salama ti ya kele kieleka, to kima mutindu yina, ba ke banza ti ya kele Yawu, ti—ti ba me kuzwa Yawu. Kasi, ya kele ve mutindu yina.

²⁴² Yesu tubaka, “Bantu mingi ke kwisa na Munu na kilumbu yina, mpe ke tuba, ‘Mfumu, mu pesaka profesi ve na Nkumbu ya Nge? Na Nkumbu ya Nge me sala bisalu mingi, mpe me basisa bampeve ya yimbi?’” Yandi tubaka, “Beni kwenda ntama, mu zabaka beno ata fioti ve.” Beni me mona? Yawu yina ve. Yawu yina ve, nkundi ya munu.

²⁴³ Ya kele samu na yina . . . Mpe, bandinga, kele nzikisa? Mu ke kwikilaka na kuzonza na bandinga, kasi mu ke bakaka yawu ve samu na kuvwanda nzikisa ya Mpeve-Santu. Ve, tata. Mbuma ya Mpeve kele nzikisa. Beni me mona? Yinga. Ntangu yayi, beno me mona, kikuma yawu yina mu me swaswana na mouvement ya bampangi ya Pentecote, na mutindu, ti bawu ke tubaka, “Kana muntu zonza na bandinga, yandi kele na Mpeve-Santu.” Mu ke ndimaka yawu ve. Yina kele ve kidimbu ti yandi kele na Mpeve-Santu. Beni me mona?

²⁴⁴ Mu me kuwaka bampeve ya yimbi kuzonza bandinga kaka mutindu bawu lenda, kunwa menga ya mukwa ya yintu ya muntu, mpe kubokila diabulu.

²⁴⁵ Mu me monaka ba-Indien ke baka banyoka mpe ke lwata yawu, na—na—na kati ya makinu ya mvula kuna na Arizona; ke telemisa maboko ya bawu na zulu mutindu *yayi*, mpe ke kima mbangu kuna. Ndoki ke kwisa, na ke kukitobola na dionga yandi mosi. Mpe ke tulula kilapi mosi kuna, mpe ya ke sonika bandinga yina me zabana ve, mpe ke pesa ntendulu na yawu. Beni me mona?

Na yina, beno tuba na munu yawu ve. Mu me zaba yawu mingi. Beni me mona?

²⁴⁶ Na yina mbuma ya Mpeve kele nzi-. . . Yesu tubaka, “Na nzila ya bambuma ya bawu,” ve na bandinga to ba-émotion, “kasi na nzila ya mbuma ya bawu beno ke zaba bawu.” Beni me mona? Na yawu yina kele mbuma ya Mpeve. Ya kele Nzambi ke kukimonikisa Yandi mosi na kati ya kukikulumusana, na lembami,

mpe konso kilumbu mutindu mosi. Ya ke kima mosi samu na yawu, muntu yina ke vwandaka kaka na Ndinga. Konso ntangu yina yandi ke mona Ndinga, yandi ke ndima Yawu na “amen,” kukondwa kutala yina bantu yankaka ke tuba. Ti, yandi ke kwikila Yawu, beno me mona. Mbote mingi. Beno me mona?

²⁴⁷ Kasi beto ke kwenda ntama mingi, na yina, samu na kupema na zulu ya bufanatiki, mpe Satana ke kota na kati ya bantu. Yina kele kisalu ya Satana. Mpe yandi me zaba mbote kisalu ya yandi. Mpe yandi ke kota na kati-kati ya bantu, ke sala ti bawu kubanza ti bawu me kuzwa Yawu kaka samu ti bawu lenda dumuka na zulu. Mpe na yina kuyina mfinangani ya beno? Ve. Beno me mona? . . . ku—kutuba mambu, mpe kutuba bandinga kaka kitoko, mpe mambu ya mutindu yina.

²⁴⁸ Mpe, beno bambuka moyo, beno lenda tuba na bandinga ya kieleka ya Mpeve-Santu mpe dyaka kuzwa ve Mpeve-Santu. Biblia me tuba yawu. “Mu lenda tuba bandinga ya bantu mpe ya Bawanzio, mpe kana mu ke na zola ve, ya ke na mfunu ve. Mu me kuma mutindu ngoma, mpe ngunga yina ke salaka makelele.” Ya Ntete ya Corinthiens 13. Beno me mona? Na yina beno ve . . . Yawu yina ve, beno me mona.

²⁴⁹ Ba-Methodiste tubaka, “Ntangu beto bokaka, beto kuzwaka Yawu,” kasi bawu kuzwaka Yawu ve. Ba-Nazaréen tubaka, “Ntangu bawu vwandaka zinga luzingu ya busantu, bawu kuzwaka Yawu,” kasi bawu kuzwaka Yawu ve. Ba-Pentecotiste tubaka, “Beto ke zonzaka na bandinga; beto me kuzwa Yawu,” kasi bawu kuzwaka Yawu ve. Beno me mona? Beno me mona?

²⁵⁰ Nzambi, ke kukimonikisa Yandi mosi, ve na ba-sensation. Ve, ti. . . Ba-sensation, kasi, ya kele na Yawu. Beno me mona kisika yango? Ya ke kuma kaka Ya kukikulumusa mingi tii muntu nionso lenda mona Yawu, kana beno—kana beno ke meka ve na kutula, kukotisa mabanza ya beno na Yawu, beno me mona, mpe mabanza ya beno. Yawu kele Nzambi.

²⁵¹ Ntangu yayi, mpe na manima bawu me kuma nkonga ya bafanatiki. Na yina, *awa* kele bayina kele madidi mpe na mambu ya ngaanda na lweka yayi; *awa* kele bafanatiki na lweka yankaka; mpe *awa* ke kwenda na ntwala Kento ya makwela na kati ya nionso yayi, na kubokilaka na balweka nyonso zole. Ya kele kieleka. Nzambi ke siamisa Yawu mutindu Yandi ke kwenda na ntwala, Ndinga ya Yandi.

²⁵² Ntangu yayi, oh, mu fwana bika yayi samu ti mu kele na mingi awa. Mpe mu—mu me . . . Ntangu ya munu me luta. Mu ke sala kaka nswalu na mutindu mu lenda ntangu yayi.

²⁵³ Kubanda Eden, kubanda Eden ya vwandaka, ba—ba pesaka profesi ti Mesiya ke kwisa; tuka na Eden.

²⁵⁴ Ntangu yayi mu ke bika mwa Masonuku ya munu yina mu sonikaka awa, mpe banoti, kaka samu na kumanisa Nsangu, na ntangu ya mbote, kana mu lendaka. Nzambi ke bumbama na kati

ya kukikulumusana. Ntangu yayi, mu ke zonga na nswalu, kasi, dyaka, mu—mu zola ti beno simba yayi. Benoni me mona?

²⁵⁵ Kubanda Eden, ba tubaka na profesu ti Mesiya ke kwisa. Ba zabisa na ntuala mutindu ya muntu Yandi ke vwanza. Beto lenda vwanza awa ntangu ya yinda. Benoni zaba Biblia, yina Yandi ke vwanza, mutindu ya muntu yina Yandi ke vwanza. Moise tubaka, “Mfumu Nzambi ya beno ke basila beno Profete, mutindu munu.” Bawu zabaka ti Mesiya yina zolaka vwanza profete, mutindu ya ministere Yandi zolaka vwanza na Yandi. Baprofete nyonso zonzaka na yina Yandi ke sala. Ba zonzaka na yawu na bidimbu. Mpe yawu lutaka na zulu ya yintu ya bawu, kasi yawu lutaka na yisi ya bantu yankaka. Benoni me mona? Benoni me mona? Ya lutaka na nsi ya mosi, mpe na zulu yankaka. Benoni me mona?

²⁵⁶ Na ntangu Yandi kotaka na kisalu ya ntangu, bantu na bayina ba fidsaka Yandi vwanza na ntendulu ya bawu mosi samu na yina Yandi zolaka vwanza, na ntendulu ya mabanza ya bawu mosi.

²⁵⁷ Biblia me sobaka ata fioti ve. Biblia kele ntangu nyonso mutindu mosi. Kikuma yawu yina mu ke tuba, “Masonuku ke tuba, mpe mu ke bikana na Yawu, ‘Biblia kele ntendulu ya muntu mosi ve.’”

²⁵⁸ Na yina, ba-Methodiste, ba-Baptiste, ba-Pentecotiste, benoni meka ve na kutula ntendulu ya beno na Yawu, benoni ke tuba, “Ya zola ve kutuba Yawu. Ya zola kutuba *yayi*.”

²⁵⁹ Ya zola kutuba kaka yina Yawu me tuba, ya kieleka kaka. Muntu mosi tubaka, “Wapi mutindu ya lenda salama?” Mu zaba ve wapi mutindu. Ya kele munu ve na kutuba yawu. Ya kele Nzambi yina ke kebaka yawu. Yandi kele Yandi Yina tubaka yawu, munu ve, benoni me mona, mpe Yandi ke kebaka Yina kele ya Yandi.

²⁶⁰ Kasi ntangu yayi, kasi, Mesiya yayi pesamaka na profesu. Baprofete tubaka kieleka mutindu Yandi ke kwisa, yina Yandi ke sala ntangu Yandi ke kwisa. Kasi, ntendulu ya bawu mosi sobaka yawu, na kati ya bantu! Mpe ntangu Yandi kwisaka, Yandi vwanza na mutindu ya kukikulumusana, na kati ya kukikulumusana, ti kimvuka nyonso ya dibuundu bulaka disakuba na yawu. Ya kieleka? Kuna, bantu yina longukaka . . .

²⁶¹ Muntu mosi lendaka vwanza mulongisi ve, nganga-Nzambi, tii kuna yandi butukaka na dikanda mosi, na manima ya Levi. Mpe, benoni banza kaka, nkooko ya nkooko ya nkooko ya nkooko ya nkooko ya nkooko ya nkooko ya nkooko ya yandi vwanza nganga-Nzambi, ya vwanza lutisa ntangu ya yandi nyonso na kati ya Ndinga yayi, na kati ya tempelo, kilumbu mpe mpimpa.

²⁶² Mutindu nganga-Nzambi ya Catholique to longi yina kele longi na tata tii na mwana, ya kukangama kubanda bansungi, na dibuundu mosi, mpe nyonso yina, “Nkooko ya nkooko ya nkooko

ya munu vwandaka évêque ya ba-Methodiste. Nkooko ya munu ya bakala vwandaka évêque, mpe nionso yina.” Beno me mona?

²⁶³ Nionso yina, ba vwandaka zinga kaka na kati ya Ndinga, kasi ba salaka mutindu ya bawu mosi samu na yawu. Mpe bana ya bawu ndimaka yawu na mutindu mosi batata longaka yawu. Tii, batata longaka yawu na ngaanda ya nzila ya kieleka, mpe ba me sala na yawu organisation mosi, tii, ntangu Mpeve mekaka na kutsalisa Kieleka, ba lendaka ve kundima Yawu.

²⁶⁴ Mpe yina ke mutindu mosi bubu yayi. Mu ke tuba ve samu na kulwadisa, kasi ya kele kieleka. Ya kele mutindu mosi bubu yayi. Ba ke kumisaka yawu mingi—mingi mpasi, mpe—mpe mutindu yankaka. Ba ke longaka bawu . . . Kaka mutindu ba me tuba, “Nzambi ke vwandaka ve na batekolo.” Beno zaba yawu? Nzambi kele na bana ya babakala, mpe Yandi kele na bana ya bakento, kasi ve batekolo ya babakala mpe batekolo ya bakento. Muntu nionso fwana futa ntalu mosi mpe kukwisa mutindu mosi. Kaka mutindu tata ya beno salaka, mutindu yina beno fwana sala.

²⁶⁵ Ntangu yayi, na yina, Yandi vwandaka kukikulumusa mingi. Ntangu Mesiya yayi. . . Samu ti bamvula mafunda yiya, konso profete kuzonzaka samu na Yandi; David vwandaka yimba samu na Yandi, mpe na bantangu nyonso. Mpe ntangu Yandi kwisaka, bantu vwandaka na dibanza ya bawu mosi, yina Yandi fwana sala, mutindu Yandi ke sala. Nionso vwandaka ya kutendula, ya kuyema na bifwanikisu mpe nionso, tii, ntangu yandi kwisaka na mutindu yina ya kukikulumusa, ya me bebisa kaka—kaka théologie ya bawu. Beno me mona, bawu zabaka yawu ve.

²⁶⁶ Yandi kwisaka landila Ndinga. Ntangu yayi, beno ke kwikila ti Nzambi zonzaka na nzila ya baprofete, ti Mesiya ke kwiza mutindu yayi? Ya kele mpasi mingi ti beto me kuzwa ve pene ya ngunga mosi diaka na ntwala ya beto samu na kutendula mutindu ya vwandaka. Beno me mona? Beto nionso zaba mutindu ya vwandaka, ata ti, mingi ya beto. Wapi mutindu Nzambi tubaka ti Yandi ke kwisa, mpe wapi mutindu ti, “Nge, Bethlehem na Judée, nge kele ve ya kulutula fioti na kati ya . . .” Mpe landila kaka mutindu yina, mpe wapi mutindu Yandi ke sala, mpe yina Yandi ke sala. Beno me mona?

²⁶⁷ Mpe, kasi, Yandi vwandaka ya kukikulumusa mingi! Tii, bantu yina ya nene ya mayele vukisaka nionso, tii bawu kondwaka yawu. Kasi, beno zaba ti Yesu kwizaka ve ya kuswaswana na Ndinga. Yandi kwisaka landila Ndinga, kasi ya kuswaswana na ntendulu ya bawu. Beno me mona? Yandi longaka bima yina vwandaka telemina malongi ya bawu ya dibuundu samu na Yandi.

²⁶⁸ Ntangu yayi, bawu tubaka, ntangu yayi, mutindu, “Ntangu Mesiya ke kwisa, ya kieleka, Yandi ke kwisa na tempelo mpe ke tuba, ‘Caïphe,’ to yina kele nganga-Nzambi ya mbuta, ‘Mu me

kuma.' Yandi ke kwisa na mafuku kumi ya Bawanzio kintwadi. Nzambi ke tuba, 'Mbote mingi, bankundi, kuna na nsi, beno kele kieleka dibuundu ya ngolo. Beno kele bantu ya Munu. Mu ke balula manivelle awa mpe mu ke kulumusa ba-corridor ya Mazulu. Mu ke fidisa Mesiya na beno, na suka yayi. Mu ke telemisa yawu kuna na kati ya lupangu, mpe bantu nionso ke kwenda kuna.' Ba ke tuba, 'Docteur *Kingandi*, nge mpe Docteur *Kingandi*, beno nionso lenda telema awa na ntswala, samu na kupesa Yandi mbote ntete, beno me mona.'"

²⁶⁹ Ntangu yayi ya kele mu banza kima mutindu mosi ba ke na kubanza bubu yayi. Ntangu yayi, mu zaba ti ya kele mwa. . . Ya ke wakana fioti nganzi. Kasi mu ve. . . Mu ke na kumeka na kubasisa kima mosi.

²⁷⁰ "Mpe—mpe, na yina, ya ke vwanda mutindu yina. Mpe kana ya ke salama ve mutindu yina, ya ke mbote ve; ya kele mbeni ya Klisto. Beno me mona? Kana ya ke salama ve kaka mutindu yina, ya kele mbeni ya Klisto, beno me mona, na yina ya ke vwanda ve. Mpe na yina, kuna, ya ke vwanda. . . Na yina, kima yankaka ke kulumuka, ke vwanda pene ya mafuku-kumi-ya-Bawanzio kintwadi, na ba-fanfare ya bawu. Mpe ba ke kulumuka kuna na kati ya lupangu, kisika Salomon tungaka tempelo, mpe, oh, bisika nionso awa, kisika yayi ya santu kisika basantu mpe bantu ya ndwenga kufwaka, mpe nionso yina!"

²⁷¹ "Yinga," Yesu tubaka, "beno bantu ya luvunu! Beno bana ya diabulu!" Yandi tubaka, "Beno ke lengulaka bantoni ya baprofete, mpe batata ya beno tulaka bawu na kati kuna." Ya kele kieleka. Ya kele kieleka. Beno me mona? "Bantu yikwa ya mbote mpe baprofete ba fidisaka ba me tinda na beno, mpe diaka beno kufwaka bawu!" Beno me mona? Kasi yinki Yandi ke bokila "bantu ya mbote"? Bawu, yina bawu ke bokilaka, "bafanatiki mpe bilawu." Yinga.

Kuna, bawu banzaka ti ya ke kwisa mutindu yina.

²⁷² Kasi, ntangu, Yandi kwizaka na kati ya kidikilu, butukaka na mwense, na mwa kisadi mosi mabaya samu na tata ya lundi, mpe mwana-kento ya fioti, yina zabanaka ve. Beno me mona, ve mwana-kento ya banganga-Nzambi ya mbuta, to yinki dyaka. Yandi—Yandi kwisaka mutindu. . . na mwa mama yina vwandaka zinga kuna na—na mwa yinsi yina ya fioti, ba vwandaka bokila Nazareth. Mpe kaka mwa mufwidi mosi ya bakala; kento ya yandi kufwaka. Yandi vwandaka na bana; Joseph. Mpe—mpe yandi vwandaka fiancée. Mpe Yandi kwisaka na lukumu ya yimbi, na kubanda. Bawu tubaka ti Yandi butukaka mwana ya makangu. Oh, la la!

²⁷³ Yina vwandaka ngolo mingi samu na mutindu ya bawu ya kulengula. Beno me mona? Malongi ya bawu ya bumuntu lendaka ve kumina yawu. Ntendulu ya bawu ya Masonuku

zabaka diambu mosi ve samu na yawu, kasi yawu vwandaka kaka MUTINDU ME TUBA MFUMU. Oh, la la!

²⁷⁴ Kubanza yawu kaka, mu ke tekita, mpe kumona diambu ya mutindu mosi kusalama diaka. Nzambi ke sobaka ve.

²⁷⁵ Ya kele dezia ngunga ya kumi na zole, kasi mu . . . Beno zola kaka, to, mu fwana sukisa, to mu lenda landila kaka? [Dibuundu me tuba, “Ve.”—Mu.] Ya kele . . . Matondo na beno. Beno vwanda kaka swi mwa fyoti, beno me mona. [“Landila kaka na kukwenda.”] Ntangu yayi, yayi kele, mu ke na kutula lufulu ya kima mosi awa samu na Nsangu yina ke na kwiza, beno me mona. Mpe mu ke meka na kubika beno kaka nswalu, mu banza na baminuti kumi to kumi na tanu yina ke landa, kana beto lenda. Nzambi sakumuna beno.

²⁷⁶ Beno tala, ntangu yayi, ya kele ya kukikulumusa mingi, ti ya—ya—ya me kondwa diambu ya mfunu, samu na bawu. Kasi ya me fwanana na kidima ya Nzambi. Beno me mona, yawu me fwanana na Ndinga. Yandi me kwisa kaka ya kieleka mutindu Yandi tubaka. Kasi, bawu, ntendulu ya bawu vwandaka ya luvunu. Ntendulu ya mvulusi na ntangu ya Moise vwandaka ya luvunu. Ntendulu na ntangu ya Noé vwandaka ya luvunu, beno me mona, kasi Nzambi ke kwisa landila Ndinga ya Yandi.

²⁷⁷ Mpe kuna Yesu kwizaka, mpe Yandi—mpe Yandi longaka bima yina vwandaka ya kuswaswana. “Kana Nge kele Mesiya, sala *yayi-mpe-yayi*,” beno me mona. “Kana Nge kele, kulumuka na kulunsi mpe lakisa yawu na beto ntangu yayi.” Beno me mona? Kasi Nzambi ke salaka ve bansaka. Nzambi ke salaka kaka bima yina kele ya kulunga mpe ya mbote.

²⁷⁸ Bawu banzaka ti Muntu ya mutindu yina zolaka kwiza kintwadi na nkonga ya nene ya Bawanzio. Kasi Yandi kwizaka na kati ya kidikilu. Mpe, na malongi ya bawu ya kulengula, ya vwandaka kiadi samu na muntu ya mumesanu na kubanza ti Nzambi ya Ngolo nionso, Yehowa ya nene ya ngolo, Yina kuzwaka ntoto mpe vangaka bima nionso, lendaka ve kuyidika kisika ya kulutila kitoko samu na Mwana ya Yandi Mosi kubutuka, kulutila kidikilu ya bangombe kuna na zulu ya matufi ya bibulu. Wapi mutindu . . .? Beno me mona?

²⁷⁹ Yinki ya vwandaka? Nzambi na kati ya kukikulumusa. Ya kele yina salaka Yandi nene mingi. Beno me mona, bandongosolo ya bumuntu lendaka ve kukikulumusa mutindu yina; beno me mona, ba lendaka ve kuvibidila yawu. Kasi Nzambi kele nene mingi ti Yandi kukikulumusaka Yandi mosi kuna, kukondwa bilele ya kulwatisa Mwana ya Yandi Mosi. Beno banza na yawu! Mpe yinza . . . Ya vwandaka ve na kisika na yinzo ya banzenza. Mpe yandi kwendaka na kidikilu ya bangombe, mwa—mwa muluku mosi, mutindu yina, kuna na kati ya mongo. Mpe kuna na zulu ya mbeto ya matiti kwisaka Mwana ya Nzambi. Oh, yina vwandaka ya kuswaswana mingi na lukutakanu yina kuna . . .

280 Mpe mama ya Yandi vwandaka na kivumu. Yandi kumaka na kivumu, oh, bangonda mingi na ntwala bawu kuvwanda ba-fiancé, to, bawu kwelana. Beno me mona? Yandi kumaka na kivumu. Mpe bantu monaka yawu, mpe bawu zabaka ti yawu vwandaka mutindu yayi. Mpe, Marie, na kati ya ntima ya yandi, yandi zabaka yina vwandaka salama.

281 Mpe Joseph vwandaka bakula ve. Kasi Wanzio ya Mfumu kwizaka na yandi na mpimpa, na kutubaka, “Joseph, nge kele mwana ya David. Kuvwanda ve na boma ya kubaka Marie kento ya nge, samu ti ya kele ve na kima ya yimbi, kasi ya kele ya Mpeve-Santu.” Yina sukisaka dyambu. Bakala yango, Joseph, ya kukwikama mutindu yina na Nzambi, tii Nzambi lendaka zonza na yandi.

282 Kasi bubu yayi beto ke kanga ngolo mingi bakazaka ya beto ya dibuundu ti muntu mosi ve lendaka tuba na beto, na ngaanda ya kimvuka ya dibuundu yina beto kele. Mu ke zola ve kulwadisa to kudasuka, na yina mu ke kwenda ntama mingi ve. Beno tala. Kasi beno ke bakula yina mu zola kutuba. Beno tala.

283 Kidikilu vwandaka ya kiadi, samu na bawu, bampeve ya kulengula. Beto kele ve na nsangu mosi ti Yandi vwandaka na lukolo kilumbu mosi; mpe diaka, na bamvula kumi na zole, Mwana-bakala mosi ya kukikulumusa kotisaka muvusu na banganga-Nzambi na kati ya tempelo, na nzila ya malongi ya Yandi. Oh, la la! Yinki ya vwandaka? Nzambi bumbamaka Yandi mosi na kati ya kukikulumusa. Mu ke kuwa kaka musambidi na ntangu yayi. Nzambi yina vwandaka bumbama Yandi mosi na kati ya kidikilu. Nzambi bumbamaka Yandi mosi na Mwana mosi ya fioti. Beno me mona? Beno tala mbote, ya zolaka monisama, na manima ya mwa ntangu fioti, na mutindu nionso, beno me mona.

284 Yandi zolaka ta-. . . Yandi. . . na yina Yandi kwendaka na babala-bala. Bibuti, kukondwa ntembe, lendaka zonza mpe kutuba, “Kusakana ve na mwana yina. Kuvwanda ve na kima ya kusala na yandi. Mama ya yandi kele kima mosi ve kasi ndumba mutindu bandumba nyonso, beno me mona. Mpe, tata na mama, bébé butukaka. . . Ntete bawu kwelana, yandi kumaka na kivumu. Kuwanda ve na kima ya kusala na yandi.”

285 Yinki Marie banzaka! Kasi, nionso, ata ti nionso yina bantu ya ngaanda banzaka, yandi vwandaka longuka mambu yayi nionso. Ba bumbaka yawu na kati ya ntima ya bawu. Ba zabaka. Ba lendaka tuba kima mosi ve ya yimbi samu na yawu.

286 Nzambi ke zonzaka na muntu ya Yandi, bantangu yankaka, ke tuba, “Vwanda swi. Kutuba kima ve samu na yawu.”

287 Ya kele na bantu na lukutakanu ya munu yina tubaka na munu, “Mbote, kana nge kele kisadi ya Klisto, nge zaba ti *yayi* ke na kusalama kuna.”

288 Kieleka, mu zabaka yina vwandaka salama. Kasi na yina yinki nge ke sala ntangu Yandi ke tuba, “Vwanda swi. Kutuba kima mosi ve na zulu ya yawu?”

289 Ya vwandaka na babakala yina vwandaka na munu kilumbu yina, mpe mu talisaka bawu, na buku mosi. “Kima yina ba tubaka, bamvula me luta,” mu tubaka.

Yandi tubaka, “Mbote, mu vwandaka bakula yawu ve.”

290 Mu tubaka, “Beni me mona kuna?” Yawu yayi, ya vwandaka kuna, ya kusonika mbote mpe nionso yina, ntangu yawu salamaka kuna. Bantu mingi monaka yawu na buku kuna. Mu tubaka, “Ya ke salama ti yayi ke salama mutindu yayi mpe mutindu yina.”

291 Bawu tubaka, “Mbote, samu na yinki nge tubaka kima mosi ve samu na yawu?” Ya zolaka sa- . . . Yawu zolaka vwanda mutindu yina. Beni me mona?

292 Mpe Joseph zabaka luswaswanu. Yandi zabaka Bébé yina vwandaka ya Nani. Marie zabaka ya Nani Yandi vwandaka. Yesu zabaka Nani Tata ya Yandi vwandaka. Yinki Yandi tubaka? “Mu fwana sala bisalu ya Tata ya Munu.” Ve kuzenga mabaya mpe—mpe kusala kielo; kasi kusala kisalu ya Tata ya Yandi. Amen. Yandi tubaka yawu na mama ya Yandi, “Nge lenda bakula yawu ve, Munu, ya kele ntangu ya Munu ya kusala kisalu ya Tata ya Munu?”

293 Ntangu yayi, bawu banzaka, “Mwa Mwana yayi ya kilawu . . .” Mwana nionso ya makangu kele mutindu kima mosi ya ngitukulu, yina ke yitukisa, na mutindu nionso. Mpe yawu yina, beni me mona, kasi, Nzambi bumbamaka Yandi mosi. Beni kuwa. Nzambi bumbamaka na yina ba banzaka, na yinza, mutindu, “Mvindu, kubeba, ya makangu.”

294 Beni tala, Nzambi me bumbama Yandi mosi na kati ya kubeba ya nkuna ya kufwa, samu na kubasisa luzingu. Beni me mona? Beni me bakula yawu?

295 Nzambi ke bumbama Yandi mosi na kati mwa kento mosi, yina ke sukulaka bilele. To bakala mosi ya mumesanu yina ke kwendaka na madia ya yandi ya midi na nsi ya diboko ya yandi, ke yamba kento ya yandi mpe bana ya yandi, na ntuala ya kukwenda, mpe ntangu yankaka Yandi ke bumbama na kati ya muntu yina samu na kusala kima yina archevêque ke zaba ata fioti ve. Beni me mona? Beni ke kuwa Yandi ve kubula mpungi mpe kumwangisa yawu. Yandi, Nzambi, ke bakaka kaka nkembo, kaka nionso yina. Bantu ya kukikulumusa ke kuwa yawu mpe ke sepela, beni me mona.

296 Ntangu yayi, Nzambi vwandaka bumbama Yandi mosi na kati ya kukikulumusa ya Bébé, vwandaka bumbama Yandi mosi na kati ya dibuta mosi ya mumesanu. Nzambi! Mpe banganga-Nzambi, mpe bantu ya nene, bantu ya ngangu, bantu ya kulutila

mayele, mpe—mpe bawu nionso, mpe Herode, mpe nionso yina, ya kilumbu yina, mpe ba-Neron, mpe bawu nionso monaka yawu ve. Nzambi yina me bumbama na kati ya kukikulumusa.

297 Ntangu yayi, na nswalu nionso. Jean Baptiste, na Ésaïe 40. Beto lenda baka yawu kana beno zola. Malachie 3. Nionso, yinga, beno sonika yawu kana beno zola. Esaie 40, nionso, beno zaba, beno tuba ngemba na . . . mutindu ya kele. Mu banza ti mu . . . Ya lenda vwanda mbote ti mu—mu—mu ke tanga yawu kaka awa, kana beno ke—beno kele na ntangu mingi. [Dibuundu me tuba, “Amen.”—Mu.] Beto sala yawu, na mwa ntangu fioti. Beto ke baka awa na Buku ya Esaie, kapu 40, mpe—mpe kutanga awa mpe kumona kaka yina yandi ke tuba samu na yayi ntangu yayi. Beno tala awa, “Beno pesa kikesa, beno pesa kikesa na bantu ya munu.” Ntangu yayi, beno bambuka moyo, yayi vwandaka bamvula bankama sambwadi na kumi na zole. Beno tala ndonga kuna, beno me mona. Bamvula bankama sambwadi na kumi na zole na ntuala yandi butuka, awa kele profete yina ke zonzila yandi.

Beno pesa kikesa, beno pesa kikesa na bantu ya munu, me tuba MFUMU.

Beno pesa kikesa na bantu ya Jérusalem, mpe beno boka na yandi, ti ntangu ya yandi ya kimpika me mana, ti disumu ya yandi ya nkú me suka: samu ti yandi me kuzwa . . . lemvo mbala zole na diboko ya MFUMU na masumu ya yandi nionso.

Ndinga ya yandi . . . vwandaka boka na ntoto ya kuyuma, Beno yidika nzila ya MFUMU, beno sungika nzila ya yandi na ntoto ya kuyuma, nzila ya nene samu na Nzambi ya beto.

Mpe beno fulusa ntoto na mabengi, mpe beno kulumusa bamongo nionso: mpe banzila nionso ya lweka kukuma kusungama, mpe mabulu nionso . . . ke vwanda lepele:

298 Oh, la la, la la! Wapi mutindu ya muntu yina ya zolaka vwanda! Beno me mona? Ntangu yayi beno baka Malachie, na munu, Buku ya nsuka ya . . . ya nsuka ya baprofete na kati ya Ngwisani ya Ntama. Ntangu yayi, na Malachie, beno kuwa awa. Malachie ke vutukila yawu, kaka na ntangu ya nsuka, samu beno zimbana yawu ve. Malachie, kapu ya 3.

Tala, mu ke tinda munati-nsangu ya munu, mpe yandi ke yidika nzila na ntuala ya munu: mpe Mfumu, yina beno ke sosa, ke kwisa mbala mosi na tempelo ya yandi, ata mpe munati-nsangu ya ngwisani, yina beno ke vingila: tala, yandi ke kwisa, me tuba MFUMU ya makesa.

299 Diaka kuna ba ke tubila Jean, “Mu ke fidisa munati-nsangu ya Munu na ntwala ya Munu, samu na kuyidika nzila.” Yesu tubilaka yawu, na Matthieu 11:10, Yandi tubaka:

Kana beno lenda bakula yawu, ya kele yina ba zonzilaka, *Tala, mu ke fidisa munati-nsangu ya munu na ntwala ya kizizi ya munu, . . .*

300 Beno me mona? Ya kele kieleka. Ntangu yayi, mutindu nyonso yayi ke zonzila yawu! Ntangu, bamvula nkama sambwadi, muntu mosi zolaka kwisa na ntwala ya Mesiya. Kasi ntangu yandi kotaka na kisalu, na kati ya kukikulumusa, ba kondwaka yandi. Ba kondwaka yandi.

301 Ntangu yayi, beno bambuka moyo, yandi vwandaka mwana ya nganga-Nzambi. Mbote, beno tala mutindu yina vwandaka kiadi samu na yandi ve samu na kulanda kisalu ya tata ya yandi, kuvutuka na seminere. Kasi kisalu ya yandi vwandaka ya kulutila mfunu. Ntangu yandi vwandaka na bamvula yivwa, yandi kwendaka na ntoto ya kuyuma. Mpe yandi basikaka kuna, mpe vwandaka longa. Bawu kondwaka yawu. Yandi vwandaka ya kukikulumusa mingi, samu na malongi ya bawu ya nene ya kulengula samu na kukwikila muntu ya mutindu yina. Bawu banzaka, ntangu muntu yayi kwizaka . . .

302 Wapi mutindu, “Bisika nyonso ya zulu ke kulumuka, bisika nionso ya nsi ke kuma ya kumata, bisika nionso ya mabulu ke kuma ya kusungama”? David monaka yawu, mpe tubaka, “Miongo vwandaka lemuka mutindu mwa mameme ya babakala, mpe matiti vwandaka bula maboko ya bawu.” [Mpangi Branham me bula maboko ya yandi bambala mingi—Mu.]

303 Yinki? Yawu salamaka? Mwa kiboba mosi ya mandefu mingi mutindu yayi, yina longukaka ata fioti ve, yandi vwandaka me lwata kitini ya mpusu ya mameme, basikaka na kutekitaka na ntoto ya kuyuma ya Judée, na kutubaka, “Beno balula ntima, samu ti Kimfumu ya Mazulu me kuma pene-pene. Mpe beno nkonga ya banioka, beno banza ve na kutuba, ‘Mu kele ya organisation mosi.’ Nzambi kele na kiyeka ya kubasisa na matadi yayi bana samu na Abraham.” Oh!

“Mbote, ya kele yandi ve kuna. Beto zaba ti ya kele yandi ve.”

304 Kasi yawu vwandaka yandi! Beno me mona, yandi vwandaka vedisa nzila. Beno me mona? Ya kele na ntangu yina bisika ya mabulu kumaka ya kusungama. Ya kele kisika yina bisika ya zulu kulumukaka. “Beno banza ve ti beno kele na Abraham mutindu tata ya beno. Beno banda ve na kutuba na munu kima ya mutindu yina, samu ti Nzambi kele na kiyeka ya kubasisa na matadi yayi bana ya Abraham.” Bisika ya zulu kukulumukaka. Oh, la la! Yawu yina. Yinga. Beno me mona luswaswanu? Yandi tubaka ti yawu yina ke salama.

305 Mpe ntangu bawu kwisaka, bawu banzaka, oh, la la, bawu kubamaka samu na kuyamba yandi, kana yandi

kwisaka na organisation ya bawu mosi. Kasi samu. . . Yandi kwisaka mutindu yina, na mutindu ya kukikulumusa. Kasi, na kutendulaka Masonuku, bisika ya zulu kulumukaka. Bawu zolaka ve kundima yawu, kasi yawu kulumukaka.

³⁰⁶ Oh, yandi sembaka bawu. Yandi ningisaka bawu. Yandi tubaka, “Beno kele nkonga ya bitupa! Beno banioka na kati ya matiti! Mu ke tuba na beno, disoka kele na nsimbulu ya yinti. Mpe konso yinti yina ke basisa ve bambuma, ba ke zenga yawu mpe ba ke losa yawu na tiya. Kieleka mu ke botika beno na masa, kasi Mosi ke na kukwisa na manima ya munu, Yandi kele ya ngolo mingi kulutila munu; Yandi ke botika beno na Mpeve-Santu mpe na Tiya. Mpe nkawa ya Yandi kele na diboko ya Yandi. Yandi ke kombula bisika nionso. Mpe Yandi ke lengu- . . . ke losa matiti na tiya; mpe ke nata blé na kibumbulu.” Amen.

³⁰⁷ Yina vwandaka ntangu bisika ya mabulu kumaka ya kusungama, beno me mona, kasi bantu vwandaka bakula yawu ve. Kasi ya kele kaka kieleka ya kusungama na Ndinga, kieleka kaka mutindu Ndinga tubaka yawu. Ya kukikulumusa mingi, ti bawu kondwaka yawu. Bawu kondwaka na kumona yawu.

³⁰⁸ Beno vwanda ve ya kufwa meso mutindu yina. Beno me mona? Beno vwanda ve ya kufwa meso mutindu yina. Na yina, beno kuwa, ntangu yayi.

³⁰⁹ Bawu kondwaka yawu. Yandi vwandaka ya kukikulumusa mingi, samu na bakundima ya bawu ya mumesanu samu na muntu ya mutindu yina, ti yandi kondwaka yawu. Diaka, yinki ya vwandaka? Nzambi, yina kele Ndinga, bumbamaka na kati ya kukikulumusa; nganga-nzambi ve na col ya yandi ya kubaluka na manima, yina vwandaka na mayele, ya kulunguka.

³¹⁰ Yesu yufulaka bawu kima ya mutindu mosi. Yandi tubaka, “Yinki beno kwendaka kutala kuna?” Ntangu bilandi ya Jean kwisaka kuna. Yandi tubaka, “Yinki beno kwendaka kutala? Beno kwendaka tala bakala yina me lwata robe ya banganga-Nzambi, beno zaba, mpe bilele ya kitoko,” Yandi tubaka, “longi ya mutindu yina—yina—yina—yina?” Yandi tubaka, “Beno kwendaka kutala yawu?”

³¹¹ Yandi tubaka, “Ve. Bayina ke yambaka ba-bébé, mpe, beno zaba, mpe bawu ke zika bantu ya kufwa. Bawu, bawu zaba kima mosi ve samu na mbele ya yinda ya maboko zole na kisika ya bitumba. Bawu vwandaka kuna ntangu ya kumaka ntangu ya kuzonza nsamunu mosi ya mayele, na club ya Kiwanis to kima mosi, beno zaba. Yawu kele nionso mbote kuna. Kasi ntangu ya ke kuma ntangu ya kukwenda na bitumba, samu na kukutana na yawu, bawu zaba kima mosi ve samu na yawu. Bawu—bawu, bawu kele na bayinzo ya bantinu. Ba ke lutisa ntangu ya bawu na balukumu ya mutindu yina.”

³¹² Kasi yandi tubaka, “Na yina yinki beno kwendaka kutala? Beno kwendaka kutala madiadia yina me ningana na mupepe?”

Muntu yina lendaka tuba . . . Muntu mosi ke tuba, ‘Nge zaba, nge kele ya ba-Unitaire; kasi kana beno kwisa awa na ba-Assemblée, mu ke tuba na beno yina mu ke sala, beto ke—beto ke sala yawu . . .’ ‘Mu ke kwikila ti mu ke sala yawu.’ Huh! Madiadia, yina ba me ningisa? Jean ve. Ve, ve. Ve, ve. Ve. ‘Kana nge kwisa, nge ke vwanda Sadducéen mpe nge ke vwanda ve Pharisien, to kima mosi, kuna?’ Beno monaka ve muntu yina me ningana na mupepe; Jean ve.” Ve, tata, mpangi-bakala; yandi ve.

³¹³ Yandi tubaka, “Na yina yinki beno kwendaka kutala? Profete?” Ya zolaka vwanda profete samu na kusala yawu, beno me mona. Yandi tubaka . . . Ntangu yayi, yina vwandaka nzikisa ya profete, beno me mona, Ndinga ya Nzambi na yandi. Ndinga ke kwisaka na profete. Beno me mona? Yandi tubaka, “Yinki beno kwendaka kutala? Profete?” Yandi tubaka, “Yinga, ya kieleka. Kasi, mu ke tuba na beno, kulutila profete, samu yandi vwandaka mutindu yina.”

³¹⁴ Samu na yinki yandi vwandaka kulutila profete? Yandi vwandaka munati-nsangu ya Ngwisani, ya kieleka yandi vwandaka, yina tulaka kiamvu kati-kati ya musiku mpe lemvo. Yandi vwandaka ditadi ya ntalu, na kati kuna, ba zonzaka.

³¹⁵ Yandi tubaka, “Kana beno lenda bakula yawu, yayi kele yandi yina profete zonzilaka, ‘Tala,’ na Malachie 3, ‘Mu ke tinda munati-nsangu ya Munu na ntuala ya Munu, beno me mona, mpe yandi ke yidika nzila na ntuala ya Munu.’” Beno me mona? Oh, yandi vwandaka ya kukikulumusa. Nzambi dyaka vwandaka bumbama na kati ya kukikulumusa.

³¹⁶ Na yina beno tala yina yandi salaka. Yandi longaka Klisto ya ngolo yina vwandaka kwisa, “Yandi kele na nkawa ya Yandi na maboko ya Yandi. Yandi ke . . . Yandi ke na kusadila nzila ya Yandi. Oh, mu zola kutuba, Yandi ke kombula nionso na kuluta ya Yandi. Yandi ke lokota bima ya mvindu, mpe ke kombula yawu mpe ke yoka yawu na tiya, mpe. Ya kieleka. Yandi ke vukisa mbuma mpe ke nata yawu na kibumbulu.” Beno me mona, yandi vwandaka ya kutwadisama na kimpeve.

³¹⁷ Kasi ntangu Yesu kwisaka, ba vwandaka vingila . . . Mpe bantumwa yina nionso, beno zaba, bawu vwandaka sosa kima mosi ya nene ke kwisa. “Oh, la la! Oh, Yandi ke kwisa. Yawu yina kaka. Oh, Yandi ke vwanda na ngolo. Yandi ke manisa ba-Romain na kizizi ya ntoto. Oh! Yandi ke tula ba-Grec yango na kukwenda na lweka *yayi*, mpe ba-Romain na lweka *yina*, ntangu Yandi ke kwiza.”

³¹⁸ Ntangu Yandi kwizaka, mwa muntu mosi ya kukikulumusa yina muntu nionso vwandaka vweza. Yinki ya vwandaka? Nzambi vwandaka bumbama Yandi mosi na kati ya kukikulumusa. Oh, la la!

³¹⁹ Na yina Yandi telemaka na nsuka ya Nsangu ya Yandi, mpe tubaka, “Nani lenda fundisa Munu na disumu? Yina nionso

Biblia me tuba ti Mu ke sala . . . Kana Mu ke sala ve bisalu ya Tata ya Munu, na yina beno fundisa Munu. Kasi yinki Masonuku me tuba ti Mu ke sala, ti Mu me sala ve?” Disumu kele kukondwa lukwikilu, beno zaba. “Nani lenda fundisa Munu? Kana Mu me basisa bampeve ya yimbi na misapi ya Nzambi, na yina beno talisa Munu yina beno ke na kusala samu na yawu.” Kukikulumusa!

³²⁰ Mpe Yandi kukipesaka na lufwa! Kasi, oh, na suka ya Paki yina, alleluia, ya ke kisika yina Yandi sukulaka kisika ya Yandi. Yandi kombulaka mvindu, mbote mingi, mpangi-bakala. Yinga, ya kieleka. Mpe blé vwandaka ya kukanga na kibumbulu. Ya ke pema kuna na kati ya ntoto, na Luzingu ya Kukonda nsuka na kati ya yawu, ke na kuingilaka Kilumbu ya nene yina beto ke zonzila, Nkwizulu ya Mfumu, ntangu luzingu yina ke kwisa na Luzingu; mpe beto ke vumbuka na lufwa na mvumbukulu yina, ba ke zangula beto na Yandi na mazulu, mpe beto ke vukana na kati ya Kibumbulu. Mpe bima ya mvindu ke yokama kuna; mpusu yina vwandaka bumba yawu, mpe vwandaka meka na kubenda Yawu *awa to kuna*, ke yokama na tiya yina ke kufwaka ve. Amen. Oh, Yandi kele mbote ve?

³²¹ Bawu kondwaka Yandi, Nzambi na kati ya kukikulumusa. Samu na yinki? Samu na yinki? Yandi longaka ata fioti ve na bampova ya bunganga-Nzambi. Yandi salaka yawu ata fioti ve. Yandi longaka ata fioti ve mutindu mulongi. Beno me mona? Yandi longaka mutindu . . . Yandi vwandaka sadila bampova ya kukikulumusa ya Nzambi, bampova mutindu “ba me tula disoka,” bampova ya “yinti,” bampova ya “banioka.” Ve mulongi mosi ya seminare, mutindu na kilumbu ya banganga-Nzambi, mutindu Docteur ya Théologie, Docteur *Kingandi*. Yandi salaka yawu ve. Yandi longaka mutindu muntu ya mfinda kisika mosi kuna. Yandi vwandaka tubila masoka, mpe bayinti, mpe banioka, mpe bima mutindu yina, mpe blé, mpe bibumbulu mpe bima mutindu yina. Ba ke tala yandi, bubu yayi, mu banza, mulongi ya sanduku ya sabuni. Mu banza ti ba vwandaka bokila Yandi “mulongi ya bansimbulu” na kilumbu yina, yandi vwandaka telama na zulu ya nsimbulu mosi kuna pene-pene ya Jourdain. Mu ba- . . . Nzambi na kati ya kukikulumusa, vwandaka ya kubumbama na ndwenga ya yinza.

³²² Ntangu yayi beto tala. Yesu tubaka, “Mu ke tonda Nge, Tata, Nge bumbaka bima yayi na ndwenga ya yinza, mpe ke monikisa yawu na ba-bébé yayi zola kulunguka.” Beno me mona? Nzambi yina me bumbama na kati ya kukikulumusa, kati na Klisto. Nzambi yina me bumbama na kati ya kukikulumusa, na kati ya Jean. Beno me mona? Kaka . . . Beno me mona, Yandi—Yandi vwandaka . . . Beno banza kaka na yawu, Nzambi na kati ya kukikulumusa, ke kubumba Yandi mosi na ndwenga ya yinza.

³²³ Ntangu yayi beto ke sukisa, na muniti mosi, to zole, samu mu zola ve kubaka beno ntangu ya yinda.

324 Beno tala, beto sutope muniti mosi, kima mosi samu na munu mosi. Beno banza kilumbu yina beto ke na kuzinga, samu na kusukisa yayi ntangu yayi. Beno banza na kilumbu yina beto ke na kuzinga, ntangu Nzambi me kulumuka na mwa kisika yayi ya kukikulumusa yina beto ke na kuzinga, ke belusa bambevo. Na yina bamvwama, mpe bantu ya lunangu, mpe bantu ya mayele, “Bilumbu ya bimangu me luta. Ya kele ve na kima mutindu yina mutindu kubeluka ya Kinzambi.”

325 Beno ke bambuka moyo na Nsangu yina mu longaka kaka awa na kisika yayi, na suka yina mu kwendaka, samu na David na Goliath?

326 Yandi tubaka, “Wapi mutindu nge ke kutana na yinza ya kulongoka kuna, Mpangi Branham, na Nyonso Yayi?”

327 Mu tubaka, “Mu lenda ve kubakula mutindu mu ke kutana na yawu. Nzambi tubaka, ‘Kwenda.’” Beno me mona? Kaka yina, beno me mona. Ya kele Ndinga ya Yandi. Yandi silaka Yawu. Ngunga kele awa.

328 Ntangu Wanzio yina, yina beno ke mona na foto kuna, kulumukaka kuna na nzadi kilumbu yina, bamvula makumi tatu ya ke sala Ngonda ya sambanu yayi ke na kwisa, to bamvula makumi tatu na tatu me luta, mu zola tuba, na Ngonda yayi ya sambanu ke na kwisa; mpe tubaka, “Mutindu ba tindaka Jean-Baptiste na ntwala,” na ntwala ya mafunda tanu ya bantu to kulutula yina, “ngunga me kwisa ntangu Nsangu ya nge ke baluka na yinza.”

329 Beno ke bambuka moyo na masawula, kana mosi ya beno vwandaka kuna. Mu banza ti, Roy Slaughter, to bayankaka ya kuvwanda awa, lenda bambuka moyo na kilumbu yina; to bayankaka, Mama Spencer, to—to yina kele bantu ya ntama awa yina ke—ke zaba, beno me mona; George Wright, to bayankaka ya bawu, beno me mona, zaba yawu, mutindu ya vwandaka. Kasi Yawu salaka yawu ve? Yawu salaka yawu.

330 Mpe kuna na kati-kati, ntangu bawu balukaka, mpe tubaka, “Ya kele kaka kubeluka ya mabanza.” Mpe Nzambi me vutuka mpe me fidisa ba-opossum, mpe ba-opossum na kati kuna, mpe me beluka na Ngolo ya Nzambi.

331 Lyle Wood na Banks, ntangu beto vwandaka ya kuvwanda kuna, mpe beto vwandaka zaba Kieleka ya Nzambi yina me siamisama. Kuna, mwa mbisi mosi ya fioti, ya kufwa, vwandaka tepa na zulu ya masa. Mpe Mpeve-Santu tubaka, kilumbu mosi na ntwala, Yandi zolaka lakisa bawu Nkembo ya Yandi mpe kusala kima mosi samu na yawu. Mpe kuna na suka yina, mu telamaka kuna, mpe Mpeve-Santu kulumukaka na bwatu yina, mpe mu telamaka mpe tubaka na mbisi yina. Mpe yawu vwandaka tepa na zulu ya masa, ya kufwa, kubanda kati-kati ya ngunga mosi; malaka ya yandi mpe mazafu ya yandi vwandaka ya kubasika na yinwa ya yandi. Yawu vutukaka na luzingu, mpe

kwendaka na kuzengaka masa mutindu mbisi nyonso yankaka. Yinki ya kele? Nzambi yina me bumbama Yandi mosi na kati ya kukukulumusa.

³³² Nzambi kele na kiyeka ya kubasisa na matadi yayi bana samu na Abraham. Nzambi kele na kiyeka ya kubelula opossum, to mbisi, to kima yankaka. Kana Yandi ke longi Nsangu ya Yandi, mpe bantu ke kwikila Yawu ve, Nzambi lenda telemisa opossum samu na kukwikila Yawu. Alleluia! Nzambi lenda telemisa mbisi ya kufwa. Yandi lenda telemisa opossum. Yandi lenda. Yandi lenda sala nionso yina Yandi zola kusala.

³³³ Wapi mutindu ya kusemba samu na nsungi yayi! Ntangu bawu ke bula disakuba na Yawu, mpe ke swana samu na Yawu, mpe, “Beno salaka ve *yayi* mpe *yina*.” Mpe Nzambi ke fidisa kuna mwa niama mosi. Beno me mona? Wapi kusemba yayi! Yinki ya vwandaka? Nzambi na kati ya kukukulumusa, beno me mona, ke na kukilakisaka Yandi mosi ti Yandi kele nene, oh, la la, kusemba bantu yayi ya nsungi yayi, samu na kukondwa lukwikilu ya bawu.

³³⁴ Ntangu yayi, bawu ke banzaka ntangu yayi mutindu bawu ke banzaka ntangu nionso, yawu lendaka salama na mutindu ya bawu mosi. “Ntangu yayi, kana ya kele na kima mutindu kubeluka ya Kinzambi. . .” Mutindu, muntu ya Katolika me tuba na muntu yayi. Muntu mosi, na nokokila yina, tubilaka muntu yawu. Beno zaba yawu. Yandi tubaka. . . Ayers yayi, yina mu kwendaka mona samu na mwana ya yandi ya bakala kuna na Houston, yandi tubaka—yandi tubaka, “Mbote, ntangu yayi, kana—kana yina vwandaka dikabu ya Nzambi, ya fwana kwisa na dibuundu ya Catholique.” Beno me mona? Beno me mona? Yinga, ba-Methodiste banzaka ti Yawu ke kwisa na dibuundu ya bawu. Mpe bantu ya Pentecote banzaka ti Yawu ke kwisa na dibuundu ya bawu. Kasi Yawu kwisaka ve na mosi ya bawu.

³³⁵ Yawu ke kwisa na Ngolo ya mvumbukulu ya Yesu Klisto ke kukimonisa Yandi mosi. Ya kieleka. Ya kieleka, Yandi ke sala yawu. Yinga. Beno tala Yawu kaka. Beno bika ve Yawu kuluta beno. Beno bika Yawu na kati ya ntima ya beno—ya beno, mpe beno bambuka moyo na Yawu. Beno banza Yawu kuna na kati.

³³⁶ Ya fwana kwisa na mutindu ya bawu, samu na bawu, samu na denomination ya bawu mosi. “Mpe kana ya sala yawu ve, ya kele Yandi ve, beno me mona. Ya kele kaka psychologie, to ya kele diabulu. Ya kele—ya kele. . . Ya kele Nzambi ve. Samu, kana ya vwandaka Nzambi, Yandi zolaka kwisa,” na mutindu ya bawu, beno me mona, “mutindu beto me tendula Yawu.”

³³⁷ Ya kele mutindu yina Yesu zolaka kwiza na ba-Pharisien. Ya zolaka vwanza mutindu yina. Beno me mona? Kana bawu. . . Kana Nzambi zolaka ku—kufidisa Mesiya, bawu vwanza na ntendulu ya bawu mosi na mutindu Yandi zolaka vwanza. Mpe samu ti Yandi kwizaka mutindu yankaka, na yina, “Ya

vwandaka ve Mesiya. Yandi vwandaka ya makangu. Yandi vwandaka Béelzébül.” Kasi ya vwandaka Nzambi na kati ya kukikulumusa.

³³⁸ Muntu yina tekilaka zolaka vwanda muntu mosi ya kulongoka yina bawu... Mbote, mosi, kukondwa ntembe... Konso kilumbu, konso mvula ntangu bawu, yinga, tumaka balongi ya bawu mpe tindaka bawu mutindu ba-missionnaire, samu na kusala bandimi mpe kukotisa bawu; “Yayi ke vwanda mutekidi yina ke kwisa.” Kasi Nzambi basisaka yandi na ntoto ya kuyuma kisika ya vwandaka ve na seminere, beno me mona, mpe bima ya mutindu yina. Beno me mona? Nzambi bumbamaka Yandi mosi na kati ya kikulu mpe na kukikulumusa.

³³⁹ Kasi ntangu yayi beno vingila. Samu na kumanisa, beto ke tuba yayi. Kasi samu na kumanga Nsangu ya Nzambi ya kukikulumusa; samu na—na—na kumanga Yawu, nzila ya Nzambi ya kukikulumusa, ke kubeba Kukonda nsuka. Ntangu yayi, ya kele bambala yikwa... Beto ke zonzaka mutindu Yawu kele ya kukikulumusa, mpe bantu ke banzaka, mbote, bawu lenda kuseka Yawu mpe kusawula Yawu, mpe kusala Yawu mutindu bawu zola, kasi ya kele kukabwana ya Kukonda nsuka na Nzambi.

³⁴⁰ Bayina kufwaka na bilumbu ya Noé, mpe kuwaka ve nsangu ya yandi, bawu kufwaka. Mpe Yesu kwendaka mpe longaka na bawu na miniololo ya mudidi, na lufwa ya Yandi, ntete Yandi vumbuka. Mpe Yandi kwendaka na difelo, mpe longaka na bampeve yina vwandaka na boloko, yina balulaka ntima ve na ntangu ya mvibudulu ya bilumbu ya Noé; na yina nsangu ya kukikulumusa ya Nzambi, na nzila ya muntu ya kukikulumusa, vwandaka longama. Yandi kwendaka. Yandi tubaka, “Noé longaka ti Mu ke vwanda awa, mpe Munu yandi yayi.” Ya kieleka. Beno me mona?

³⁴¹ Bayina kondwaka kuwa nsangu ya profete yina, Moise kuna na ntoto ya kuyuma, ti yandi me kuzwa na Nzambi, yina me siamisama pwelele na nzila ya Dikunzi ya Tiya, mpe me twadisama na ntoto ya kuyuma. Na manima samu na kumeka kutelama mpe kusala organisation na yawu, mpe bawu kufwaka mpe kufwaka na ntoto ya kuyuma, mosi na mosi ya bawu; kasi kaka bantu zole, Josué na Caleb.

³⁴² Mpe kuna, ba-Pharisien vwandaka ya kufwa meso mingi ti bawu monaka yawu ve, na yawu bawu talaka na manima mpe tubaka, “Batata ya beto kudiaka mana, kudiaka mana na ntoto ya kuyuma.”

³⁴³ Mpe Yesu tubaka, “Mpe bawu kele, bawu nionso, ya kufwa.” Bawu monaka Nkembo ya Nzambi. Bawu tambulaka na kati ya Nsemo ya... Bawu tambulaka na kati ya Nsemo. Bawu tambulaka na kati ya Nsemo ya Dikunzi ya Tiya. Bawu tambulaka na mvwandulu ya ngolo ya Yandi. Bawu tambulaka

na bisika yina Mpeve-Santu salaka samu na bawu na kutambula. Bawu kudyaka mana yina kubwaka na Mazulu, yina Nzambi pesaka. Mpe, zimbanaka, mpe kwendaka na difelo. “Bawu kele, bawu nionso, *ya kufwa*.” Kana beno baka mpova yina, ya kele “bakukabwana ya Kukonda nsuka” na Mvwandulu ya Nzambi. “Bawu kele, bawu nionso, *ya kufwa*.” Beno me mona?

³⁴⁴ Muntu nyonso yina me manga Yesu kele ya kufwa. Beno me mona yina mu zola kutuba? Kumanga kukikulumusua yina ya Nzambi! Ya ke kima mosi ve. . . Beno ke tuba, “Mbote, mu me sala kifu.” Beno ke sala yawu ve mutindu yina. Nzambi ke ndima yawu ve mutindu yina. Beno ke kufwa, ya Kukonda nsuka. Beto ke sala mbote na kubanza na kima mosi. Ntangu yayi, yawu fwana vwanda ya kutalisama pwelele na Nzambi, beno me mona, na yina, kana yawu kele, yawu kele Ndinga ya Yandi. Beno me mona? Oh! Mutindu bayina losaka Moise, losaka Elie, losaka Jean, na bilumbu ya bawu.

³⁴⁵ Awa, bika mu tuba na beno mwa kima mosi ya fioti. Mpe, na yina, mu banza ti mu ke niongisa beno mingi ve. Kasi, beno tala. Kilumbu yina ba bokilaka munu na Houston, na Texas, samu na kumeka na kuzwa pardo. Na kuvukisaka bantu kintwadi, samu na kulonga nsangu mosi, mpe kunata bantu kusana samu na kusine pardo samu—samu na mwana-bakala yayi ya ntwenia mpe mwana-kento ya ntwenia. Beno zaba ti bawu me kota na kati ya mpasi. Mu banza ti beno tangaka yawu na zulunale. Mpe ya vwandaka bokilo ya Tata Ayers.

³⁴⁶ Mpe Tata Ayers kele yandi yina bakaka foto ya Wanzio ya Mfumu, yina beno ke mona kaka kuna. Muntu ya Catholique ya Rome; mpe kento ya yandi vwandaka Juif. Mpe yandi kwelaka mwana-kento yayi ya Juif. Bawu zolaka tubila nsambulu ve na kati ya mosi na yankaka, mpe nionso yina, mutindu yina. Mpe Ted Kipperman, yina vwandaka sala diaka na yandi kintwadi, bawu vwandaka na ba-Studio Douglas.

³⁴⁷ Mpe ntangu yandi kwisaka kuna, kisika Tata Best, Docteur Best, ya dibuundu ya ba-Baptiste, tulaka dikofi ya yandi na nsi ya mbombo ya Mpangi Bosworth, mpe yandi vwandaka ningisa yawu, mpe yandi tubaka, “Ntangu yayi beno baka munu foto, na kusalaka mutindu yina.” Yandi tubaka, “Mu ke baka mpusu ya kiboba ya bakala yayi mpe mu ke namika yawu na bureau ya munu, mutindu lubambuku samu na kubeluka ya Kinzambi.”

³⁴⁸ Mpe na ntwala mu kwenda na Houston, na Texas, Mfumu Nzambi tubaka na munu na kukwenda kuna. Mpe mu vwandaka kuna na Nkumbu ya Mfumu. Mpe beno nionso zaba kuswana mpe bima yina salamaka. Beno me tangaka yawu na babuku, mpe nionso yina. Mpe yawu vwandaka kuna. Mpe na mpimpa yina. . . Yandi vwandaka meka kaka na kutambula ya kukikulumusua.

349 “Kasi,” ba tubaka, “ba kele nkonga ya bantu yina zaba kima ve.” Docteur Best tubaka, “Ba kele kima yankaka ve kasi nkonga ya bantu yina me zaba kima ve.” Yandi tubaka, “Ya kele ve na bantu yina ke kwikilaka na kubeluka ya Kinzambi, kima ya mutindu yina. Yina kele nkonga ya bantu ya ntama.” Ba me zaba ve ti ya vwandaka Nzambi na kati ya kukikulumusa. “Kasi,” yandi tubaka, “muntu yina kele na ata malongi ya lukolo ya bana.”

350 Yandi vwandaka na ba-diplome nionso, ti yandi banzaka ti yandi lendaka sala kaka, kinkuku mosi ya Mpangi Bosworth. Kasi ntangu ya kumaka na Ndinga, yandi vwandaka ata fioti ve na binkoso ya yandi. Beno me mona? Mpe Mpangi Bosworth zabaka kisika yandi telemaka. Bantu mingi ya kimvuka ya yandi, vwandaka kaka awa, vwandaka na ntangu ya kuswana yango. Mpe yawu vwandaka kuna.

351 Na yina yandi vwandaka landila na kufinga beto, na kutubaka ti beto kele nkonga ya bantu yina me zaba kima ve. Yandi tubaka, “Bantu ya mayele ke kwikilaka yawu ve.”

352 Mpangi Bosworth tubaka, “Vingila fioti.” Yandi tubaka, “Bantu yikwa na kati ya mbanza yayi,” pene ya mafunda makumi tatu na nkokila yina, vwandaka na kati ya beto mutindu yayi, “Bantu yikwa na kati ya mbanza yayi awa, yina ke kwendaka na bayinzo-Nzambi yayi ya nene, ya kitoko ya ba-Baptiste, lenda lakisa na nzila ya nsamunu ya dokotolo ba me beluka na Ngolo ya Nzambi kubanda ntangu Mpangi Branham vwandaka na kati ya mbanza, beno telema.” Mpe bantu nkama tatu telemaka. “Yinki nge ke tuba samu na yawu?” Yawu yina. Nzambi vwandaka bumbama na kati ya kukikulumusa. Na manima yandi tubaka, “Mpangi-bakala . . .”

353 Yandi tubaka, “Beno nata munganga ya Kinzambi. Bika yandi kuloka meso ya muntu mosi, na manima mu ke mona yandi na manima ya mvula mosi.” Mpe Ted Kip- . . .

354 Mpe Ayers kuna, yina kangaka foto, yandi tubaka, “Tata Branham kele kima yankaka ve kasi muloki. Mu monaka kento mosi, vwandaka na goitre na laka na yandi, mutindu *yayi*, mpe,” yandi tubaka, “yandi lokaka kento yina. Kilumbu yina landaka mu solulaka na yandi, mpe yandi vwandaka na goitre ve.” Yandi tubaka, “Bakala yayi lokaka yandi.” Mpe, oh, yandi vwandaka vweza munu kaka. Yandi tubaka ti mu fwana basika na mbanza, mpe yandi fwana vwanda yina ke sala yawu, beno me mona, mpe nionso yina. Ya vwandaka na bisono ya nene na page ya ntete ya *Houston Chronicle*.

355 Mu tubaka ata fioti ve dyambu. Mu vwandaka kuna samu na kusala kosalu ya Tata ya munu, mpe yina vwandaka nyonso; vwanda ya kukwikama na Ndinga yango. Yandi fidisaka munu kuna, mpe ya kele kosalu ya Yandi.

356 Na nkokila yina ntangu mu kwendaka kuna, mu tubaka, “Mu—mu—mu—mu kele ve munganga ya Kinzambi. Mu ke mutindu yina ve. Kana muntu mosi kutuba mutindu yina,” mu tubaka, “bawu ke na kifu.” Mpe mu tubaka, “Mu ke zola ve ti ba bokila munu munganga ya Kinzambi.” Mu tubaka, “Kana Docteur Best awa ke longaka mpulusu, na yina yandi ke zola ve ba bokila yandi Mvulusi ya Kinzambi.” Mpe mu tubaka, “Na yina, mu ke longa kubeluka ya Kinzambi, mu ke zola ve ba bokila munu munganga ya Kinzambi. Kasi yandi ke tubaka ti yandi kele ve Mvulusi ya Kinzambi; ya kieleka, yandi kele ve. Mu kele ve munganga ya Kinzambi. Kasi, ‘Na bamputa ya Yandi beto me beluka,’ mu ke talisa na Yawu.” Beno me mona?

Mpe na yina, yandi, “Buzoba!” Beno zaba, ke kwenda bisika nyonso.

357 Mpe mu tubaka, “Kasi kana Mvwandulu ya Nzambi mpe dikabu yayi ya Nzambi, Wanzio yayi ya Mfumu, kana Ya kele na kyuvu, Ya lenda siamisama.” Pene ya ntangu yina, awa yandi kulumukaka, na kubalukaka. Yandi tubaka, “Mu ke na nsatu ya kuzonza ve ntangu yayi. Yandi me zonza yimeni samu na munu.” Mpe mu kwendaka.

358 Mpe mu kwendaka kuna na Houston, na mbanza yina ya nene, mosi ya bambanza ya kulutila kitoko yina kele kuna na yinsi, bisika nionso. Ntangu mu kwendaka kuna, kilumbu yina, ya vwandaka kyadi na kutala mbanza yina. Babala-bala vwandaka na mvindu. Ba-comptoir ya kisika yango, kuna na Bala-bala Texas; mpe mu kwendaka na Hotel Rice, kisika ba-vedette ya cinema vwandaka vwanda, mpe ba vwandaka kwenda kuna na kitini ya nsi, na cafeteria yina, mpe plafond vwandaka ve ya kusiangula, mpe ya vwandaka na bitini ya platre na ntoto, mpe mvindu mpe nzanzi. Mpe poto-poto na kati ya balongi mutindu mu me monaka ntete ve na luzingu ya munu.

359 Samu na yinki? Samu kumanga Nsemo kele kutambula na kati ya mpimpa. Kuna kele bana ya bawu pene ya lufwa. Kieleka. Nzambi kulumukaka. Ntangu kukikumusa me talisama mpe me losama, na yina Nzambi me kukitalisa Yandi mosi na kati ya kukikumusa.

360 Mpe kuna ba bakaka foto yina tambulaka na yinza ya muvimba. Mpe bantu ya science tubaka ti Ya kele kaka Kivangu ya kimpeve yina ba me bakaka ntete ve na foto na kati ya masolo nionso ya yinza; mpe ya kele ya kunamika na Washington, DC, na kivinga ya ba-art. Ya kele kuna, kukikumusa yina me talisama, na ntangu yina. Beno me mona? Beno me mona? Nzambi me bumbama Yandi mosi na kati ya kukikumusa, na yina me kukitalisa Yandi mosi. Beno me mona?

361 Ntangu yayi, Yandi bumbamaka Yandi mosi na lufwa ya Klisto, kasi monikisamaka Yandi mosi na mvumbukulu. Oh, la la! Nionso yina, beno lenda, beto kaka . . . beto lenda . . . Ya ke

na nsuka ve samu na yawu; ba lendaka landila kaka na kutuba yawu. Kasi beno bawu yayi, beno me mona.

³⁶² Kumanga ti mwini kele, ya kele kukwenda na yisi ya ntoto mpe kukanga meso ya beno na nsemo. Mpe ya kele kieleka. Mpe, beno bambuka moyo, mutindu mosi kaka ti beno lenda vwanda na foti, ya kele ntete kumanga kieleka. Beno me mona? Mpe kumanga na kuzibula meso ya beno, beno ke zinga na kati ya mpimpa. Beno me mona? Kana beno manga na kutala, wapi mutindu beno ke mona? Beno me mona? Beno tala mbote bima ya fioti. Ya kele mwa bima ya fioti yina beno ke zimbana, ya kele ve bima ya nene yina beno ke mekaka na kusala—kusala. Oh, la la!

³⁶³ Na yina, beno tala awa, beno bika mu tuba na beno. Na Mal- . . . na Matthieu 11:10, Yandi tubaka, “Kana beno lenda bakula yawu, yayi kele yandi.” Beno me mona? “Yayi kele yandi yina ba fidisaka na ntwala ya Munu.” Ya vwandaka kukikulumusa.

³⁶⁴ Ba yufulaka Yandi kilumbu mosi, yandi tubaka, “Samu na yinki bansoniki me tuba ti . . .”

³⁶⁵ Yandi, Yandi tubaka, “Mwana ya muntu ke kwenda na Jérusalem. Ba ke kaba Munu na maboko ya bansumuki, mpe ba ke kufwa Mwana ya muntu yina. Mpe Yandi ke kufwa, mpe na kilumbu ya tatu Yandi ke vumbuka dyaka.” Yandi tubaka, “Beni tuba ve vision na muntu yango, kuna.”

³⁶⁶ Mpe bilandi, ntangu yayi beno banza na yawu, bilandi yina tambulaka na Jean, zonzaka na yandi, kudiaka na yandi, na ntoto ya kuyuma, ba vwandaka kuna na lweka ya kumu, na manima ba tubaka, “Samu na yinki milongi ke tuba ti Élie fwana kwisa ntete? Beno ke tuba ti Nge ke kwenda samu na kukomama na kulunsi, mpe ke vumbuka na lufwa. Nge kele Mesiya, samu na kubaka kiti ya kimfumu. Ntangu yayi samu na yinki bansoniki . . . ? Masonuku ya beto nionso me tuba awa, Masonuku me tuba pwelele, ti, ntete Klisto ke kwiza, ti Élie ke kwiza ntete.” Yinga. Beno me mona?

³⁶⁷ Yandi tubaka, “Yandi me kwisa dezia, mpe beno zabaka yawu ve.” Ntangu yayi, nani ya vwandaka? Bilandi.

³⁶⁸ Mu ke sala mpasi awa, na mwa ntangu fioti, kasi mu kanaka ve kutuba yawu, beno me mona; samu na mwa minuti fioti ke landa, beno me mona, kaka minuti mosi, to zole, kasi samu ti beno me bakula. Beno lenda kuwa munu? [Dibuundu me tuba, “Amen.”—Mu.]

³⁶⁹ Beno tala! “Samu na yinki?” Bantu yina tambulaka na Klisto, “Samu na yinki Masonuku, ntete, ke tuba ti Elie fwana kwisa?” Mpe bawu vwandaka bandimi ya Jean, mpe bawu zabaka yandi ve. “Samu na yinki Masonuku me tuba, milongisi?” Beno me mona yina mu zola kutuba? Beno me mona? “Samu na yinki Masonuku ke tuba ti Elie fwana kwisa ntete?” Bilandi

yina vwandaka tambula na yandi, “Samu na yinki Masonuku ke tuba ti yandi fwana kwisa ntete, na ntwala ya bima yayi, mpe kuvutula bima nionso?” Yandi salaka yawu, na ntwala ya bantu pene ya kumi na zole, mpe yawu yina kaka ya vwandaka. Beno me mona? Kaka bawu yina zolaka kundima yawu. Ya vwandaka yina ba tumaka na kumona yawu.

370 Yesu tubaka, “Yandi me kwisa dezia, mpe beno me zaba yawu ve. Kasi yandi me sala yina Masonuku me tuba ti yandi ke sala. Yandi me vutula yawu, beno nionso yina me yamba Munu mpe me kwikila na Munu. Yandi salaka kieleka yina Masonuku tubaka ti yandi ke sala. Mpe bawu salaka na yandi yina Masonuku tubaka ti bawu ke sala. Yandi me kwisa dezia, mpe beno me zaba yawu ve.”

371 Beno me kubama? Mu zola niongisa beno fioti. Enlevement ke vwanda mutindu mosi. Ya ke vwanda ya kukikulumusa mingi, kukondwa ntembe ya ke vwanda mutindu mosi, ti Enlevement ke salama mosi ya bilumbu yayi mpe muntu mosi ve ke zaba kima mosi ve samu na yawu. Ntangu yayi, beno telama ve, ve, ve ntangu yayi, kasi beno longuka kaka minuti mosi. Mu me kuma kieleka pene-pene ya kusukisa. Enlevement ke salama na mutindu mosi ya kukikulumusa ti balufundusu ke kubwa, mpe ba ke mona Mwana ya muntu, mpe bawu ke tuba, “Beto zolaka ve kuzwa kima *yayi-mpe-yayi*? Mpe ba zolaka ve kutinda Élie na beto? Mpe ya zolaka vwanda ve na Enlevement?”

372 Yesu ke tuba, “Ya me salama dezia, mpe beno me zaba yawu ve.” Nzambi na kukikulumusa. Beno me mona?

373 Ntangu yayi, sabala yayi beto ke baka mwa malongi ya kieleka na zulu ya Ndinga. Ntangu yayi, beno tala, Enlevement, ke vwanda bantu fioti mingi yina ke sala Kento ya makwela yina! Ya ke vwanda ve . . .

374 Ntangu yayi beno me mona mutindu milongi me yidika yawu? Ba kele na ba-diagramme, mpe bawu ke kwenda na yawu, ke lakisa mafuku kumi ya bantu yina ke mata awa; ba-Methodiste nionso, kana ya kele na mulongi ya Methodiste; kana ya kele Pentecotiste, ba-Pentecotiste nionso ke kwenda. Ya ke diambu ya bawu ata fioti ve.

375 Ya ke vwanda, mu banza muntu mosi ke kwenda na Jeffersonville, muntu mosi ke zimbana kaka. Bawu ke tuba, “Mbote, ata fioti ve beno . . .” Bayankaka ke zaba yawu ve. Ya ke vwanda muntu mosi ke kwenda na Georgie. Beno me mona? Ya ke vwanda muntu mosi ke kwenda na Afrique. Mpe beto tuba ti ya ke vwanda na bantu nkama tanu, ya moyo, yina ke kwenda na nzanguka. Ntangu yayi, yina kele ve—yina kele ve nzutu ya dibuundu. Yayi kele Kento ya makwela. Yina kele dibuundu ve. Yayi kele Kento ya makwela. Beno me mona?

376 Dibuundu ke mata na mafunda, kasi ya kele na mvumbukulu yina ke landa. “Ba ke vutuka ve na luzingu tii bamvula mafunda ke lunga.” Beno me mona?

377 Kasi, na kati ya Kento ya makwela, kana bankama tanu ya bantu me bika ntoto kaka munuti yayi, yinza ke zaba kima ve samu na yawu. Yesu tubaka, “Ya ke vwanda na mosi na mbeto; mpe Mu ke baka mosi, Mu ke bika mosi.” Yina kele na kati-kati ya mpimpa. “Ba ke vwanda zole na kilanga,” kuna na simu yina yankaka ya ntoto, “Mu ke baka mosi mpe Mu ke bika mosi. Mpe mutindu ya vwandaka na bilumbu ya Noé, mutindu mosi ya ke vwanda na nkwizulu ya Mwana ya muntu.”

378 Beno banza yawu! Nyonso ke tambula kaka mutindu nyonso lendaka vwanda. Nsangu ya fanatiki ke tambula, mpe, kima ya ntete beno zaba, kima mosi, “Mulongi yayi, yina kwendaka kisika mosi kuna, yandi me vutuka ata diaka ve. Mu banza yandi me kwenda na mfinda, samu na kuzomba. Yandi ke vutuka kaka diaka ve. Mpe bakala *yayi* kwendaka kisika mosi kuna. Beno zaba yinki me salama? Mu banza, mwana-kento yina ya ntwenia, ba—ba me kanga yandi kisika mosi kuna, beno zaba, muntu mosi me kanga mwana-kento yina samu na kusala yandi yimbi, mu banza ba me losa yandi na nzadi. Yandi vwandaka na muntu ve.” Ndambu ya yawu . . . makumi yivwa na kati ya bawu . . . Beto lenda tuba mosi na kati ya bankama ya mafuku ke zaba kima mosi ve samu na yawu; beno me mona, kaka muntu yina me zaba yandi, yandi ke tuba, “Mwana-kento yayi me zimbana. Kasi, mu lenda bakula ve. Yandi me kwendaka ntete ve mutindu yina.” Ve.

379 Mpe ntangu ba ke tuba, “Bantoni ke zibuka.” Wapi mutindu bantoni ke zibuka? Na yina, mu—mu ke na ntangu ve ya kukota na yayi, yina mu zolaka kusala. Mu fwana baka yayi, beno me mona, kaka samu na kulakisa beno kukikulumusa ya Nzambi. Mpe calcium yina, potasse, mpe nionso, ntangu—ntangu . . . Bima nionso yina kele na kati ya beno, mutindu bisadilu, ke sala kaka lutu mosi. Ya kieleka. Mpe yawu yina ke salama, ya ke kuma diaka mpeve mpe luzingu. Nzambi ke tuba kaka, mpe Enlevement ke salama. Ya ke kwenda kuna ve, mpe Bawanzio ke kulumuka na bapawu mpe ke timuna bantoni, mpe ke basisa bamvumbi ya ntama awa. Yinki ya kele? Ya me butuka na disumu, na kubanda. Kasi, Yina ya malu-malu, yina ba salaka na kifwanikisu ya yawu, beno zaba. Beno me mona? Kana beto ke na *yayi*, beto ke kufwa diaka. Beno me mona? Muntu mosi ve . . . Beno ke tuba, “Bantoni ke zibuka. Bantu ya kufwa ke basika.” Ya lendaka vwanda kieleka, kasi ya ke zibuka ve mutindu beno ke tuba ti ya ke zibuka. Beno me mona? Ya kieleka. Beno me mona? Ya ke vwanda mutindu yina ve.

380 Ya ke vwanda kinsweki, samu Yandi tubaka ti Yandi ke kwisa “mutindu muyibi na mpimpa.” Yandi tubaka yimeni na beto yayi, Enlevement.

381 Na yina balufundusu ke bula; disumu, bampasi, kimbevo, mpe nyonso. Mpe bantu ke boka samu lufwa kubaka bawu, ntangu ya lufundusu. “Mfumu, samu na yinki lufundusu yayi kele na zulu ya beto, ntangu Nge tubaka ti ya ke vwanda na Enlevement ntete?”

382 Yandi ke tuba, “Ya me salama dezia, mpe beno me zaba yawu ve.” Beno me mona? Nzambi vwandaka bumbama Yandi mosi na kati ya kukikulumusa. Oh, la la! Mbote mingi. “Yimeni, yina me salama dezia, mpe beno zabaka yawu ve.”

383 Samu na yinki bakwikidi ke kwikila ve bidimbu ya Nkwizulu ya Yandi?

384 Ba ke na kuvingila bima nyonso yayi yina ba zonzaka na nzila ya Masonuku, mpe—mpe ngonda ke dinda na kati-kati . . . to mwini, na kati-kati ya kilumbu, mpe ya ke vwanda na mitindu nyonso ya bima. Oh, kana beto vwandaka kaka . . . Mu kele na banoti yina mu sonikaka awa na zulu ya yawu, beno me mona, samu na kulakisa yinki bima yayi kele. Mpe beto ke tubila yawu na kuzibuka ya Bidimbu yayi na sabala yayi, na mutindu nionso, beno me mona. Beno me mona? Na yina, kaka kisika ya me luta yimeni, mpe beno zabaka yawu ve. Beno tala kana ya kele, kana Wanzio ya Mfumu ke zibula Bidimbu yayi na yawu. Beno bambuka moyo, ya kele ya kukanga na bidimbu ya mansweki Sambwadi. Beno me mona?

385 Ntangu yayi yinki? Samu na yinki bantu lenda kwikila ve na kukikulumusa ya fioti ya nkonga ya bantu ya kukikulumusa, beno me mona, mpe Ndinga ya bidimbu ya Nzambi? Samu na yinki bawu lenda kwikila yawu ve? Kaka mutindu ya ke vwandaka ntangu nionso, Ndinga ya kieleka ya Nzambi yina me monisama pwelele. Ya kele, bawu kele na mayele mingi mpe me longokaka mingi na kukwikila mutindu ya kukikulumusa ya Ndinga yina me sonama. Bawu zola kutula ntendulu ya bawu mosi na Yawu. “Yawu zola tuba mutindu *yayi* ve. Yawu zola tuba mutindu *yina* ve.” Beno me mona? Yawu zola tuba Yawu.

386 Beno kuwa. Bika mu tuba yayi, kaka na nswalu, ntangu yayi. Ata mpe ba-vision yina Nzambi ke pesaka awa na kisika, ba ke bakula yawu na mutindu ya yimbi. Kikuma yawu yina beno ke kuwa munu na ba-bande, ke tuba, “Beno tuba yina ba-bande ke tuba. Beno tuba yina ba-vision ke tuba.” Ntangu yayi, kana beno kele ya kuvumbuka mbote, beno ke mona kima mosi. Beno me mona? Mu banza ti mu fwana simba yawu ve na diboko ya munu mpe kulakisa beno. Beno me mona? Beno me mona? Beno me mona? Beno kele . . . Ya kele—ya kele awa. Beto kele na nsuka. Beno me mona? Yinga, tata. Bantu ya mayele mingi ke kondwa yawu. Ba-vision ya kukikulumusa, ntangu ba me monisama na kukikulumusa mingi, tii ya ke fuluka na zulu ya bayintu ya bantu. Beno me mona?

387 Samu mu monaka vision, mu tubaka na beno ti mu ke kwenda kuna samu na kuzomba, mpe, beno zaba, yina vwandaka disakuba samu na bantu. Mpe kuna Nzambi me pesa yawu kuna samu na lukanu ya kieleka, mpe kuvutuka na ntendulu ya muvimba, mu vwandaka talisa na kukwenda ya mama ya munu, mpe samu na kutalisa kukwenda ya mama ya munu mpe bima mutindu yina. Mpe na manima mu me vutuka mpe me tuba yawu, na ntwala. Mpe ya me salama kaka kieleka mutindu Yandi tubaka ti ya ke salama. Beno me mona?

388 Mpe, kasi, Jean kwizaka kaka kuna mpe zonzaka yawu pwelele. Yandi tubaka, “Mu ke Mesiya ve, kasi mu ke ndinga ya muntu yina ke boka na ntoto ya kuyuma.”

389 Mpe na yina bilandi ya yandi tubaka, “Samu na yinki, bansoniki me tuba ti Ma- . . . Masonuku ke longa ti Elie fwana kwisa ntete?” Beno me mona? Kukikulumusya ya Nzambi ke kwenda, ke luta na zulu ya yintu ya bantu.

390 Bika mu baka yayi, na manima mu ke sukisa. Mu ke sala yawu, na lusalusu ya Nzambi. Beno me mona? Beno tala. Ntangu yayi beto longuka yayi. Na yina, mu—mu ke na kiadi na kutuba na beno ntangu nionso ti mu ke sukisa, na yina mu ke sala yawu ve. Beno me mona? Beno tala . . . Beno lemvokila munu samu me kanga beno. Kasi, kaka mwa bangunga fioti, beto ke vutuka.

Beno tala, beto baka mwa ditono ya ntinta.

391 Nionso kele samu na lukanu mosi. Beno me vukana awa na suka yayi samu na lukanu mosi. Mu ke kudia na yinzo ya nge, Charlie; Nellie, nge lambaka samu na munu, samu na lukanu mosi. Mu . . . Bima nionso kele samu na lukanu mosi. Dibuundu yayi me tungama samu na lukanu mosi. Ya ke na kima mosi ve kukondwa lukanu mpe dyambu mosi.

392 Beto baka mwa ditono ya tinta ntangu yayi. Beno lenda kuwa munu? [Dibuundu me tuba, “Amen.”—Mu.] Beto baka mwa ditono ya tinta mpe beto tala yawu. Yinki ya kele? Ditono ya tinta. Wapi kisika yawu me katuka? Mbote mingi. Beto baka ditono yayi ya tinta ntangu yayi, ya kele, mpe beto tuba ti ya kele tinta ya ndombi. Ntangu yayi, tinta yina kele samu na lukanu. Mu lendaka sonika pardo ya munu na mu- . . . samu na kubasisa munu na boloko. Ya lenda sonika mukanda ya munu ya pardo samu na kubasisa munu na boloko ya muntu yina ba me zengila nkanu ya lufwa. Ya kieleka? Ya lenda sonika Jean 3:16, mpe vulusa moyo ya munu na kukwikilaka Yawu. Ya kieleka? To, ya lenda vwanda kidimbu ya lufwa ya munu. Beno me mona? Ya lenda fundisa munu na Kisika ya Lufundusu. Ya kele samu na lukanu mosi. Ya kieleka?

393 Mbote, beto tala mwa tinta mpe beto tala kisika ya me katuka. Ntangu yayi, ya kele tinta. Ba me tula yawu kintwadi, mpe ba-produit chimique mpe nionso yina, tii ya me kuma tinta.

Mpe yawu kele ndombe. Beno ke losa yawu na zulu ya bilele ya beno, yawu ke tashe yawu.

³⁹⁴ Kasi beto me sala décolorant. Beno bakento ke sadilaka masa ya Javel. Mbote, mu ke baka ditono mosi yina ya tinta mpe mu ke losa yawu na kati ya basini ya—ya décolorant, ntangu yayi yinki ke salama na tinta? Beno me mona? Samu na yinki? Décolorant me salama, ba me sala yawu mpe ba me sala ba-produit chimique, kintwadi, ya ke panza tinta nionso tii beno lendaka diaka ve kumona yawu. Ntangu yayi, kitini ya décolorant kele masa.

³⁹⁵ Masa kele H_2O , yina kele hydrogène mpe oxygène. Mpe nionso zole hydrogène mpe oxygène, nionso zole, kele bima yina ke pelaka tiya ya kigonsa. Mpe, na yina, hydrogène mpe oxygène kele kaka mbombi. Ya kele yina ya kele, ya kele kieleka, ba-élément chimique ya mbombi, kaka ba-élément chimique ya mbombi. Ntangu yayi, ntangu yayi beno tula yawu kintwadi, mpe beno ke kuzwa maza. Kasi, beno panza yawu, beno kele na hydrogène mpe oxygène, mpe beno landila kaka na kukwenda na kuvutuka na mbandukulu.

³⁹⁶ Ntangu yayi, samu na kukota na yayi, beto baka . . . Mpe mu lenda ve. Ntangu yayi ya lenda vwanda ba-élément chimique yina kele ya kuvwanda awa. Mpe ntangu yayi mu zola tuba yawu, samu ya—ya ke vwanda na ba-chimiste ke kuwa yawu, mu zaba ve ba-formule. Kasi mu zola tendula yawu kaka na mutindu ya munu mosi ya kukikulumusya, mu ke tula kivuvu ti Nzambi ke kukimonisa Yandi mosi na kati ya yawu.

³⁹⁷ Beno tala, mu ke losa ditono yina ya tinta na kati ya décolorant. Yinki ke salama? Na mbala mosi ditono ya ndombi me kwenda. Beno lenda mona yawu diaka ve kana beno vwandaka na yawu, yawu me zimbana. Beno ke mona yawu diaka ve. Yinki me salama? Ntangu yayi, beno ke mona ve kima mosi ke basika na yawu. Beno ke mona yawu ve. Samu na yinki beno ke mona yawu ve? Samu ti ya me zengana.

³⁹⁸ Ntangu yayi, bantu ya mayele ke tuba, “Ya me vutuka na ba-acide ya yawu ya kisina.”

³⁹⁹ Wapi kisika acide me katuka? Beno me mona? Mbote, beno ke tuba, “Yawu me katuka na—na bima yayi.” Mbote mingi. Beto tuba, mumbandu, mutindu, “Ya kele mipepe salaka ba-acide.” Wapi kisika mipepe me katuka? “Mbote, ya vwandaka, beto ke tuba, mipepe me salama na nzila ya ba-molécule.” Wapi kisika ba-molécule me katuka? “Na ba-atome.” Wapi kisika ba-atome me katuka? “Na ba-électron.” Wapi kisika yawu me katuka? “Na nsemo ya yinza.” Beno me mona, beno me kuma na zulu ya mabanza, ya ba-chimiste, ntangu yayi. Mpe, kana ya kele kima mosi mpe luvangulu, ya fwana katuka na Mvangi.

⁴⁰⁰ Na yina, beno me vwanda awa ve na kintulumukina. Mu me kanga beno ve tii na ngunga ya kumi na zole na ndambu,

to na ngunga mosi, na kintulumukina. “Makulu ya muntu ya kudedama me twadisama na Mfumu.” Beno me mona? Ya kele na kikuma mosi samu na yawu. Ya kele na kikuma samu na beno na kukwikila. Ya kele na kikuma samu na beno na kukwikila ve. Kaka mutindu na—na tinta yina.

⁴⁰¹ Ntangu yayi beto longuka yawu. Ntangu yayi, kima ya ntete, beto tuba, na manima beto me vutuka na . . . Beto ke vutula yawu na ba-molécule. Ntangu yayi, beto me baka molécule, mu zolaka tuba, numelo 1 fwokula na molécule 9, fwokula na molécule 12. Ntangu yayi, kana ya vwandaka 11, ya zolaka pesa mbwaki. Kasi ya—ya zolaka vwanda 12, samu na kuzwa ndombe.

⁴⁰² Na yina beto ke kulumuka tii na atome. Ya vwandaka atome. Mpe ⁹fwokula na ⁴3, ya ke pesa atome ¹⁶11. Kana ya vwandaka ¹⁶12, ya zolaka vwanda ya violet. Beno me mona? Na yina beno ke landila na kupanza yawu mutindu yina.

⁴⁰³ Ya ke lakisa ti ya vwandaka na kima mosi kuna na manima, na kubanda. Yina kele kaka diambu ya kimuntu. Ya kele luvangulu. Ya fwana vwanda na Mvangi. Mpe ya basikaka na Mvangi, mpe kuna ba zengaka yawu mpe ba tulaka yawu na yayi, ya kuswaswana. Ntangu yayi, bantu ya mayele lenda baka ve mbuma atome B₁₆ fwokula na 12, fwokula na 14, bambala nionso, kuna, samu na kusala yawu. Nzambi kaka zolaka sala yawu.

⁴⁰⁴ Mpe na yina na ntangu ba me nata yawu na kinkuku ya ba-atome, na ntangu yina science lendaka banda na kusimba yawu. Na manima ya ke kuma mutindu ba-molécule, na manima ba ke banda na kumona yawu pwelele fioti. Na manima ya ke soba, kubanda kuna, na kima yankaka. Na manima, kima ya ntete, ya ke kuma ba-produit chimique, mpe na manima ba ke vukisa yawu kintwadi.

⁴⁰⁵ Ntangu yayi, ntangu muntu, ntete yandi sumuka. Mu ke sukisa, kasi beno kondwa yawu ve. Ntangu muntu sumukaka, yandi kabwanaka na Nzambi, mpe yandi zabukaka dibulu ya nene, mpe yandi kwendaka vwanda yandi mosi awa na simu ya lufwa. Yandi kwendaka. Ya kele ve na nzila na manima. Kieleka. Ya kele ve na mutindu samu na yandi na kuvutuka. Kasi na ntangu yandi salaka mutindu yina, Nzambi ndimaka kiyingingilu mosi, yina vwandaka mwana-dimeme, to nkombo, to dimeme, to kima mosi, samu na menga; yina Adam zonzilaka, to—to Abel zonzilaka, na simu yankaka ya dibulu.

⁴⁰⁶ Na simu yina, yandi kele mwana ya Nzambi. Yandi kele nkuna ya Nzambi. Yandi kele na ntoto mutindu difwa. Yandi lenda yala yinza. Yandi lenda bokila na luzingu. Na yina, yandi kele mvangi, yandi mosi. Yandi kele nkuna ya Nzambi.

⁴⁰⁷ Kasi, ntangu yandi zabukaka, yandi kabwanaka na bumwana ya yandi. Yandi kele musumuki, na nzila ya nkadulu. Yandi kele na nsi ya maboko mpe luyalu ya Satana.

408 Mpe Nzambi bakaka munkayulu, ya élément chimique, ya menga, kasi menga ya bangombe ya babakala mpe ya bankombo vwandaka ve kukatula disumu. Ya vwandaka fika kaka disumu. Kana mu kele na ditono ya mbwaki na diboko ya munu, mpe mu ke fika yawu na mpembe, ditono ya mbwaki kele dyaka kuna. Beno me mona, ya kele dyaka kuna.

409 Kasi Nzambi fidisaka, na Mazulu, décolorant samu na disumu. Ya vwandaka Menga ya Mwana ya Yandi Mosi. Ti, ntangu disumu ya beto yina beto me funguna ke kubwa na kati ya décolorant ya Nzambi, beno meka kuzwa yawu diaka! Tinta ya disumu ke vutuka na yina ya ke luta na mivukisi, mpe ke mata na kati ya ntangu, tii ya ke bula mufundi, Satana, mpe ke vwanda na zulu ya yandi tii na Kilumbu ya Lufundusu.

410 Yinki salamaka na mwana? Yandi me kwisa na ngwisani ya kulunga na Tata diaka, ya kutelama na simu yankaka ya dibulu, kukondwa kubambuka disumu samu na yandi. Ya kele diaka ve, ya kele diaka ve na ditono ya décolorant lendaka monana kisika mosi ve. Yandi kele na kimpwanza. Alleluia! Kaka mutindu masa ya Javel, to tinta yina lendaka vwanda tinta diaka ve, samu ti ya me panzana mpe me vutuka diaka. Mpe ntangu disumu yina ba me funguna kele ya kufunguna mpe yina ba me dindisa na kati. . . Bakala to kento yina ba me dindisa na kati ya Menga ya Yesu Klisto, ya ke kufwa ba-symptome nionso. Mpe molécule nionso ya disumu ke vutuka na diabulu, mpe ke vwanda na zulu ya yandi tii na Kilumbu yina ya Lufundusu, kisika kele kisika ya yandi ya Kukonda nsuka ba ke losa yandi na Kiziba ya Tiya. Mpe dibulu me zikama, mpe ke kwisa ata fioti diaka ve na lubambuku. Mpe muntu ke telama ya kunungisama, mutindu mwana ya Nzambi. Kukikulumusa!

411 Moise, na nsi ya menga ya bangombe mpe ya bankombo, na funguna ya yandi na Ndinga ya Nzambi! Mpe Nzambi lendaka baka muntu yina ya kukikulumusa, mpe kutula Bandinga ya Yandi na yinwa ya yandi. Mpe yandi talisaka ti yandi vwandaka kisadi ya Yehowa, samu yandi lendaka kwenda kuna mpe Yehowa vwandaka tuba na yandi na nzila ya vision. Yandi kwendaka kuna, tandaka maboko ya yandi na esete.

412 Mpe ntangu yayi, beno bambuka moyo, Nzambi tubaka na yandi. Ya kele dibanza ya Nzambi. Nzambi ke sadilaka muntu. Nzambi zonzaka na yandi. Ya kele kieleka. Yandi tubaka, “Kwenda na nkawa yina, na diboko ya nge, na esete, mpe tuba, ‘Banzinzi!’”

413 Moise, na nsi ya menga ya nkombo yina, dimeme, kwendaka kuna mpe bakaka nkawa yina, tandaka diboko na esete. “MUTINDU ME TUBA MFUMU. Bika ti banzinzi kuvwanda!” Yandi kuwaka ata nzinzi mosi ve. Yandi kwendaka diaka. Yawu me tubama dezia. Yawu ke dibanza mosi, ntangu yayi ba me zonza yawu, yawu me tubama. Ya kele Ndinga ya Nzambi

na ntangu yina. Ya me kota na bikoba ya muntu, muntu ya kukikulumusa na nsi ya menga ya ngombe ya bakala, ngombe ya bakala to nkombo.

⁴¹⁴ Kima ya ntete beno zaba, nzinzi mosi ya vert bandaka na kupumbuka kuna. Kima ya kulanda beno zaba, ya vwandaka na bakilo zole na ndambu na metre mosi. Yinki ya vwandaka? Ya vwandaka Ndinga ya Nzambi, yina ba zonzaka na nzila ya Moïse, Mvangi. Samu, na nsi ya menga, yandi vwandaka ya kutelema na Mvwandulu ya Nzambi, mpe Bandinga ya yandi mosi vwandaka ndinga ya yandi ve.

⁴¹⁵ “Kana beno kuzinga na kati ya Munu, mpe ti Bandinga ya Munu kuzinga na kati ya beno, na yina beno lomba yina beno zola, ya ke pesama na beno.” Wapi kisika Dibuundu me telama?

⁴¹⁶ “Bika ti ya vwanda na bakiula!” Mpe ya vwandaka ve na kiula na yinsi. Na ngunga mosi, yawu vwandaka na kitezo ya ba-metre tatu, na bisika yina. Yinki ya vwandaka? Ya vwandaka Nzambi, Mvangi, me bumbama Yandi mosi na kati ya muntu ya kukikulumusa.

⁴¹⁷ Ntangu yayi mu zola kuyufula beno kima mosi. Kana menga ya ngombe ya bakala to ya nkombo ba vwandaka sadila yawu mutindu décolorant, yina lendaka kaka kufika, lendaka tula muntu na kisika mosi samu na kutuba na Ndinga ya Nzambi ya luvangulu mpe kunata banzinzi na luzingu, samu na yinki beno lenda bula disakuba na décolorant ya Menga ya Yesu Klisto Yina lendaka bokila mpadi mosi to kima mosi na luzingu?

⁴¹⁸ Beno sala yawu ve, beno bula disakuba ve. Beno kwikila ti Yandi kele kaka Nzambi. Oh, la la! Pardo ya disumu! Oh, mutindu mu zolaka . . .

⁴¹⁹ Na yina, na Marc 11:22, “Kana beno tuba na mongo yayi, ‘Katuka awa,’ mpe beno tula ntembe ve na kati ya ntima ya beno, kasi beno kwikila ti yina beno me tuba ke salama, oh, beno lenda kuzwa yina beno me tuba.”

⁴²⁰ Oh, mu ke na ba-page tatu to yiya. Beto fwana bika yawu. Matondo na beno.

⁴²¹ Nzambi yina me bumbama Yandi mosi na kati ya kukikulumusa. Beno ke mona ve? Ya kele na kima ke tambula mbote ve kisika mosi kuna. Ya kele na kima ke na tambula mbote ve kisika mosi kuna. Ntangu Nzambi ke salaka nsamunu mosi, Yandi lendaka vuna ve. Yandi pesaka nsilulu. Beno me mona? Yandi me bumbama na kati ya kukikulumusa. Ya kele ya kukikulumusa mingi!

⁴²² Bantu ya kulonguka mpe bantu ya mayele ke tuba, “Ah, ya kele. . . Oh, ya kele télépathie to kima mosi. Beno zaba, ya kele. . .”

⁴²³ Nzambi lenda vutuka Yandi mosi na kati ya ntangu, mpe kutuba na beno kuna na manima kieleka yina salamaka, kutuba

na beno kieleka yina beno kele bubu yayi, mpe yina beno ke vwanda na ntangu ke kwisa. Yina kele kaka na nzila ya décolorant ya Yesu Klisto, Yina lenda baka nsumuki mpe kuvedisa yandi samu na kukotisa yandi Kuna, mpe yandi ke telama na Mvwandulu ya Nzambi.

424 “Mpe kana beno kuzinga na kati ya Munu, mpe Bandinga ya Munu na kati ya beno; beno lenda lomba yina beno zola, mpe yawu ke salama. Yandi yina ke kwikila na Munu, yandi mpe ke sala bisalu yina Mu ke sala.”

425 “Wapi mutindu beno ke fundisa Munu? Oh, misiku ya beno ke tubaka ve ti bayina Ndinga ya Nzambi kwizaka, baprofete, beno bokilaka bawu ve ‘banzambi’? Mpe na yina wapi mutindu beno lenda fundisa Munu na ntangu mu ke tuba ti Mu kele Mwana ya Nzambi?” Bawu kondwaka na kumona yawu. Bawu ke kondwaka na kumona yawu.

426 Ntangu yayi, Dibuundu, na Bansangu yina ke na kwisa, kubanda na nkokila yayi, beno kondwa ve na kumona yawu. Beno me mona? Beno tala kilumbu yina beto ke na kuzinga. Mpe, beno bambuka moyo, Menga ya Yesu Klisto ke nataka disumu ntama mingi na beno, na yina Nzambi ke bambuka moyo na yawu, diaka ve. Yawu ke katula matono nionso.

Disumu bikaka ditono ya mbwaki:
Yandi sukulaka yawu mpembe mutindu mvula
mpembe.

Na yina na ntwala ya Kiti ya kimfumu,
Mu me telama na kati ya Yandi ya kulunga.

427 Oh, la la, wapi mutindu mu ke vwanda ya kulunga? Wapi mutindu mu ke vwanda ya kulunga? Samu na Menga; munu ve, kasi Menga yina ke telama kati-kati ya Nzambi na munu. Mu me ndima Yawu. Mpe Yandi me tula yawu . . . Mu kele nsumuki, kasi Yandi kele Nzambi. Kasi kima yayi ya chimie me telama na kati-kati ya munu, kima yina ke kufwaka disumu, na yina Nzambi ke mona munu kaka mpembe mutindu masa yina ke na kati—yina ke na kati ya décolorant. Disumu ya munu me kwenda. Ya lenda simba Yandi ve, samu ya ke na Munkayulu me vwanda kuna.

428 Wapi lukwikilu ya beto kele samu na kukwikila Ndinga ya Nzambi ya kukikulumusa? Kaka yina Nzambi tubaka, beno baka Yandi na Ndinga ya Yandi. Nzambi me bumbama Yandi mosi ntangu yayi na kati ya kukikulumusa, na mwa nkonga ya bantu ya kukikulumusa, kasi mosi ya bilumbu yayi Yandi ke kukitalisa Yandi mosi mutindu Yandi ke salaka ntangu nyonso na bilumbu me luta. Beno zola Yandi?

Mu zola Yandi, mu zola Yandi
Samu Yandi zolaka munu ntete
Mpe futaka mpulusu ya munu
Na yinti ya Calvaire.

429 Beno zola Yandi? Oh, Yandi kele ve kitoko? Mu banza mpe mu ke na kivuvu ti Nsangu ke basisa yina Yawu kanaka na kusala, ti Yawu ke nata beno na kisika yina beno ke talaka ve bima yina ke bendaka meso, to mwa . . . Ntangu beno ke mona Nzambi na bunene, beno tala mutindu ya kele ya kukikulumusa, mpe na yina beno ke mona Nzambi. Beno sosa Yandi ve . . .

430 Ntangu Élisée vwandaka kuna na kati ya caverne yina, mulinga lutaka, menga, nzasi, bansemo; mpe, beno me mona, ba-sensation nionso yina beto vwandaka na yawu, menga na kizizi mpe na maboko, mpe ba-sensation mpe nionso yina. Yawu vwandaka sala mpasi ata fioti ve na profete yina. Yandi vwandaka kaka kuna tii yandi kuwaka Ndinga ya fyoti ya swi, (yinki Yawu vwandaka?) Ndinga, na yina yandi fikaka kizizi ya yandi mpe yandi basikaka. Beno me mona, ya vwandaka Yawu.

431 Beno bambuka moyo, nkundi, kusosa ve bima ya nene, ya nene . . . Beno ke tuba, “Nzambi, Yandi ke zonzila bima ya nene, ya nene. Ya ke vwanda na ntangu mosi ya ke vwanda na *yayi*, *yina*, to *yankaka*, bima ya nene.” Mu banza ti beno ke bakula yina mu ke tuba. Beno me mona? “Bima ya nene, ya nene, beno me mona! Mpe, oh, ntangu *yayi* ke salama, ya ke vwanda nene, mutindu *yayi*.”

432 Mpe ya ke vwanda ya kukikulumusa mingi, ti beno ke kondwa kima nyonso, beno kwenda kaka na ntwala. Beno me mona? Mpe beno ke tala na manima mpe beno ke tuba, “Mbote, kima yina me salamaka ata fioti ve . . .” Beno me mona, ya lutaka kaka kuna na zulu, mpe beno me monaka Yawu ata fioti ve. Beno luta kaka. Beno me mona, ya ke ya kukikulumusa mingi. Beno me mona? Nzambi ke zingaka na kukikulumusa, beno me mona, samu na kukitalisa Yandi mosi na bunene. Yinki ke salaka Yandi nene? Samu ti Yandi lenda kukikulumusa Yandi mosi.

433 Muntu ya nene, ya nene lenda kukikulumusa yandi mosi; yandi fwana vwanda muntu ya lukumu. Beno me mona? Kasi yandi me kuma nene ntete ve. Ntangu yandi ke kuma nene mingi, na yina yandi ke kulumuka mutindu *yayi*, beno me mona, lenda kukikulumusa yandi mosi.

434 Mutindu santu ya kiboba tubaka kuna na Chicago, “Muntu yina mataka kuna, na malongi nyonso ya lukolo mpe nionso.” Yandi tubaka, “Yandi kulumukaka, me bulama, na yintu ya kukulumusa. Yandi kulumukaka, ya kunungama.” Yandi tubaka, “Kana yandi lendaka mata mutindu yandi kulumukaka, yandi zolaka kulumuka mutindu yandi mataka.” Mbote, ya kieleka. Beno me mona?

435 Beno kukikulumusa. Beno vwanda kaka ya kukikulumusa. Beno meka ve na kuvwanda ya kuswaswana. Beno zola kaka—kaka Yesu. Beno me mona? Beno tuba, “Mfumu, kana luvunu kele na kati ya ntima ya munu, kana ya kele na kima ya yimbi, Tata, mu zola kuvwanda ve mutindu yina. Katula yawu. Mu

zola ve kuvwanda mutindu yina. Oh, mu ke zola ba tanga munu mutindu mosi ya bawu, na Kilumbu yina, Mfumu. Mpe mu ke mona Kilumbu me belama.”


⁴³⁶ Beno me mona Bidimbu yayi ke banda, kana Nzambi ke zibula Yawu na beto. Beno bambuka moyo, Yandi kaka lenda sala yawu. Beto ke na kutala na Yandi. Nzambi sakumuna beno.

⁴³⁷ Mpe ntangu yayi mu banza ti pasteur ya beto ke vwanda na ndinga samu na beno, ya kutuba; to samu yandi na kutuba, mu zola kutuba, na—na beno, ntete beto kutana diaka na manima ya midi yayi. Mpe mu banza ti lukutakanu ke. . . Lukutakanu ya bankunga na ngunga sambanu na ndambu, mutindu yina pasteur? Mpe ya kele. . . [Mpangi Neville me tuba, “Ke banda na ngunga sambanu na ndambu.”—Mu.] Ngunga ya sambanu na ndambu. Mpe ya kele. . . [“Bielo ke zibuka na ngunga ya sambanu.”] Bielo ke zibuka na ngunga ya sambanu. Lukutakanu ya bankunga ke banda na ngunga ya sambanu na ndambu.

⁴³⁸ Mpe kana Mfumu kuzola, mu ke longa, na nkokila yayi, na zulu ya dilongi ya Buku yina me kangama na Bidimbu Sambwadi. Na yina, na Kilumbu ya ntete na nkokila, munati-mpunda ya mpembe. Kilumbu ya zole na nkokila. . . Munati-mpunda ya ndombe, na Kilumbu ya tatu na nkokila. Mpunda ya grize, mpunda ya kuwanguka. Mpe munati-mpunda ya mpunda ya mbwaki. Mpe na manima beto ke baka ya sambanu. . . ya yiya, ya tanu, mpe ya sambanu, mpe na manima na Lumingu na nkokila. Lumingu ke kwisa na suka, mu banza ya ke vwanda lukutakanu ya kubeluka ya nzutu. Mu zaba ve.

⁴³⁹ Ntangu yayi beno bambuka moyo, beto me biekama na Mfumu, beto mosi na dibuundu, samu na kisalu ya Nzambi. Nzambi sakumuna beno.

⁴⁴⁰ Mu—mu me baka ngunga mosi ya kulutila. Beno zola lemvokila munu? [Dibuundu me tuba, “Amen.”—Mu.] Mu—mu ve, beno me mona, mu zolaka ve kusala yawu. Kasi, beno me mona, mu—mu ke vwanda kaka na beno na sabala yayi, na yina mu ke kwenda diaka. Mpe mu zaba ve kisika mu ke kwenda; kaka kisika Yandi ke twadisa munu. Mpe mu zola sadila mbote minuti nionso mu lenda, samu ti mu zola lutisa Seko na beno.

Nzambi sakumuna nge. Ntangu yayi, Mpangi Neville. 

*NZAMBI ME BUMBAMA YANDI MOSI NA KUKIKULUMUSA,
MPE KE KUKITALISA YANDI MOSI NA KUKIKULUMUSA* KNG63-0317M
(God Hiding Himself In Simplicity, Then Revealing Himself In The Same)

BANDANDANI YA LUZAYIKISU YA BIDIMBU SAMBWADI

Nsangu yayi ya Mpangi William Marrion Branham, kulongamaka na Kingelesi, na Lumingu na suka, na kilumbu ya 17 ya Ngonda ya tatu, na mvula 1963, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org